



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonComercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:


Share — copy and redistribute the material in any medium or format

Adapt — remix, transform, and build upon the material

3684

7/1916

491.99.8
L-61



ՀՈՒԱՐԵՐ



Գ. ՏԱՐԵ

2010

25

A P.M.
4-269a

Կովկասի ռւսումբարանական օջանի հսգաբարձուի կողմից թոյլաւում է ուսիս
դասագիրք պետական դպրոցների համար

491.39-8

5-61

ԼՈՒՍԱԲԵՐ

ԵՐԻՌՈՒԹ ՏԱՐԻ

3432

ԿԱԶՄԵՑԻՆ
ԱՏ. ԼԻՍԻՑԵԱՆ, ՅՈՎՀ. ԹՈՒՄԱՆԵԱՆ Եւ Լ. ՇԱՆԹ




2062

ԻՆՆԵՐՈՒԹ ՏԻՊ

Մեր ինքնուրոյն եւ փոխադրած յօդածների, ինչպէս եւ մեր նկարների ար-
տասովով թեան իրաւունքը վերապահած է

Տպարան Ն. Ազանեանի, Պօլից. 7
1916

14355



ԼՈՒՍԱԲԵՐ

ԵՐՐՈՐԴ ՏԱՐԻ



1. Ամենից լաւ տունը

Այստեղ, ուր հովը խաղում է ազատ
ու ջուրն աղմկում, անվերջ փըրփըրում,
այստեղ իր բարի, իր սիրող մօր հետ
մի շատ անհանգիստ տղայ էր ապրում
մի գորշ խըրճիթում,
մի հին խըրճիթում,
գետի եղերքին,
ծառերի տակին:

Մի օր էլ եկաւ անհանգիստ տղան,
կանգնեց իր բարի, իր սիրող մօր դէմ.
«Մայրիկ, այստեղից պէտք է հեռանամ.
միակ ձանձրալի տեղը, որ գիտեմ,
էս գորշ խըրճիթն է,
էս հին խըրճիթն է,
գետի եղերքին,
ծառերի տակին:



15/5-63

«Թող կընամ շըրջեմ աշխարհից աշխարհ,
ճամփորդեմ լաւ-լաւ տըներ տեսնելու,
ամենից լաւը ընտրեմ մեզ համար,
գամ քեզ էլ առնեմ ու փախչենք հեռու

Էս գորշ խըրճիթից,
Էս հին խըրճիթից,
գետի եղերքին,
ծառերի տակին»:

Ու գընաց երկար թափառեց տղան,
մեծ ու հոյակապ շատ տըներ տեսաւ,
բայց միշտ, ամեն տեղ պակաս էր մի բան...
Ու հառաչելով ետ վեռադարձաւ

Էն գորշ խըրճիթը,
Էն հին խըրճիթը,
գետի եղերքին,
ծառերի տակին:


«Գըտամբ, զաւակս», հարցրեց մայրը՝
ուրախ նայելով իր տղի վրա.

«Ման եկայ, մայրիկ, աշխարհից աշխարհ,
ամենից սիրուն, լաւ տունը, որ կայ,

Էս գորշ խըրճիթն է,
Էս հին խըրճիթն է,
գետի եղերքին,
ծառերի տակին:

1) Գորշ ու հին խըրճիթը ինչո՞ւ էր լաւ այն տղի համար:

2) Մեծ ու հոյակապ տներում ինչ բան էր պակաս այն տղի համար:



27. Առաջին դասը

ա.

Դպրոցի դռանը այնքան բազմութիւն էր հաւաքել, որ
ծառան հազիւ էր կարողանում մուտքը պահպանել:

Տիկիններ, բանւորներ, պառաւներ, աղախիններ՝ ամենքն
էլ մի-մի տղայ ու խնդրագիր բոնած՝ աղմկով ու շշուկով
ցրել էին նախասենեակն ու սանդուխքը։ Շատերը տխուր
շրջապատել էին տեսչին, որովհետև իրենց որդիների համար
ազատ տեղ չէր մնացել։

Ի՞նչ զըժւրժոց ու իրարանցում էր դասարաններում ու
միջանցքներում. հին ընկերները հանդիպում էին իրար, խօ-
սում, ծիծաղում, պատմում։ Աշակերտներից ոմանք մեծացել
էին, միւսները գիրացել։

Մեր դասարանը քառասուն հոգի է այս տարի, որոնցից
հազիւ կէսը իմ անցած տարւայ ընկերներից են։

բ.

Առաջին դասին եկաւ մեր նոր վարժապետը։ Բարձրահա-
սակ, անմօրուս մի մարդ էր, երկար ու սև մազերով. ճակատի
մէջտեղը՝ մի խոր կնճիռ։

Երբ մենք գրքերն ու տետրակներն էինք հանում ու պատ-
րաստում էինք գրիչները, նա լուռ կանգնել էր՝ մի ձեռքով
յենւած ամբիոնին, լուրջ ու մուայլ գիտում էր պատուհանից
դուրս, դիմացի տան կտուրը։

Յետոյ սկսեց թելազրելը ու միենոյն ժամանակ ման էր
գալիս նստարանների մէջ։ Նկատելով որ աշակերտներից մէկի
դէմքը սաստիկ դժգոյն է, թելազրութիւնը ընդհատեց, մօտե-
ցաւ, բռնեց տղայի կզակը, հարցրեց՝ ինչով է հիւանդ, ու
ձեռքը դրաւ նրա ճակատին իմանալու՝ թէ արդեօք ջերմ չունի

Այդ միջոցին մի ուրիշ աշակերտ ուսուցչի ետևից ըսկաեց խեղկատակութիւններ անել: Վարժապետը յանկարծ շուռ եկաւ, տղան խկոյն նստեց տեղը ու գլուխը կախ սպասում էր, թէ հիմա ինչ է լինելու:

Վարժապետը ձեռքը դրաւ նրա գլխին ու ասաւ հանգիստ.
—Միւս անգամ այդ տեսակ բան չանես:
Ուրիշ ոչինչ. և շարունակեց թելադրելը:

գ.

Երբ մեր աշխատանքը վերջացրել էինք, վարժապետը զնաց բարձրացաւ ամբիոնը, նստեց իր գրասեղանի առջև, լուռ նայեց մեզ ամենքիս և հանգիստ, հնչուն ու մեղմ ձայնով արտասանեց.

—Լսեցէք, տղերք: Ամբողջ մի տարի մենք միասին աշխատելու ենք. ջանանք, որ լաւ անցնեն մեր օրերը: Ձեր դասերը լաւ սովորեցէք և խելօք կացէք: Ես ընտանիք չունեմ: Ունէի մի մայր, նա էլ այս տարի մեռաւ: Մենակ եմ. ձեզնից զատ աշխարհիս երեսին ոչ ոք չունեմ: Դուք էք իմ զաւակները: Ես սիրում եմ ձեզ, դուք էլ սիրեցէք ինձ: Ցոյց տւէք, որ լաւ ու բարի տղերք էք: Բառերով խոստում չեմ ուզում ձեզնից. ես վստահ եմ, որ արդէն «այն» ասացիք ձեր սրտերում... Շնորհակալ եմ:

Հնչեց զանգը. անձայն հաւաքեցինք տետրակները ու լուռ դուրս էինք զալիս իրար ետևից, երբ չարութիւն անող աշակերտը մօտեցաւ վարժապետին ու դողդոջուն ձայնով ասաւ.

—Ներեցէք ինձ, պար՞ն:

Վարժապետը բռնեց նրա գլուխը, ճակատը համբուրեց ու ասաւ.

—Գնա՞ տղամաս:

- 1) Ո՞զը եղաւ նոր վարժապետի տաճ առաջին դասը:
- 2) Վարժապետը ինչո՞ւ այնպէս լուրջ էր ու մոայլ:
- 3) Ձեր դպրոցի առաջին դասը ինչպէս էր:

3. Վեր կաց

Վեր կաց, մանհւկ, խորունկ քնից,
արեն արդէն ծագել է.
վեր կաց փափուկ քո անկողնից,
հաւը վաղուց խօսել է:

Դէ, շհւտ վեր կաց, էլ մի քընի
ծոյլ ու անհոգ՝ անկողնում.
առ գըրքերը, դպրոց դիմի,
որ բախտ գտնես դու կեանքում:

4. Փոքրիկ ձիավար

ա.

Դեռ երեխայութիւնից ձի նստելու սաստիկ սէր ունէի: Հեծնում էի մի փայտի վրա ու ամբողջ ժամերով վազվզում էի մեր բակում:

Յետոյ երբ փոքր ինչ մեծացայ՝ փայտի նժոյգին փոխարինեցին կենդանի արարածներ: Մեր հորթերը հանգիստ չունէին ձեռքիցս: Մինչև անգամ մեր գայլի նման ահագին շունը երբեմն ստիպւած էր ծառայելու իմ զւարձութիւններին:

Բոնում էի նրա երկար ականջներից ու թռչում մէջքին. բարի շունը ներում էր իմ յիմարութիւնները ու գնում էր դէպի այն կողմը, ուր ես շուռ էի տալիս:

բ.

Երբ տասը տարեկան դարձայ, ամեն երեկոյ անհամբեր սպասում էի նախրի արօտից դառնալուն: Հէնց որ հեռւից նկատում էի մեծ ճամփի վրա փոշու ամպի բարձրանալը, վազում էի տաւարի առաջը, բոնում էի աւանակներից մէկին ու ցատկում մէջքին: Ա՛, ինչ ուրախութիւն էր, երբ նա վազում էր հեռու, դաշտերի մէջ...

Իսկ յետոյ աւանակներին փոխարինեցին մատակ ձիերը: Առանց սարսափելու չէր կարելի նայել ինձ վրա, երբ ես դեկ

Նման բռնած վայրենի մատակի բաշից, մըրիկի պէս պտը-
տեցնում էի մերկ ու առանց սանձի ձիուն։ Հովիւները բար-
կանում էին, զգուշացնում, բայց ով էր ականջ դնողը։

Քանի քանի անգամ վայր եմ ընկել, քանի անգամ կոտ-
րել եմ ձեռս, ոտս, քանի անգամ տուն են տարել ինձ երես
շարդւած ու արիւնլրւայ...։

Մայրս լաց էր լինում, ասում էր՝ ես «սատանայի ծնունդ
եմ» և գնում գանգատւում էր վարժապետիս։

Ոչինչ չէր օգնում։

- 1) Ամելի հասուն տարիքում ինչ պարապմունք կը սիրի այդ տղան։
- 2) Դու ի՞նչ քանի սէր ոնես, եւ որ մ'եծանաս՝ ի՞նչ ես ուզում դառնաս։



5. Այգեկութ

Աշունը սարից որ այգի հասաւ,
այգու ծառերը բեռնւած տեսաւ,
դէմքը խոժուեց ու չեկաւ զուրը.
«Ետ պտուղները ցած առէք, ասաւ,
էտ դեղձն ու խնձոր, խաղողն ու նուռը,
ու վատ չի լինի, թէ փակէք դուռը»։

Աշնան պատւէրը հէնց որ լսեցին,
մարդիկ շտապով այգի վազեցին,
ինչ քէֆ, ինչ խնդում, շատ ուրախացան...
Քաղակ ու կժոց իսկոյն ուսեցին,
կրեցին մառան, կրեցին հնձան,
ծառն ու որթերը ձեռաց մերկացան։

- 1) Աշունը ի՞նչ է սիրում։
- 2) Իսկ մենք աշնանը ինչ ենք սիրում։

6. Պապս

Ամառը ինչպէս էր անց կացել, ես ինքս էլ չըգիտեմ։
Օգոստոսի վերջերն էր արդէն, և ես պատրաստւում էի
գնալ քաղաք. մի-երկու օրից դասերը սկսւելու էին։

Երեկոյ էր, ձին կանգնած էր մեր զոանը ու եղբայրս
կապում էր խուրջինները. Մայրս, քոյրերս, տանեցիք, բոլորս
թափւել էինք զուրս ձիու ու խուրջինների շուրջը։

Միայն ծերունի պապս էր, որ կանգնել էր առանձին, տան
դռան մէջ, երկար չիրուխը բերնին ու իր սպիտակ մօրուքի
ու սև փափախի միջից տխուր ու մտածկոտ նայում էր ինձ։

Չըգիտեմ՝ ինչու սիրու յանկարծ ցաւեց ու մօտեցայ իրեն։
—Ի՞նչ ես մտածում, պապի։

—Ներս արի, բալաս, —ասաւ նա ու տուն մտաւ։

Մտայ ես էլ իր ետեից։

Պ.

Դուռը կամաց վրա արաւ, մօտեցաւ ինձ, չիրուխը մի ան-
գամ էլ պինդ քաշեց, պահեց ատամներով ու ծոցից հանեց
ահագին կապոյտ թաշկինակը. Դողդոջուն ձեռքերով ետ քան-
դեց թաշկինակի ծայրի կապը ու մէջը եղած մի-երկու ար-

ծաթ փողը դրաւ ձեռիս.

—Առ, ճամփին պէտք կը գայ:

Յետոյ մի անգամ էլ քաշեց չիբուխը ու աւելացրեց.

—Նորից զնում ես, բալա ջան, Աստւած քեզ հետ. Գնում ես, մէկ էլ գարունքը կը գաս, Գարունքը կը գայ, դու էլ կը գաս, իսկ ինձ ով գիտի էլ կը տեսնես թէ չես տեսնի. իմ օրերս համարւած են, ըստ կեանքը դեռ նոր է սկսում. Երկար ապրես, որդի, երկար ու երջանիկ. Եթէ ուզում ես երջանիկ ապրես, երկու բան լաւ միտդ պահի. միշտ լաւութիւն արա ուրիշներին՝ ով էլ որ լինի, որ հոգիդ ուրախ մնայ. մէկ էլ միշտ աշխատանք ունեցի ձեռքիդ, որ ուրիշի ձեռքին մտիկ չըտաս. Զըմոռանաս...

Յետոյ հրամայեց որ չոքեմ.

Կատարեցի իր կամքը, չոքեցի. հաղիւ էի ինձ զսպում, լացը խեղդում էր ինձ. Նա ձեռքը դրաւ գլխիս ու ինձ օրհնեց...


Կարծես երէկ լինէր, այնպէս պարզ յիշում եմ դեռ նրա ազնիւ ու վեհ դէմքը, նրա դողդոջուն ձեռքերը, նրա բարի ու խոր ձայնը...

Երբ նորից ոտքի ելայ ու դուրս եկանք միասին, արդէն ձին պատրաստ էր. գրկւեցի բոլորի հետ, ես ու մեծ եղբայրս հեծանք ձիերը, բաժանւեցինք ու մտանք ձորը.

Էն էր. պապիս ես այլևս չըտեսայ. Աշնանք մեռել էր. ես շատ ուշ իմացայ. ինձնից ծածկել էին:

1) Տուն որ մտան, տղան բանի՞ բան ստացաւ իր պապից. Ո՞րն է ստացածներից ամենաթանկագինը:

2) Պապի ասելով՝ ով է երջանիկը աշխարհիս երեսին, եւ ինչո՞ւ:



7. Հական

ա.

Լաւ չեմ յիշում թէ որ դարում,
հին ժամանակ, մեր աշխարհում
ասում են թէ՝ կար մի իշխան.
մի մեծ իշխան, էնքան ուժեղ,
որ թէ մարդիկ նըրա աչքում,—
թէ հասարակ ճանձ ու մըժեղ:
ինչ որ անէր ու կամենար,
օրէնք էր էն երկրի համար.

ով էր գըլիսից ձեռ վեր կալած,
ով դուրս կը գար նրա դիմաց:

Ունէր անթիւ ու անքանակ
ոչխարի հօտ, մարդի բանակ,
կովի նախիր, խոզի բոլուկ,
երամակներ ձիու, ջորու,
էս բոլորը ցըրւած, փըռւած
մինչև ծովի ափը հեռու:
Մինչև ուր որ ըըշէր, տանէր,
իր աշխարհի սահմանն էն էր.
ով էր գըլիսից ձեռ վեր կալած,
ով դուրս կը գար նրա դիմաց:

բ.

Մի անգամ էլ էս իշխանը,
երբ նստած էր իրեն տանը,
լեղապատառ ներս ընկաւ տուն
իր հօտերի վերակացուն.
—Ապրած կենաս, մեր տէր, իշխան,
հապա, էսպէս հըրաշք մի բան:
Արածում էր ծովի ափին

բազմութիւնը բո հօտերի,
 մին էլ տեսնենք՝ ծովի միջին
 մի վիթխարի մարդ է գալիս:
 Մի վիթխարի մարդ եմ ասում,
 որ մենք իր մօտ լու ենք չնշին.
 ծովը մինչև ծունկ է հասնում,
 իսկ պուխը ամպի միջին:
 Եկաւ, կանգնեց մեր յանդիման
 ու որոտաց ամպի նըման.
 «Ո՞վ է, ասաւ, էսպէս բերում
 թողնում ապրանքնիմ հանդերում.
 Կորէք իսիոյն, աւազակներ,
 ձեռըս քանի չի հասել դեռ...»
 Են ժամանակ վեր կացայ ես
 ու պատասխան տրւի էսպէս.
 «Էտ սեակնած, մութ ամպերում
 գուր ես էտքան բարձր գոռում.
 ով էլ լինես, ուսկից էլ գաս,
 էս մի բանը լաւ իմանաս,
 դու, երկնահաս, ահեղ հըսկայ,
 մեծ իշխանի ապրանքն է սա.
 Ո՞վ է գըլխից ձեռ վեր կալած,
 ով դուրս կը գայ նըրա դիմաց»:
 Բայց ինձ իսկի չը լսեց էլ
 Են անճոռնի աժդահակը,
 Են ամպերից ցած կըուացաւ,
 ձեռը կոխեց ծովի տակը,
 գուրս հանեց մի ձուկն ահագին
 ու դէմ արաւ արեգակին,
 որ խորովի... — Հազիւ էսքան
 պատմեց հովիւն իշխանական
 ու վէր ընկաւ, շունչը փըշեց:

Դ.

Խիստ զայրացաւ իշխանը մեծ.
 — Ո՞վ է, ասաւ, համարձակւել,
 իմ տէրութեան սահմանն եկել
 ու էտպէս էլ վրէս հաչում...
 ինձնից ուժեղ չեմ ճանաչում
 ես ոչ մի տեղ և ոչ մէկին...
 Էսպէս ասաւ ու զայրագին
 հըրամայեց զօրքերը գան:
 Հըրամայեց՝ զօրքերն եկան.
 — Կեցցէ մեր տէր, մեր թագաւոր,
 անյաղթ, անմահ, ամենազօր...
 «Ապրէք, ասաւ իշխանը սէգ,
 ելէք իսկոյն ու գընացէք.
 մանուկ ու ծեր
 իմ առիւծներ,
 ով է, տեսէք, վըրէս հաչում
 ու իմ ուժը չի ճանաչում:
 Յոյց տւէք դուք, որ ոչ մի տեղ
 չըկայ ոչ ոք ինձնից ուժեղ...»
 Ասաւ, զօրքերն իրենց կարգին
 փող փըշեցին, թըմբուկ զարկին,
 շըրըխկոցով, զըրընգոցով
 ճամփայ ընկան դէպի մեծ ծով:

Դ.

Հասան, տեսան— այ քեզ հըսկայ,
 զըլուխն էստեղ, ոտներ չը կայ.
 զընա, զընա, թէ որ գըտնես...

Երկար ու մին ձըգւած էսպէս,
 հըսկայական քընով քընած:
 Էստեղ, էնտեղ դիրքեր բըռնած:
 Դէս չոքեցին, դէն պառկեցին,
 հա զարկեցին ու զարկեցին.
 տեսան՝ տեղից ժաժ չի գալի,
 խըռմփում է զարհուրելի.
 խըռմփոցից ինչ որ խօսում,
 մարդիկ իրար ձէն չեն լըսում:
 Մօտ գընացին, էլին, էլին...
 Դարձեալ տեղից ժաժ չի գալի.



Կամաց կամաց սիրտ առնելով,
 գորգոռալով, հարայ տալով,
 դուրս թափւեցին թաքուսաներից,
 ելան վըրէն, դէսից, դէնից,
 որը ոտին,
 որը քըթին,
 որը լանջին,

որն ականջին,
 փորի վըրա, միրքի միջում,
 ձի են խաղում, նիզակ ճօճում,
 զարկում, զարկում,
 ձըգում, թըքում,
 հայհոյում են էսպէս, էնպէս...

Ե.

Մին էլ հըսկան էն սարի պէս
 վըրա նստեց, մեծ, ահարկու.
 ինչ պատահեց – ոչ տեսնես դու:
 Հազարներով մարդն ու իր ձին
 տակովն եղան, կոտորւեցին.
 որն էլ գըլխից, ըըթից, լանջից,
 կամ ուսերից, կամ ականջից
 ներքե ընկաւ, թէ մարդ, թէ ձի,
 նըրա օրն էլ դու իմացի:

Շատ զարմացաւ հըրէշ հըսկան
 թէ Տէր Աստւած, արդեօք էսքան
 մանր-մունր ինչ բաներ են,
 որ եկել են թափւել վըրէն:
 Տեսաւ, ինչ որ կենդանի կան՝
 վազ են տալիս թէ ետ գնան.
 ըուն առաւ իր բըռնովը մեծ,
 իրար խառնեց, ողջ հաւաքեց,
 զըրպանն ածաւ
 ու վեր կացաւ,
 լընգլընգալէն, իրիկունը,
 գընաց հասաւ իրենց տունը:
 Տանը իր պէս մեծ, ահագին
 մի մէր ունէր, բարի մի կին:

Գընաց իրեն մօրը պատմեց
թէ իրեն հետ ինչ պատահեց,
ու գրպանից հանեց բոլոր՝
ահից խելառ ձին-ձիաւոր:
Բարի կինը հէնց որ տեսաւ,
—Աման, որդի, վայ ինձ, ասաւ.
ի՞նչ ես անում էտ խեղճերին:



Բա չես տեսնում, թէ քո ձեռին
ոնց են դողում: Ասենք մեծ ես,
միթէ պիտի փոքրին տանջես:
Մեծ թէ փոքր, ինչ էլ լինի,
ամեն ապրող շունչ կենդանի,
որ ծնւել է արևի տակ,
էս աշխարհքում միատեսակ,
մինը պակաս, միւսը աւել,
ողջ էլ զիտեն խընդալ, ցաւել:
Չըպարձենայ երբէք ոչ ոք,
թէ ինքն անյաղթ մի բան է ջոկ.
միշտ ուժեղից ուժեղը կայ,
իսկ ամենից ուժեղը՝ մահ...
Բաց թող, որդիս,
բաց թող՝ գընան,
ապրեն ազատ
ուր կամենան:

Ու ճնազանդ մօր խըրատին,
իսկոյն հանեց հսկայ որդին
իր գրպանից ձին-ձիաւոր,
իրար խառնած զօրքը բոլոր,
թողեց գընան
ուր կամենան:

8. Սահակ-Մահակը

Վարագի վանքում ուսուցիչ էի: Մի երեկոյ սենեակում
նստած՝ աշակերտների տետրակներն էի ուղղում, որ ետեսիցս
մի ձայն լսեցի: Ետ դարձայ, տեսնեմ՝ դռան առջև կանգնած
է վանքի հացթուխի օգնականը, քսաներկու, քսաներեք տարե-
կան մի բարձրահասակ երիտասարդ, բարակ ու նիհար: Կար-
ծեցի՝ եկել է ինձ վանական ընթրիքին հրաւիրելու:

—Հը, Սահակ, ի՞նչ է,—հարցրի ես:

—Վարժապետ...—սկսեց նա կմկմալով ու լոեց:
Ես մօտեցայ:

—Վարժապետ,—շարունակեց նա աղերսագին,—ի՞նչ կը
լինի, ինձ էլ կարդալ սովորեցնես: Ես էլ զիրք կարդամ, լրա-
գիր կարդամ: Ախ, ի՞նչքան լաւ-լաւ բաներ կան գրած գրքե-
րում: Ինձ որ կարդալ սովորեցնես, վանքի բոլոր գրքերը կը
կարդամ...

Ես նայեցի նրա յուզւած ու գունատ դէմքին: Խիտ յօն-
քերի տակից խոշոր աչքերը տենդօրէն փայլում էին.

—Լաւ, վաղւանից սկսենք, — պատասխանեցի ես:

Առաջ քան ուշքի եկայ, Սահակը կուացաւ և աջս համբուրեց:

Բ.

Մեր պարապմունքները շատ աջող էին գնում: Սահակը
ամբողջ սրտով էր կպել գործին: Աշակերտները շուտով իմա-
ցան, որ «Սահակ-Մահակը» կարդալ է սովորում: Նրան այդ-
պէս էին անւանում երկար ու բարակ հասակի ու մեծ գլխի
համար: Վազում էին ետեսից ու ծաղրում:

—Տիրացու Սահակ, տիրացու Մահակ:

—Զէ, չէ, Մահակ վարդապետ: Հայր սուրբ, հայր սուրբ:

—Զերդ սրբազնութիւն, Մահակ սրբազն:

Մտիպւած էի սաստելու այդ չարերին: Սակայն Սահակը

ոչ մի ուշը չէր դարձնում ծաղրանքների վրա և շտապում էր շուտով վերջացնի այբուբենը:

—Ախ, Երբ պիտի մեծ-մեծ զրբեր կարդամ, «Խենթ», «Կայձեր», —կրկնում էր նա ամեն անգամ անձկութեամբ:

—Սպասի, սպասի, շուտով այդ գրքերն էլ կըկարդանք, —քաջալերում էի նրան, և նա ամեն դասից յետոյ աւելի վստահ էր հեռանում սենեակիցս:

Իմ սենեակը նրա խցի գլխին էր, պատուհանն էլ նրա պատուհանի պէս բացւում էր դէպի վանքի դրսի բակը: Եւ ահա մինչև ուշ գիշեր այդ պատուհանից ես լսում էի Սահակի անդադրում, ոգևորւած ձայնը.

—Գը-այ-լը՝ գայլ, սը-այ-լը՝ սայլ, փը-այ-լը՝ փայլ...

Դ.

Մէկ ամսից յետոյ նա արդէն բոլոր տառերը լաւ ճանաչում էր և կարդում էր ինձ հետ փոքրիկ պատմւածքներ: Բայց օրէցօր աճում էր նրա անհամբերութիւնը: Մի կիրակի ամբողջ օրը վանքից բացակայ էր. եկաւ միայն երեկոյեան դէմ և ուղղակի մտաւ սենեակս: Մի փաթեթ ունէր կոնատակին:

Յաղթական բայլւածքով ու փայլող դէմքով մօտեցաւ սեղանիս և բաց արաւ գունաւոր թաշկինակը:

Մէջը Ռաֆֆիի «Կայձերի» մի նոր օրինակն էր, որ իր խնայած փողով գնել էր Վանում:

—Վարժապետ, ահա գիրքը. հիմի սրանից կարդանք:

—Լաւ, —ասի ես, —այս մի շաբաթն էլ դասագրքից կարդա, յետոյ կըսկսես քո «Կայձերը»:

—Շնորհակալ եմ, վարժապետ, Աստւած երկար կեանք տայ քեզ, —դուրս թռաւ նրա սրտից:

Ե.

Բայց այդ օրին չարժանացանք:

Մի տօն օր էր, քաղաք էի իջել. Երբ երեկոյեան վերադար-

ձայ վանքը՝ ինձ յայտնեցին, որ Սահակը մերձիմահ հիւանդէ:

Շտապեցի հիւանդի սենեակը. Մեռելի նման գունատ, ձրգւել էր մէջքի վրա, խոշոր աչքերը յառած առաստաղին: Երբ նրան անունս տւին՝ նա առանց աչքերը առաստաղից հեռացնելու, կարծես զառանցանքի մէջ, կարօտալի արտասանեց.

—Վարժապետ, դաս տնւր...

Մօտեցայ, մի քանի մխիթարական խօսքեր ասի, թէ շուտով նորից կըսկսենք մեր պարապմունքները, և այս անգամ ուղղակի «Կայձերից»:

Նա անշարժ ականջ էր դնում իմ խօսքերին, աչքերը շարունակ առաստաղին. Երբ ես լոեցի՝ խուլ ձայնով կրկնեց.

—Վարժապետ, դաս տնւր...

Նստեցի մօտը մի տասը րոպէ: Թէ ես, թէ հիւանդապահ ծառան պահպանում էինք խորին լուսթիւն: Սահակի գունատ դէմքը կամաց իմ կողմը դարձաւ, ու աչքերը մեխւեցին դէմքիս ու բամբակի պէս սպիտակ շրթունքները շշնջացին.

—Վարժապետ, դաս տնւր...

Ե.

Նա շատ ուշ ու դժւար առողջացաւ:

Մի օր ինձ սենեակից դուրս կանչեցին: Դուրս եկայ, տեսնեմ Սահակն էր. եկել էր մնաս բարով ասելու, գնում էր իր հայրենիքը ծնողների մօտ կազդուրելու:

Դեռ ես գունատ էր շատ, բայց ամբողջ դէմքը ժպտում էր:

—Մնաս բարով, վարժապետ, երբէք քո լաւութիւնը չեմ մոռանայ, —բացականչեց նա ձեռքս սեղմելով, —քո մեծ լաւութիւնը:

Երբ հեռանում էր, նկատեցի որ մէջքին երկար շալի մէջ մի քան ունէր կապած. իր գիրքն էր, որ տանում էր իր հետ սարերումը կարդալու:

Միակ հարստութիւնը որ տանում էր հետը:

1) Աշակերտները ինչո՞ւ էին ծաղրում Սահակին, երբ իմացան, որ կարդալ է սովորում:

2) Սահակի պատմութեան մէջ ամենից տեղի մեզ ինչն է դուք զալիս:



9. Կարդա

Կարդա, այ իմ խելօք մանուկ,
Կարդա, գրի տարին բոլոր,
Կարդացողի խելըն է կտրուկ,
միտքը պայծառ ու լուսաւոր.

Գիր կարդալով՝ դու գրքերում
շատ նորանոր բան կիմանաս.
շատ շատերից, շատ բաներում
մըտքով հեռու կը սըլանաս.

Գիր կարդալով՝ դու աշխարհիս
կըճանաշես չարն ու բարին,
հիվ է խնդում, հիվ է լալիս,
հիվ է զըրկում խեղճ թշւառին.

Դու կիմանաս՝ ինչու մարդիկ
պէտք է ապրեն իրար համար.

Ի՞նչն է մարդկանց ցաւն ու կարիք,
ի՞նչ է լոյսը, ի՞նչը խաւար:

Կարդա, որդիս, որ հօրդ պէս
դու էլ անուս, խեղճ չը մընաս,
որ ամենքին վիզ չը ծռես
ու միշտ ազատ առաջ գընաս:

Ինչու տգիտութեանը խաւար ենք ասում, իսկ գիտութեանը լոյս:

10. Գիւղացին եւ ծառը

Փայտհատ Մօսին

Կացինն ուսին

մտաւ անտառ:

«Հոգիս», ասաւ

նրան մի ծառ.

«Դալար մնան բո կոները,

կացինդ առ, էս ծառերը

չորս բոլորս ջարդիր զատ-զատ.

ինձ չեն թողնում բուսնեմ ազատ:

Տես՝ կապել են զլիսիս կամար,

արև չըկայ խեղճիս համար:

Ո՞նց կարող եմ ես զօրանալ,

շրջակայքիս զարդը դառնալ»:

Կացինն առաւ փայտհատ Մօսին,

մէկ էս ծառին, մէկ՝ միւսին,

ծառի շուրջը լայն ու արձակ

մի տեղ բացեց շատ ընդարձակ:

Բայց խնդումը շատ չըտեղ.

Էն լաւ օրին վատն հետեեց,

հայ արեր ծառը մրկեց,

հայ կարկուտը ճիւղքից զըկեց,

ու մի օր էլ բամին սաստիկ

կոտրեց ծառը չարաբաստիկ:

11. Զալօի էշը


ա.

Զալօն մի էշ ունէր միայն, մի հատիկ քած էշ. Ուրիշները զանազան չորբոտանիներ էին աշխատեցնում իրենց տուն ու տեղի համար, իսկ նա ամեն տեղ էլ իր էշովն էր գործի գնում: Զալօն օրական երկու ճամփայ աղբիւրիցը ջուր էր բերում այդ էշով, ջաղացը աղուն տանում, անտառը փայտի գնում. սար ու դաշտի երկար ու ձիգ ճանապարհը հօ ոտից գցել էր խեղճ անասունին:

«Աղքատի լեզուն կարճ է լինում»: Ունեոր հարեաններն անգամ ձեռաց գործի համար Զալօի էշին էին վազում, ասելով թէ իրենց էշն ու ձին տանը չեն: Մի խօսքով, ամբողջ թաղն ու թառակը օգտուում էր աղքատ Զալօի սուս ու փուսքնաւորութիւնից, և ամենը էշը տանում էին ուր ուզէին: Շատ բանելուց յոզնած՝ էշը ժամերով պառկում էր զետնին, իսկ նրա մի տարեկան քուռակը շըդիմացաւ, մի օր էլ վայրընկաւ ու սատկեց:

բ.

Այդ բոլոր չարչարանքը կարծես բաւական չէր: Զալօի էշը ուրիշ թշնամիներ էլ ունէր: Ամբողջ գիւղի չարաճճի մանուկ-



ները՝ հէնց օր էշը գտնում էին պարապ, մի հնարքով դոնիցը հեռացնում էին և ջուխտ ու կենտ վրան թափւելով, այնքան

վազում ու վազեցնում էին անբան անասունին, որ քափ ու քրտինքի մէջ լողացնում էին:

Մանուկների այդ վարմունքը ցաւ ու կրակ էր դարձել Զալօի համար: Մեծերին խաթր էր անում, բան չէր ասում, իսկ փոքրերին թէկուզ մտածում էր՝ պատահած ժամանակը մի թակի, բայց այնպէս փախչում, թաքնւում էին անպիտանները, որ նրա առաջ մնում էր միայն էշը իշացած կանգնած: Այս դէպքերում Զալօն իր սրտի զայրոյթը էշիցն էր հանում. այնքան վէր էր հատում, որ էշի ետին ոտքերը ուղիղ գնալու փոխարէն միշտ թեք-թեք էին գնում:

գ.

Այսպէս՝ մի կիրակի էր, որ Զալօն տեսաւ նորից՝ էշը դուանը չի: Իջաւ գիւղամէջ, դէս ու դէն նայեց, սրա ու նրա գոմ ու մարագը մտաւ, այս ու այն կալապանն ու շւարապնը տնտղեց, բայց էշը չըկար սւ չըկար: Հասկացաւ որ երեխանները նորից էշին տարել են տանջելու. զայրացած՝ վերցրեց մի հոնի եղան և գիւղիցը գուրս գալով դէպի մօտակայ արտերը՝ անդադար կանչում էր. «Էհէյ, էշ տանրդ, էհէյ, էշ տեսնող»:

Սակայն ոչ ոք չէր պատասխանում:

Զալօն աւելի կատաղեց և բերանը փրփուրով լիքը այս անգամ սկսեց թունդ-թունդ հայնոյանք թափել «անամօթների» գլխին: Երբ տեսաւ որ դարձեալ պատասխանող չըկայ, այնուհետև սկսեց ինքն իր էշին անիծել:

«Երանի քեզ պէս ապրանք ուրիշն էլ ունի, թէ կենտ ես եմ. գէլն ուտի քեզ. ինչ անասուն ես հա...»

Յանկարծ նկատեց որ դիմացի սարիցը իրենց նասիթ ապին ցած է իջնում: Իսկոյն բարձրացաւ մի թմբի գլուխ, ձախ ձեռքը ականջին դրաւ, աջ ձեռքով փափախը վերցրեց ու օդի մէջ ցած ու բարձր անելով սկսեց կանչել.

— էհէյ, նասիթ ապի, ապի, ապի:

Նասիթ ապին Զալօի հօրեղբայրն էր: Թէպէտ ծեր էր ու

մազերը ալևոր, բայց գեռ սուր լսողութիւն ունէր: Լսելով
Չալօի խօսքերը ընդհատեց քայլերը և պատասխանեց:

—Հէյ, աղա, էտ ի՞նչ է, էտ ի՞նչ է...

Չալօն այնքան պինդ էր աղաղակում և այնքան յուզւած
էր, որ նասիբ ապնի ձայնը անլսելի մնաց նրան և շարունակեց.

—Ա՛, խլանսաս դու ապի, նամիբ ապի:

—Աղա, էտ ի՞նչ է, ի՞նչ է, իմանում չե՞ս:

—Մեր էշը տեսար ոչ, էշը, էշը:

—Տեսայ, համա բերի ոչ:

—Որտեղ տեսար, որտեղ, որտեղ:

—Քարակիտուկի վերի կողմերումը, վերի:

—Հիմի որ գնամ, էնտեղ կը լինի՞ թէ ոչ:

—Բաս հօ գէլը կերաւ ոչ:

դ.

Իսկ երեխաները իրենց անելիքը առաջուց արել և վեր-
ջացրել էին: Երբ տեսել էին նասիբ ապնին, էշը թողել էին և
քարակիտուկների տակ տապ արել: Այժմ էլ, երբ ականջնե-
րովն ընկաւ Չալօի և ապնի ձէնն ու ձունը, ամեն մէկը շտա-
պեց փախչի: Հաստապոօ Ապրօն ուզում էր Չալօին վախեց-
նի և հնարաւորութիւն տայ ընկերներին անվտանգ գիւղ մըտ-
նելու, բարձրացաւ մի սաղարթախիտ կաղնի ծառ և այնտե-
ղից կանչում էր.

—Էհէյ, իշատէր, էշն արտը կերաւ, էշն արտը կերաւ...

Մի րոպէ Չալօն սփրթնեց. նա լաւ գիտէր, որ եթէ արտերի
պահապանը էշին բռնի և տուն անի, ահագին տուգանք են
խլելու իրանից: Իսկոյն ձայնը կտրեց և սուս ու փուս, ծա-
ծուկ ճամփով այնպէս բայլեց դէպի ապնի ցոյց տւած տեղը,
որ ըլինի թէ մէկը տեսնի և յայտնի պահապանին թէ Չա-
լօն էշին էր ման գալիս և նրա էշն է, որ արտն է ընկել ու կերել:

Երբ էշին հասաւ, խեղճ անասունը կանգնել էր գլուխը
խոնարհած, ականջները ցած, պոչը ոտքերի արանքը սեղմած:

Չալօն ախ քաշեց ու քթի ծակերից բարկութեան ծուխ ելաւ,
սակայն արտի պահապանի երկիւղից, առանց մի խօսք ասե-
լու, առաջն արաւ կենդանին ու տուն քշեց:

Խեղճ անասուն: Աղքատի էշ էր, հանգիստ չէին տալիս
ոչ էշին, ոչ տիրոջը:

1) Չալօն ինչո՞ւ չէր ռողոքու, ինչո՞ւ չէր պաշտպանում, ինչո՞ւ
սոս ու փուս տանում էր այդ ռողոքը:

2) Ի՞նչպէս կը լինէր այս էշի պատմութիւնը, եթէ Չալօն մի
հարուստ մար լինէր:

12. Տերեւաթափ

«Ա՛յ փոքրիկներ, այ սիրուններ»,
ասաւ քամին տերեւներին,—
«աշունն եկաւ, մօտ է ձմեռ,
ի՞նչ էր դողում ծառի ծէրին:
Ոսկի դեղին, վար ծիրանի
գոյներ հագէք խայտաբղէտ
ու ճիւղերից ձեր մայրենի
եկէք ինձ հետ, փախէք ինձ հետ...
Եկէք տանեմ հեշտ ու անթե,
անհետ ճամփով, անյայտ տեղեր,
չէք իմանայ այսունետև
էլ ինչ է գող, ինչ է ձմեռ...»
Տերեւները հէնց լսեցին,
նախշուն-նախշուն գոյներ հագան,
սըւսըւալով տխուր երգեր՝
քամու թեին թռան, փախան:

1) Տերեւները ինչո՞ւ էին տխուր. նրանք ինչո՞ւ ականջ որին քա-
մու խօսքերին:

2) Քամին նրանց ո՞ւր է տանելու:

13. Աղջկի սրբող Թունասը

ա.

Վաղ առաւօտէ. ահագին քաղաքի կէսը քնած է դեռ. Բայց Թոմասը ոտի է վաղուց, ու շրւշլւացնելով գնում է գործին՝ ուսից կախած իր տուփը, որի մէջ խոզանակներ են ու կօշկի ներկերը:

Սուր արձագանք է տալիս սուլոցը դեռ դատարկ փողոցներում: Թոմասը ուրախ էր, միշտ ուրախ ու աշխուժ: Թուխ դէմքով, խելօք աչքերով մի տղայ է. դեռ նոր է լրացել տասը տարին, թէև վրան որ նայես հազիւ կըտաս ութը տարի:

Փոստի կենդրոնական շէնքի դէմը, զիխաւոր մուտքից ոչ հեռու, անձրկից պաշտպանւած մի անկիւնն է նրա աշխատանոցը. այդտեղ նստած է նա ամբողջ օրը իր տուփի ու խոզանակների առաջ. ամառւայ շոքին, ձմեռւայ ցրտին, միշտ հնչում է նրա ախորժելի քնքուշ ձայնը.

«Զէք ուզում, պարոն, մաքրեմ ձեր կօշկը. աղամանդի պէս փայլի, հայելու պէս տեսնէք մէջը ձեր պատկերը... Թանգ չէ, պարոն, հինգ կոպէկ»...

Ասում է ու այնպէս քաղցր ժպտում, այնպէս կատակով, այնպէս կենսուրախ, որ անցորդը ակամայ կանգ է առնում: Իսկ ով մի անգամ իր կօշկը Թոմասին է մաքրել տալիս, միշտ էլ կը գայ նրա մօտ:

բ.

Իսկ մութն ընկաւ թէ



չէ, նա հաւաքում է ձեռաց իր փոքրիկ շարժական խանութը ու գնում տուն:

Քաղաքի ծայրին, մի խուլ փողոցի խորքումն է այն ցածրիկ հին տունը, ուր մի փոքրիկ սենեակ ու մի մեծ խոհանոց ունեն վարձու բռնած Թոմասն ու իր մայրը. մայրը լւացարար է:

Ի՞նչ բախտաւոր ժպիտով է զիմաւորում մայրը ամեն իրկուն իր սիրեկան երեխին. իսկոյն մոռանում է ամբողջ օրւայ յոգնածութիւնը լւացը տաշտակի առաջ:

Թոմասը դատարկում է իր վարտիկի երկու գրպաններից սև փողերը մօր գոգնոցի մէջ, փոքրիկ քոյրերը պատրաստում են սեղանը և իսկոյն նստում են հացի: Շտապում է նա:

Ուղիղ ժամը ութին սկսում են երեկոյեան դասերը: Այս երկրորդ ձմեռն է, որ Թոմասը անընդհատ գնում է զիշերները դպրոց. արդէն սովորել է գրել կարդալ. Ցերեկւայ այն ժամերին, երբ քիչ է անցուդարձը և յաճախորդներ չեն լինում, Թոմասը փողոցի անկիւնում, իր տուփի առաջ միշտ մի փոքրիկ գիրք ունի ձեռքումը:

Նա կարդում է, կարդում, և ինչ ծրագիրներ է կազմում ապագայի համար, ինչ մեծ ու պայծառ ծրագիրներ:

Այդ փոքրիկ գրքերը ասում են նրան, թէ քանի քանի մեծ մարդիկ իր նման են եղած իրենց կեանքի սկզբին, քանի քանի մեծ մարդիկ առաջ են գնացել ու բարձրացել են աստիճանից աստիճան միայն իրանց աշխատանքով և իրենց յամառ կամքով:

Եւ Թոմասը վճռել է որ ինքն էլ պէտք է դառնայ անպատճառ մի մեծ մարդ. ինչքան բաներ պիտի հնարի մարդկանց համար, ինչպէս պէտք է պահի մայրիկին ու քոյրիկներին...

Այս, մի մեծ մարդ, անպատճառ:

- 1) Ի՞նչ էք կարծում Թոմասի ծրագիրը պիտի աջողի. Եւ ինչո՞ւ,
- 2) Ի՞նչ բաներ են անհրաժեշտ ամեն մի ծրագրի, ամեն մի գործի աջողութեան համար:

14. Աշուն

Աշնանային քամիները փչեցին,
ծառ ու ծաղկունք տերևները թափեցին,
երկինք մոռայլ, գիշեր-ցերեկ ամպամած,
սար ու ձորեր մէգ-մառախուղ է պատած:

Ամայացան անդաստաններ, այգիներ,
թըռչունների ուրախ երգը դադարեց,
խոպանացան աղմըկալի ճամփաներ,
և սայլերի անցուղարձը ընդհատւեց:

Յոգնած եզներն հանգստացան գոմերում,
օջախի շուրջ գեղջուկները խըմբւելով
աշխատանքի պտուղներն են վայելում՝
ուրախ-զըւարթ, մինչև գարուն ապահով:

- 1) Գիւղացին մի՞շտ է ձմեռը ապահով:
- 2) Ի՞նչ պատկեր կը լինի օջախի շուրջը «վատ տարին»:

15. Գգուանքի կարու

ա.

Մայրաքաղաքի հեռաւոր թաղում ծերունիների ապաստարանի կողքին կանգնած էր նաև մի որբանոց: Մի առաւօտ ընդարձակ բակի միջով ապաստարանից անցնում էի որբանոցը:

Ծառի տակ, ուրիշներից առանձնացած տեսայ մի գանգրահեր, կարմրաթշիկ մանուկ: Դէմքն այնքան գուրեկան էր, որ կանգ առայ ու քնքշաբար շոյելով գլուխը՝ քաղցրութեամբ հարցրի: — Անունդ ի՞նչ է, պստիկ:

Նա պատասխանեց և աւելացրեց թէ եօթը տարեկան է, ոչ հայր ունի, ոչ մայր, ոչ էլ մէկ ուրիշը աշխարհիս երեսին: «Դրա համար էլ բերել են ինձ որբանոց», արագ վերջացրեց նա իր կենսագրութիւնը:

Կարեկցութեամբ ու մտերմօրէն շոյեցի թշերը ու մտայ որբանոց: «Խեղճ երեխայ», — մտածում էի գնալիս:

բ.

Երբ մի փոքր ժամանակից յետոյ վերադառնում էի նոյն ընդարձակ բակով, յանկարծ մէկը քաշեց հագուստիցս:

Ետ նայեցի, տեսնեմ՝ նոյն փոքրիկ ծանօթ դէմքը:

Սաստիկ յուզւած էր երեսում ու այտերը շառագոյն. լուս, աղերսական աչքերով նայում էր ինձ:

— Ի՞նչ է, սիրելիս, — հարցրի նրան:

— Ես ուզում եմ... — սկսեց նա ու կմկմաց:

— Ի՞նչ ես ուզում, ասա, — քաջալերում էի ես:

— Ուզում եմ... որ ինձ համբուրես...

— Քեզ համբուրեմ, — զարմացայ ես:

— Այստեղ ասաւ նա՝ աչքերը ցած գցելով ու կարօտի շեշտով. — Պեռ ինձ ոչ-ոք չի համբուրել, ոչ-ոք...

1) Պատմողը ինչու էր կարեկցում փոքրիկին:

2) Քեզ ամենից շատ ո՞վ է սիրում: Մտածի ինչ կը լինի քունքում, եթէ քեզ ամենից շատ սիրողները չըլինէին աշխարհիս երեսին:

16. Մայրը

Սենեակի միջին
կանթեղն է ցոլում.
գազագած քամին
դռանն է սուլում:

Ընքուն մայրիկը
ընկած զոյգ ծնկան՝
օրօր է ասում,
օրօրում մանկան:

— Է՞հ, հերիք, հերիք,
քամի ու մըրիկ,
հանգիստ, չինարներ,
քամու քնարներ:

Ա՛խ, դուք լոեցէք,
մայրն է զեղզեղում.
թողէք՝ մանկիկս
ննջի իր տեղում:

Էլ մի որոտայ
դու, ահեղ որոտ,
իմ անուշ բալէն
քնի է կարօտ.

Հեռացէք, ամպեր,
ամպեր բքածին,
հանգիստ քուն տւէք
սրտիս սիրածին:

Քնիր, բալիկս,
աղօթքավ քո մօր.
քամի և որոտ
կը լոեն, օրօր:

Վաղը կը տեսնեն
աչքերդ կրկին
և սէր, և գգւանք,
և պայծառ երկին:

17. Եղերուն

ա.

Մի տարի սարումն էի (պատմում էր Օվակիմ թիձէն): Եկան, լուր բերին թէ՝ թոռդ հիւանդացել է, քեզ ուզում է, արի. Սարիցը վեր կացայ, տուն եմ գալի: Ճամփին ծուեցի, ասի՝ կարելի է որսից բանից պատահի. Ման եկայ ման, մի տեղ տեսնեմ՝ բրնուտումը մի բան խըշխըշնում է, թփերը ժաժ է տալի: Ախպէր, էս թէ մոշահաւ է՝ մոշահաւի բան չի, թէ անասուն է՝ ինչու չի երևում:

Մի քար գցեցի թփուտը, մին էլ տեսնեմ՝ մի պախրի ճուտի ականջներ ցցւեցին, էլ ետ ցածացան ու սկսեցին թփերը ժաժ տալ, ճամփայ բաց անել, որ փախչի: Հրացանը երեսս կալայ հէնց թփերի էն ժաժ եկող տեղը: Որ տրաքեց, սա վեր թռաւ, դուրս ընկաւ ու ետ գետնովը դիպաւ: Տղերը, հիմա մի ձայն է ածում, մի տնքում է, ոնց որ մեռնող երեխայ:

բ.

Ուստա որսկաններից լսել էի, ասի՝ սրա մէրը ինձ տեսել է, էստեղից փախել. որտեղ որ է, հիմի ետ կը գայ: Մտայ մի ծառի տակ, ճամփայ պահեցի: Շատ մնացի թէ քիչ, մին էլ տեսնեմ՝ եկաւ... բայց ոնց եկաւ՝ ես տեսայ, դուք ոչ տեսնէք... Մի խօսքով՝ մի մօր նման, հրացանի ձէնը իր երեխի վրա լսած մօր նման: Եկաւ տեսաւ՝ իր ճուտը անշունչ, արնակուլոր մի ծառի տակ փոււած: Տղերը, դունչը մեկնել է, ոնց է տխուր մզզացնում, ոնց է վէրը լիզում... Հրացանը վեր կալայ, էտտեղից քաշւեցի եկայ տուն:

Եկայ տուն, տեսայ՝ թոռս դժար է, հոգու հետ կոիւ է տալի, տնքում է: Էնպէս էն պախրի ճուտի նման է տնքում, որ աչքս խուփ եմ անում, կարծում եմ թէ գեռ էն թփի կողքին եմ կանգնած: Վերջապէս, երեխէն մեռաւ, մէրն ընկել է վրէն, բառանչում է... Ասում եմ, փառք շատ լինի, Աստւած. Բնչ է մեր ու էն սարի պախրի զանազանութիւնը: Ոչինչ ամենի սիրտն էլ սիրտ է, ամենի ցաւն էլ ցաւ...

30

18. Կոռնկն ու սազր

Կապուտակ լճի ջրի երեսին,
ճարպիկ ու արագ սագիկն էր լողում,
սուրում ջրի տակ, դուրս զալիս կրկին
ու ինքն իրան բարձրաձայն գովում.

— «Օդում թռչում եմ, ցամաքում շրջում,
լճակի ջուրը պատռում նետի պէս.

Ինձ պէս ուրիշը չըկայ աշխարհում,
ողջ թռչունների թագաւորն եմ ես»:

— Իզուր ես գովում, յիմար, ինքդ քեզ,
կոռւնկը նրան ձայնեց վերեկից.

Կարսղ ես արդեօք լողալ ձկան պէս,
եղնիկի նման վազել քարափից,
արծըւի նման հապատ, փառաւոր
կարսղ ես պատռել ծալքերն ամպերի...
Լաւ է գիտենաս մի բան հիմնաւոր,
քան թէ շատ բաներ, բոլորն էլ թերի...

19. Պառաւի կատուն

ա.

Միշտ միասին էին, պառաւ Շողերն ու իր սև ահագին կատուն:

Երբ պառաւ Շողերը տունն էր հաւաքում, կերակուր եփում կամ նստում գուլպայ գործելու՝ միշտ կողքին էր և կատուն: Պառաւը նրան էր զանգատւում իր ցաւերը, թէ ինչպէս՝ էլ կարգին ման գալ չի կարողանում, թէ ինչպէս մատները գողում են գուլպայ գործելիս: Կատուն մոռում էր, ճկուն մէջը ուղցնում ու քսւում պառաւի ոտներին ու ծնկներին:

Երբ պառաւ Շողերը անց էր կենում փողոցով, կատուն իսկի մի քայլ ետ չէր մնում նրա խունացած շրջազգեստի փեշից ու պոչը վեր ցցած՝ հանգիստ հետեւում էր իր տիրուհու դանդաղ քայլւածքին: Դրացի տղերը նրան տեսնելիս՝ զեռ հեռւից կանչում էին կէս լուրջ, կէս ծաղրով.

31

—Ճամփայ, ճամփայ տւէք Շողեր ու Փիսօ խաթուններին։
Իսկ երբ մթնում էր ու աղքատիկ տնակի մէջ հանգչում
էր աղօտ ճրագը, ցած ու խարխուլ պատուհանի արանքից
պարզ լսւում էր կատւի մռմռոցը պառաւ Շողերի խռմփոցի
հետ։ Երկուսն էլ պառկում էին միենոյն անկողնում։ ձմեռ-
ները մանաւանդ կատուն էր պառաւի մըսկան ոտների տա-
քացնողը։

բ.

Այսպէս անբաժան ապրում էին նրանք շատ տարիներ։
Պառաւ Շողերի մէջքը աւելի ու աւելի էր կոանում. կատւի
աչքերի լոյսը աւելի ու աւելի էր մարում և բուրդը թափուում։

Մի օր էլ հարեանները տեսան,
որ պառաւ Շողերը նստել է
տնակի առջև ու դառն լալիս է.
Նրա ծնկանը ձգւել պառկել էր
կատուն... սատկած։

Դրացիներից շատերը կային,
նայում էին ու ժպտում. ահա-
գին կինը լաց էր լինում կատ-
ւի վրա։

Այն, պառաւ Շողերը լաց էր
լինում ու կամաց, շրթունքնե-
րի մէջ, կրկնում էր անընդհատ։

«Էլ պրծաւ, էլ հիմա ոչոք
չունեմ այս աշխարհում. գնա-
ցին որդիս, հարսս, թոռներս,
հիմի էլ կատուն, որին այնքան սիրում էին թոռնիկներս. մնա-
ցի մենակ, բոլորովին մենակ այս աշխարհում»...

Կրկնում էր պառաւը կամաց, շրթունքների մէջ, ու ան-
մխիթար հեկեկում...»

Ինչո՞ւ պառաւք այդպէս սիրում էր իր կատին։

32



20. Աղւէար

Աղւէսն եկաւ մութ անտառից,
հարցմունք արաւ լիբը թառից.
«Մեծ խորոզ է հարկաւոր ինձ»:
Քաղցած աղւէսն, ագին ծաղիկ։

Աղւէսն հագել բուրքը դեղին,
պտուտ կը գայ շուրջը գեղին.
Չուր կը տրրւեց տատիս լեղին։
Դեղին աղւէսն, ագին ծաղիկ։



Աղւէսն ասաւ պառաւ տատին.
«Մըտիկ չեմ տայ ձեռիդ փէտին,
կարօտել եմ թըմփլիկ ճուտին»:
Անվախ աղւէսն, ագին ծաղիկ։

Աղւէսն եկել նըստել գէղին,
երկար ագին ծըռել վըզին,
աչք է գըցել մեր խորոզին,
էս գող աղւէսն, ագին ծաղիկ։

3

33

Մին էլ կանչեց տատը պառաւ.
«Աման, հասէք, տարաւ, կերաւ,
գըլխիս էս ինչ փորձանք բերաւ
անտէր աղւէսն, ագին ծաղիկ:

Այ իմ խորոզ, կարմիր խորոզ,
ման կը գայիր գոռոզ-գոռոզ,
փետուրդ արաւ ողջ գարուփոս
էս չար աղւէսն, ագին ծաղիկ:

Աղւէս, աղւէս, փոքրիկ գազան.
ոտներդ կարճ ու խիստ գազան.
շըներն ամեն քեզ չըհասան,
ձարպիկ աղւէս, ագին ծաղիկ».

21. Վայրենին ու նաևակը ա.

Եւրոպացիք ագարակներ էին շինել վայրենիների աշխար-
հում ու իրանց մօտ ծառայեցնում էին սեամորթ տեղացինե-
րին. Մի ագարակատէր իր բարեկամին, որ ապրում էր հեռա-
ւոր կալւածքում, նւէր է ուղարկում մի զամբիւղ նարինջ ու
նամակի հետ տալիս է վայրենու ձեռքը. Ճամփին վայրենին
չի համբերում ու նարինջներից մի քանիսը ուտում է. Պարոնը
զամբիւղը ստանում է թէ չէ, նամակը կարգում է ու նա-
րինջները համարում:

—Այստեղ հինգը պակաս է. ճամփին կերել ես,—ասում է
նա խիստ ձայնով բերող վայրենուն:

—Ո՞րտեղից իմացար,—ապշած նայում է վայրենին:

—Այ այս թուղթն է ասում:

—Այդ սպիտամկը...

Վայրենին խլում է նամակը, մօտեցնում ականջին, բիշ
սպասում ու տարակուսանքով գցում գետին:

—Բաս ինձ ոչինչ չի ասում:

Ծի քանի ամիս անց՝ տէրը կրկին նոյն վայրենուն տալիս
է մի քանի շիշ գինի ու նամակ և հրամայում է տանի իր բա-
րեկամին: Ճամփին վայրենինուզում է անպատճառ գինու համը
տեսնի, բայց վախենում է ձեռքի բռնած «սպիտակից» վայ
թէ նորից իմաց տայ. Բայց յանկարծ ուրախ վեր է թռչում.
Հնարքը գտել էր.

Հէնց որ համնում է մի ամայի տեղ, հանում է նամակը,
կոխում մի մեծ քարի տակ, չորս բոլորն էլ ածում է չորա-
ցած տերեներ, որ նամակը ոչ մի ծակից դուրս չը նայի. իսկ
ինքը վեր է կենում, բաւական հեռանում, մի թփի տակ ցած
է դնում իր բեռը, հանում մի շիշ ու փառաւոր անուշ անում...
Թէ վեր չաղանում է, երգում, պարում, յետոյ էլ պառկում, մի
լաւ քնում:

Թունն էլ որ առնում է, վեր է թռչում, վերցնում է զամ-
բիւղը, հանում է քարի տակից նամակը ու շարունակում
ճամփան ուղիղ իր տիրոջ բարեկամի ագարակը. «Դէ, հիմի
թող ասի, տեսնեմ՝ ինչ պիտի ասի», —մտածում է վայրենին
ու իրեն իրեն ժպտում:

գ.

Տեղ հասնելուն պէս պարոնը նամակը կարգում է, հաշ-
ուում է շիշերը ու բարկացած աղաղակում է վայրենու վրա.

—Սպիտակ գինուց մի շիշ խմել ես նորից, անսպիտան:

Վայրենին լսում է թէ չէ, թողնում է փախչում: Ու այն
օրից սարսափահար պատմում է իր ցեղի մարդկանց, թէ ինչ-
պէս սպիտակամորթները մի տեսակ ճերմակ կաշու պէս բան
ունեն, որ ամեն ինչ տեսնում է, ամեն ինչ լսում, ամեն ինչ
իմանում և սպիտակամորթներին պատմում, իսկ սեամորթ-
ներին ոչինչ չի տառած:

1) Եւրոպացիք միշտ են զիր ունեցել: Ի՞նչ ըան է զիրը:

2) Ի՞նչն է ստիպել մարդկանց, որ զիր հնարեն:

3) Թղթի հետ խօսող եւրոպացին ի՞նչ պիտի թայ վայրենու աչքին:

22. Ժամանակը

«Թիկ-թակ, թիկ-թակ»: Ո՞վ է այդ:

«Ժամանակն է, գնում է.

Նրա ոտքի ձայնն է այդ,

թիկ-թակ, թիկ թակ,

որ լըսւում է շարունակ»:

—Ժամանակը, ո՞վ է այդ:

«Յուպը ձեռին մի խուլ մարդ,

շալակն առած մի մեծ պարկ,

թիկ-թակ, թիկ-թակ,

որ գընում է շարունակ»:

23. Քարը

ա.

Տիգրանը այդ օրը շատ ուրախ էր: Ուրախութիւնից չէր
իմանում ինչ անի: Իջել էր պարտէզ ու քարեր էր շպրտում
ճնճղուկների վրա: Թէև ոչ մէկին էլ չըդիպաւ, բայց խեղճ
ծտերը շատ էին վախենում և նրա ձեռքի ամեն շարժումից
վեր էին թռչում ծառի ճիւղերից, նստում էին տանիքի վրա
ու նորից իջնում ցանկապատին: Նրանց այդ վախեցած թռչ-
կոտելը շատ էր զւարճացնում Տիգրանին:

Այդպէս ճնճղուկների ետևից ընկած միջոցին յանկարծ
նկատեց, որ դարպասի առջև մի աղջիկ էր կանգնած՝ կարճ,
պատոտած շորերը հագին ու ոտարորիկ: Նրա մազերը խիտ-
խիտ փունջերով թափւում էին կեղտոտ ճակատին, այտերին
և ուսերին:

—Աղա, քեզ մատաղ... — կամացուկ ու երկչոտ ձայնով
կըմկըմաց աղջիկը:


Տիգրանը հէնց այն է ուզում էր քարը նետի ճնճղուկնե-
րին, կանգ առաւ ու մօտեցաւ աղջկան:

—Դու աղքան ես, — հարցրեց նա, ձեռքով ճակատի քըր-
տինքը սրբելով:

—Այն... աղքան եմ... խեղճ եմ... Պստիկ աղա, մի ողոր-
մութիւն արա, — կրկնեց աղջիկը:

Տիգրանը հետաքրքրութեամբ նայում էր նրան:

Աղջիկը այնպէս տգեղ էր, այնպէս փոքր, նիհար, այնպէս
արկից սեացած: Նրա մեծ, ներս ընկած աչքերի մէջ և ամ-



բողջ դէմքի վրա մի հիւանդոտ, ողորմելի բան կար:

—Դու հաց ես ուզում, հա, — հարցրեց նա, քարը իր բուան
մէջ ամուր սեղմելով: — Աղա, ձեռքդ պահի:

Աղջիկը վստահ պարզեց իր փոքրիկ, չորացած ձեռքը:

—Ա՛ռ, — ասաւ գիծ տղան և նրա ափը զրաւ գեղին քարի
կտորը:

Աղջիկը բարը դէն չը նետեց և ոչինչ էլ չասաւ. նայեց քարին, յետոյ արտասւալից աչքերը բարձրացրեց Տիգրանի վրա ու գլուխը կախած դուրս գնաց փողոց։

Ոչ մի խօսքով, ոչ մի շարժումով, ոչ մի հայեացքով նա չըկշտամբեց Տիգրանին. բայց Տիգրանի ուրախութիւնը յանկարծ չքացաւ, դէմքը մոայլեց. Ի՞նչ էր պատահել, ինչու Արկը առաջւայ պէս պայծառ էր, երկինքը առաջւայ պէս Արկը առաջւայ պէս պայծառ էր, երկինքը առաջւայ պէս Արկը առաջւայ պէս պայծառ էր, երկինքը առաջւայ պէս թռչկոտում էին և ճըլւում, բայց Տիգրանը էլ ոչինչ չէր տեսնում։

Յանկարծ վազեց խոհանոց, ինքն իր ձեռքով կտրեց մի մեծ կտոր հաց և դուրս նետեց դարպասից. Նայեց աջ, նայեց ձախ, աղջիկը չէր երկում, գնացել էր. Տիգրանը վազեց փողոց, նայեց մէկի, միւսի բակը, — չըկար…

Տիգրանը վերադարձաւ իրենց բակը և հացը ձեռքին կըրթնեց դարպասի անկիւնին։

Կարծես մի բան ծանր նստել էր նրա կրծքին. Ա՛խ, Աստւած, գուցէ այսպէս ծանր չըլինէր, եթէ աղջիկը ետ շպըւած, տած լինէր բարը, եթէ հայհոյած, մի բան ասած լինէր. Բայց տած լինէր բարը, եթէ հայհոյած, մի բան ասած լինէր. Բայց աղքատ աղջիկը արտասւալի աչքերով նայել էր նրան ու լուռ գնացել. ուրիշ ոչինչ։

Նրանցից յետոյ ամեն անզամ աղքատի ձայն լսելիս սեղմւում էր Տիգրանի սիրտը, դուրս էր նետում, որ տեսնի կտրելի է այն աղջիկն է.

Ո՞չ. այն աղջկան էլ երբէք չըտեսաւ. Աղջիկը անհետ չըացել էր, տանելով իր հետ գեղին բարը. կորել էր, կարծես իսկի աշխարհիս երեսին ծնւած էլ չըլինէր…

1) Ի՞նչու յանկարծ կորաւ Տիգրանի ուրախութիւնը.

2) Վախտ տղայ է Տիգրանը. որն է նրա մեծ թերութիւնը.

24. Տատս

ա.

Կարծես տարիներ չեն անցել, կարծես հէնց երէկ լինէր. Ես տեսնում եմ իմ պառաւ տատին, նստած իր սովորական տեղում, մեր խրճիթի դռան դէմ. Վիթխարի ընկուզենին պատըսպարում է նրա ալեոր գլուխը ամառային արեգակի կրակոտ ճառագայթներից. Նա նստած է, ինչպէս միշտ, լուռ ու մտախոն։

Տատս կոչւում էր Շուշան. Նա ժառանգել էր իր մօր անունը. Զընայելով պատկառելի տարիքին, ամեննին չէր կորցրել իր ժրութիւնը. առաւօտից մինչև երեկոյ անդադար շարժման մէջ էր. Նրա ամենատես աչքերը ամեն բան կընկատէին, նրա անհանգիստ լեզուն ամեն բանի մասին հաշիւ կը պահանջէր. Մինչև մահը նա չըթողեց ձեռքից իր կառավարութեան գաւազանը, ահազին փայտէ շերեփը, որով նա ընթրիքի ու ճաշի ժամանակ կերպակուր էր բաժանում. Մինչև իր մահը մեր տան թէ մեծը և թէ փոքրը ամենայն խօնարհութեամբ հպատակում էինք նրա հեղինակութեանը։

Տատս շատ աշխատասէր կին էր. Ցիշում եմ, գիշերւայ մեծ մասը, նստած այծի մորթու վրա, զնում էր իր առջև մանելու մեքենան և ոսկրացած ձեռքեվ պտոյտ էր տալիս ճախարակի թել, բամբակից թել էր պատրաստում. Եւ ինձ թւում է՝ թէ զեռ զարկում է ականջիս պառաւի տիսուր ու դողդոջուն երգը, ինձ թւում է՝ թէ զեռ լսում եմ նրա նահապետական մեքենայի խուլ ճռճողը։

բ.

Մեր գիւղում տատս համարւում էր խելացի պառաւներից մէկը, իսկ իր տան մէջ նրա իմաստութիւնը հասնում էր անսխալականութեան. Ճշմարիտն ասած՝ ես էլ փոքր ժամանակս հիացած էի նրա իմաստութիւնով. Նա ամեն բան գիտէր. Նա գիտէր՝ թէ ինչ նշանակութիւն ունեն այս ու այն

երազները։ Նա գիտէր՝ թէ ինչ խորհուրդ ունի, երբ մարդու մարմին այս կամ այն մասը «խաղում է»։ Նա հասկանում էր կաշաղակի լեզուն և բացատրում էր, թէ ինչ լաւ լուրեր է բերում նա, երբ մեր պատի վրա նստած կըշկըչում է։ Նա լսել չէր կարող բուի չարագուշակ ձայնը և պատւիրում էր ինձ քարով սպանեմ, երբ նստի մեր պատին։ Նա գիտէր՝ թէ ինչու Սողոմոն իմաստունը անիծեց ճնճղուկներին, կամ ով դրեց յոպոպի գլխին այն գեղեցիկ փետուրէ սանրը։

Այս, տատս շատ բան էր իմանում։ Նա պատմում էր ինձ՝ թէ ինչպէս կը հասնի աշխարհի վերջը, կամ երբ կը յայտնւի Նեռը։ Նա ասում էր, թէ անիծւած Նեռը կըդայ մի ահագին էշի վրա նստած, թէ նրա աւանակի ականջները այնքան երկար կըլինեն, որ մի ականջի ծայրը կը հասնի մինչև արեմուտք, իսկ միւսինը մինչև արևելք։ Նա ասում էր՝ թէ այն ժամանակ կըյայտնւեն «աջուջ մաջուջները», թէ նրանք այնքան փոքրիկ թզուկներ են, որ իմ կօշիկները կարող էին նրանց համար բնակարան դառնալ։

Բայց ես աւելի սիրում էի տատիս հեքիաթները, որ գիշերները պատմում էր։ Երբեմն մի անգամ սկսած հեքիաթը հազիւ վերջանում էր մի ամբողջ շաբաթւայ ընթացքում։ Այս, ինչ լաւ պատմում էր նա. ես միշտ ուրախութեամբ էի լսում։ Բայց երբ պատմում էր դկերի, սատանաների, գրողների ու դժոխքի մասին՝ ես սարսափում էի, և աւելի շատ էի վախենում, երբ խօսում էր մեռելների մասին։

Իսկ երբ տատս ինքը մեռաւ, նրանից չէի վախենում։ Նա այնպէս հանգիստ պառկած էր դագաղի մէջ, կարծես ընած լինէր։ Նրա դէմքը էլի այնպէս բարի էր, ինչպէս միշտ։ Երբ նրան թաղեցին, ես շատ լաց եղայ։

1) Պատրիու ինչո՞ւ մեծ ժամանակ էլ հիացած չէ իր տատի իւստութիւնով։

2) Այդ տեսակ իմաստութեան մենք ի՞նչ անուն ենք տալիս, եւ ինչո՞ւ։



25. Մկների ժողովը

Սով է, սով է Մկաստան,
կատւի ձեռքից լգստան։
Գզիրն ընկաւ դոնէ դուռ,
գիւղամէջը շուռ ու մուռ.
Էլ ըլթողեց դուռ-կտուր,
ջահել, ահեղ գեղովի,
ջոջերին ջոկ, տեղովի
կանչեց բերեց ժողովի,
թէ ինչ անեն որ կատւէն
մի հնարքով ազատւեն.

Եկան գիւղի ջոջերը,
երկար բարակ պոչերը,
մասնակցեցին խորհրդին։
Մի ջոջ խօսեց իր հերթին.
«Լսէք, մկներ ցեղակից,
չունեմ որդի, կողակից.
Ես մի անտէր ծերուկ եմ,
բայց պատւաւոր մի մուկ եմ։
Պակսեց ուժը իմ ոտի,
պէտք է մեռնեմ անօթի։
Էլ չեմ կրծի չորթանը,
Էլ չեմ ծըծի ես թանը.
մահս է կանգնել գոանը,
սով է դրկել Մոռանը։
Այս, Մոռանը, մոռանը,

վէր է ընկնում մառանը՝
հէչ նման չի գագանի.
ինչքան ասես նազ անի,
ստից սատկի, տազ անի,
մեզի տեսնի, վազ անի,
գլխից բռնի, կախ անի,
թաթովը տայ, խաղ անի,
ուտի, բէֆը չաղ անի։
Էսպէս զուլում ու կրակ...
զեռ աչքերն էլ ջուխտ ճրագ,
Բայց թէ ազնիւ մեր ցեղը
կորչելու չի զուր տեղը.
ցաւն էլ ունի իր գեղը։
Ոյ բերել եմ
ես մի զանգ.
ծափ-ծրնգոց,
մէջը զընգոց.
մենք կախ տանք
կատւի վզից,
որ ինչքան էլ օրօրայ,
որ ինչքան էլ շորորայ,
ստից սատկի,
տազ անի,
գալն իմանանք
զազանի։
է. զանգը ով կախ անի։

—Ալօ, դու:
«Ալծն տանի»:
—Բալօ, դու:
«Բալծն կախէ»:
—Չալօ, դու:
«Չալօն կաղ է»:
—Մստօ, դու:
«Մստօն կարձ է»:
—Փոստօ, դու:
«Էտ էլ խի՞ղճ է»:
—Համբօ, դու:
«Ես տկար եմ»:
—Չամբօ, դու:
«Ես տանտէր եմ»:
—«Սադօ, դու:

«Ասենք տարայ».
բա որ կատուն
գայ ինձ վրա»:
—Բտօն, Խտօն թող մէկից
բռնեն կատւին քամակից:
«Ի՞նչ է խօսում չոր գանգը».
լաւ է դու տար էտ զանգը.
էլ ի՞նչ Բտօ, ի՞նչ ֆստան»,
ճստաց Բտօն ճսճստան:
—Լոփ, յանդուգ,
կոտորւէք դուք.
վախկոտներիդ ես թաղեմ.
ճառ ասեմ թէ զանգ կախեմ,—
գոչեց ջոջը,
բաշեց պոչը:

26. Տատիկը

—Տատիկ, ինչի՞ցն է, որ քո մազերն այդպէս սպիտակ են.
—Չմեռն է, տղաս, տարիների ձիւնն է այդ.
—Տատիկ, ինչի՞ցն է, որ ճակտիդ վրա խոր ակօսներ կան.
—Վիշտն է փորել բոլոր այս խոր ակօսները.
—Տատիկ, նվ է քո գլուխն այդպէս շարժում.
—Դա մի հով է, որ երկնքից է գալիս. մահս մօտ է,
թռռնիկս:
—Ինչի՞ցն է, որ քո աչքերը պղտորւել են, տատիկ ջան.
—Շատ դառն արտասուք թափելուց է:
—Ինչի՞ համար այդպէս ցած, կռացած ես պահում քո
ճակատը.
—Որ լաւ նշմարեմ այն հողը, ուր իմ ոսկորներն են շու-
տով հանգստանալու:
—Եւ ի՞նչ ես մրմնջում միշտ, սիրելի տատիկ, երբ թոռ-
սիկդ քեզ գրկում է:
—Քեզ նոր կեանքի բարի լոյս, իմ անգինս:



27. Ճախարակ

Մանի, մանի, ճախարակ,
նըստենք բանի, ճախարակ,
անտէրին տէր, ճախարակ,
որբերին հէր, ճախարակ:

Լուսնեակը դուրս է եկել,
աչքերիս լոյս է եկել.
Լուսնի լոյսով մանեմ ես,
սպիտակ ոստեր անեմ ես,
աղքատ օրով ու լացով
որբեր պահեմ մանածով:

Մանի, մանի, ճախարակ,
նըստենք բանի, ճախարակ,
անտէրին տէր, ճախարակ,
որբերին հէր, ճախարակ:

- 1) Ինչո՞ւ այրի կինը լուսնի լոյսով է մանում, եւ ինչիւոչ ցերեկը:
- 2) Ինչո՞ւ աշխատանքի գործիքը անտէրի տէրն է ու որբի հէրը:

28. Ամենալաւ վկայականը

Մի վաճառական լրագիրներում յայտարարել էր, թէ իր խանութի համար ուզում է մի աշակերտ վարձի:

Շատ մարդ եկաւ գնաց, վերջապէս վաճառականը ընտրեց մէկին:

— Ասա, ինդրեմ, հարցրեց մի ծանօթ,—ինչու դրան ընտրեցիր: Ոչ վկայական ունէր, ոչ էլ ճանաչում էիր: Ուրիշները հրաշալի վկայականներ բերին, բայց դու ճամփու դրիր:

— Սխալւում ես,—ասաւ վաճառականը: — Այս տղան շատ վկայականներ ունէր: Սենեակը մտնելուց առաջ ոտները լաւ սրբեց ու դուռը ծածկեց առանց թշրիսկացնելու. ուրեմն մաքրասէր է ու կարգապահ: Իր նստած աթոռից վեր կացաւ ու տեղ տւաւ ներս մտնող կաղ մարդուն. ուրեմն քարեսիրտ է ու յարգում է աւելի հասակաւորին: Դեռ շէմքին գլխարկը հանեց, արագ ու կտրուկ պատասխաններ էր տալիս իմ հարցերին. ուրեմն քաղաքավարի է ու աչքաբաց: Կուացաւ, բարձրացրեց գիրքը, որ դիտմամբ ձգել էի յատակին, մինչդեռ ուրիշները գէմ էին ընկնում գրքին կամ կողքից անցնում: Հանգիստ սպասում էր իր հերթին, չաշխատելով ուրիշների առաջը կտրի: Ուրեմն լաւ կրթւած տղայ է: Շորերը լաւ սրբւած էին, իսկ երեսն ու ձեռքերը մաքուր: Ի՞նչ ես կարծում, այս բոլորը միասին լաւագոյն վկայականը չի:

Ուրեմն ո՞րն է մարդու ամենալաւ վկայականը:

29. Ճպուռն ու մրջիւնը

Թըսի-վըռի մի ճպուռ
ողջ ամառը շուռ ու մուռ
երգեց, ճռաց,
ճըռճըռաց:
Մին էլ, ըհը՝ ձմեռը
փոեց իրա թիերը,



բացեց գորգը սպիտակ,
դաշտերն առաւ ձիւնի տակ:
Անցան պայծառ օրերը,
էլ որն ասեմ, էլ որը,
երբ ամեն մի թփի տակ
թէ սեղան կար թէ օթեակ:
Եկան օրեր ցրտաշունչ,
ճպուռն ընկաւ լուռ ու մունջ.
Քաղցած փորին էլ ի՞նչ երգ:
ցուրտը տարաւ ոտ ու ձեռք:
Զընզը-զընզը դողալով,
ծանը ծանը սողալով,
նա մրջիւնին ասում էր.
«Գլխիդ մատաղ, սանամէր,
մի ճար արա՛ շունչ առնեմ,
ցրտից սովից շը մեռնեմ:
Կերակրի, տաքացնւը,
մինչև գարուն ապրեցնւը»:
— Ի՞նչ խաբար է, սանիկը,
զարմանում եմ, ջանիկս.
չաշխատեցի՞լ ամառ,
ասա, ի՞նչ էր պատճառը:
— Էտպէս բանի, սանամէր,
էլ ժամանակ ով ունէր:
Էն խոտերում բուրաւէտ
երգում էինք մերոնց հետ:
«Ուրեմն դու...»— Այս, ես
ողջ ամառը դէն ու դէս
երգ երգեցի մշտապէս:
— Երգեցիր, հա: շատ բարի:
այժմ էլ բռնի վերվերի,
քամին ծափ տայ՝ գու պարի:

30. Բէզակի լապտերը

ա.

Կատարինէ Բէզակը ապրում էր ծովեզերքի մօտ մի բլրի վրա: Նա այրի կին էր և անզաւակ: Բէզակը վարում էր առանձնացած կեանք և պէտք է շատ աշխատէր, որ իր աղքատիկ գոյութիւնը մի կերպ պահպանէր:

Մի գիշեր, երբ ոռնալով փչում էր քամին և ալիքները բախում էին բլրի ժայռերին, Բէզակը իր գործին նստած, ինքն իրան ասում էր.

—Մենակ եմ այստեղ մէկը չունեմ, որ իմ մասին մտածէր, մէկը չունեմ, որի մասին ինքս էլ մտածէի... Ում համար եմ ապրում...

Յանկարծ նա յիշեց, թէ ինչըան նաւեր խորտակւելու են այդ փոթորկալից գիշերը ծովափին, ոչ հեռու իր տնակից. մի փարոս չրկար այդտեղ, որ փրկէր նրանց վտանգից, թանձր խաւարի մէջ:

—Ինչու մի վառ լապտեր չըպահեմ ամեն գիշեր իմ պատուհանում: Թող նաւորդները տեսնեն այդ ճրագը և իմանա, որ մօտենում են ծովափի ժայռերին:

Այրու սիրտը այս մտքից անհուն ուրախութիւնով լցւեց: Նա սկսեց հաշւել ու գտաւ, որ ինքը եթէ ամեն գիշեր մի ժամ աւելի աշխատի, պիտի կարողանայ այնքան վաստակել, որ բաւական կըլինի լապտերի նաւթը գնելու համար:

Նա աւելի ոգեսրւած սկսեց աշխատել: Մի շաբաթից յետոյ նա գնեց մի աժան լապտեր ու տեղաւորեց իր պատուհանում:

բ.

Այդ օրւանից ամեն գիշեր, մթնում էր թէ չէ, Բէզակի տնակից պսպղում էր լոյսը և ճամփայցոյց տալիս նաւորդներին: Հարկանները հարցնում էին.

—Բէզակ մայրիկ, այդ հիմն ես սպասում, որ ամեն գիշեր պատուհանում լապտեր ես վառում:

Նա, բարի ժպիտը դէմքին, ցոյց էր տալիս հեռուն, տարածւող լայն արձակ ծովն ու շշնջում,

—Իմ եղբայրներին, սիրելիներս, իմ եղբայրներին...

46

Եւ երբ կատաղի մըրիկը ծառացնում էր ահագին ալիքներն ու նաւը շպրտում վեր ու վար, նաւի ուղեցոյցը տեսնում էր բլրի գագաթին փայլող լոյսն ու կանչում.

—Տեսէր, Բէզակի ճրագն է վառւում այնտեղ: Զգնյաց ժայռեր են այստեղ:

Շատ տարիներ վառւեց այդ լապտերը Բէզակ մայրիկի պառուհանում: Օրէցօր աւելի ու աւելի էր կռանում պառաւի մէջքը, աւելի ու աւելի ցած էր նայում նրա ճերմակած գլուխը, աւելի ու աւելի էին դողում նրա չորացած ձեռները, բայց նրա լապտերը շարունակ դեռ վառւում էր...

Եւ երբ մի առաւօտ նրան մեռած գտան, ողջ գիւղը հաւաքւեց նրան թաղելու: Գերեզման իջեցնելիս, երբ արդէն նա յաւիտեան պիտի ծածկւէր մարդկանց աչքերից, քահանան յանկարծ բացականչեց.

—Մնաս բարով, Կատարինէ քուրիկ, էլ ով պիտի վառի քո լապտերը, էլ ում ճրագը պիտի ճամփայց ցոյց տայ խաւարի մէջ նաւորդին:

Ամեն կողմից կանչեցին՝ «Մենք, տէր հայր, մենք»:

Մինչև այսօր էլ այն բլրի գագաթին, բարձր շինութեան գլխին, գիշերւայ մթնում վառւում է լապտերը, Բէզակի լապտերը: Մինչև այսօր էլ նաւորդը հեռուից նկատելով լապտերի ճրագը՝ կանչում է.

—Տեսէր, Բէզակի ճրագն է վառւում այնտեղ: Զգնյաց ժայռեր են այստեղ:

Ովքեր են Բէզակի «եղբայրները»:



47

31. Ջաղացպանի երգը

Զուրն է թշում,
Հուրն է խշում.
ու ջաղացում
ալեկոծում,
իրարանցում.
և կարծես թէ
հազար կանայք
լաց հն լինում
ու հեծեծում.
Երեք չորս հատ
ջաղացաքար
իրենց անդուլ
չախչախներով
պըտըտում են
հա անդադար:

*
Դուրսը,
ներսը
հարայ-հրոց,
սայլի ճռինչ,
բարի գրոռոց:
Մինը բեռը
ներս է կրում,
մինը նըրան
դուրս է բերում.
մինն աղունը
վրա անում,
ցորեն տալիս
ալիւր հանում:

*
Տես և մի կողմ
ջաղացպանը
ալրաթաթախ
ալրատանը,

քարը տեղից
իջեցրած,
նրա տակը
վրէն արած
հա տալիս է
քարին մուրճը
և կայծեր է
թափում շուրջը,
և ծնկները
քարի վրա՝
նա երգում է
երգը իրա.

*
«Արի, իմ քար,
ջաղացաքար,
քեզ կըռանեմ,
խոր փոսիկներ,
սուր ատամներ
կուռ կըռանով,
ծանր մուրճով
լանջիդ հանեմ,
որ դու աղաս
բընաղունը,
բընաղունը,
չոր աղունը,
ալիւր, ալիւր
տաս աշխարհին,
և ծառային,
և արքային:
Աշխարհը լայն
մեր տեղը նեղ,
հալւենք, մաշւենք
մենք միատեղ:

քեզ կըռանեմ,
սուր ատամներ,
խոր փոսիկներ
կըրծքիդ հանեմ,
Ես քո տէրը,
Ես քո գերին,

արի հաց տանք
ողջ աշխարհին,
Աշխարհը լայն,
մեր տեղը նեղ,
հալւենք, մաշւենք
մենք միատեղ»:

Ինչո՞ւ է ասում՝ «Ես քո տէրը, Ես քո գերին»: Ճիշտ է:

32. Դեղձանիկն ու տատրակիկը

Դեղձանիկը մի թակարդում
զարնւում էր ու թըփըրտում:
Մի տատրակիկ՝
պուճուր ձագիկ՝
ծիծաղում էր նրա վրա:
«Բա ամօթ չէ,
ասում էր նա,
օր-ցերեկով
բաց-բաց աչքով
ընկար էտպէս

դու կոյրի պէս:
Ես լինէի,
չէի խարւի,
իմ արկը...»
Մին էլ, ըհը՛,
ոտն ու թեր
սընապանծը
զըցեց ցանցը:
Տեղն էր, տեղը էն տատրակին:
ինչո՞ւ ծաղրեց դեղձանիկին:

33. Հօր հիւանդապահը

ա.

Մի գիւղացի տղայ կանգնեց հիւանդանոցի դուանը, դոնապանին մի տոմսակ ցոյց տւաւ ու խնդրեց, որ թոյլ տան իրեն տեսնի հիւանդ հօրը:

—Ե՞րբ է եկել քո հայրը, —հարցրեց դոնապանը:

—Մի հինգ օր առաջ: Նա այստեղ քաղաքում մշակութիւն էր անում, հիւանդացել է ու եկել ձեզ մօտ: Մեզ իմաց տւին. Ես այժմ գալիս եմ գիւղից: Խնդրում եմ, ցոյց տւէք, որտեղ է:

—Հա, հա, իմացայ. պառկած է չորրորդ սրահում, ամենից վերջը, —ասաւ սպասաւրը: —Արի:

Ու ներս տարաւ տղային: Նախ գնում էին երկար միջանցքներով, յետոյ մտան մի մեծ սրահ ու անցան մահճա-

կաների շարքերի միջով։ Չորս կողմը մաշւած ու դեղնած դէմքեր էին. օդը լիքն էր գեղերի հոտով։ Սպիտակ հագած զթութեան քոյրերը մի հիւանդի մօտից անցնում էին միւսին։

— Ահա հայրդ, — ասաւ սպասաւորը, ցոյց տալով մահականերից մինչ։

Հիւանդի ձեռքը անշարժ ընկած էր վերմակի վրա։ Տղան բոնեց այդ ձեռքը ու հեկեկալով գլուխը խոնարհեց հօր ուսին։ «Ապի, ապի...» Հիւանդը շարժւեց, շուռ եկաւ, երկար նայեց տղային, կարծես թէ ճանաչեց, բայց ոչինչ չասաւ։

Խեղճ հայրիկ, ինչպէս փոխւել էր։ Մօրուքը երկարել, սպիտակել, երեսը ուռել, թխացել, աչքերը կուչ էին եկել, շրթունքները կախ ընկել։ Ուղղակի չէր կարելի նրան ճանաչել։

— Ապի, ապի, — կանչում էր տղան։ — Էս ես եմ, չես ճանաչում։ Յակոբն եմ, ըստ Յակոբը։ Գիւղիցն եմ եկել, մայրիկը ուղարկել է որ քեզ տեսնեմ։ Գոնէ մի խօսք ասա։

Հիւանդը լուռ նայեց, նայեց ու աչքերը խփեց։

Այդ միջոցին էր որ զանգը տւին ու մտաւ բժիշկը իր օգնականի հետ։ Հերթով նայեց հիւանդներին, վերջապէս մօտեցաւ Յակոբի հօրը։ Բոնեց հիւանդի զարկերակը, ճակատը շօշափեց ու մտածեց։

— Սա հիւանդի որդին է, նոր է եկել գիւղից, — բացատրեց զթութեան քոյրը,

— Ի՞նչպէս է հայրս, — հարցրեց տղան։

— Մի կախենայ, տղաս, — պատասխանեց բժիշկը։ — Դեռ տեսնենք. կը լաւանայ, եթէ լաւ խնամւի։

— Ես ինքս կը մնամ այստեղ, պարոն բժիշկ, ու կը խնամեմ, — պատասխանեց տղան։

Բժիշկը ժպտաց։

— Դու ի՞նչ կարող ես։

— Ի՞նչու չեմ կարող. Եւ վերջապէս հօրս ես այսպէս երեսի վրա մենակ չեմ թողնի, — ասաւ տղան վճռապէս։

Բժիշկը մի սուր հայեացքով չափեց նրան ոտից գլուխ, քիչ մտածեց ու ասաւ։

50

— Լաւ, հիւանդի սրտին գոնէ մխիթարանք կը լինի, երբ տեսնի որ դու մօտն ես։

Բ.

Տղան դարձաւ հիւանդապահ։ Ուղղում էր հօր բարձն ու վերմակը, ճանձերն էր քշում, տալիս էր գեղը որոշւած ժամերին և կատարում էր ճշտութեամբ այն ամենը, ինչ որ բժիշկն ու գլխութեան քոյրը պատւիրում էին. Գիշերներըն էլ ընում էր նրա կողքին, երկու աթոռի վրա։

Անցնում էին օրերը. հիւանդը մէկ լաւանում էր, մէկ վատանում. կարծես գիտակցութիւնը վրան էր,

բայց այնքան նւազած էր, որ ոչինչ չէր խօսում ու մեծ մտսով թմրած պառկած էր։

Այդ թմրութիւններից յետոյ, երբ հիւանդը աչքերը բաց էր անում, տղան թեքւում էր հօր վրա, խօսում էր, պատմում իրենց տնից, իրենց կեանքից, մօր մասին, քոյրերի մա-



սին, աշխատում էր ուրախացնի հօր սիրտը:

Եւ հիւանդը նայում էր, նայում ու լսում: Մի անգամ Յակոբին այնպէս թւաց, թէ հօր դէմքը ցնցւեց ու աչքերում արցունք փայլեցին: Կարծես ճիգ էր անում, որ շրթունքը շարժի, մի բան ասի...

Յաջորդ առաւօտը բժիշկը յայտնեց, որ հիւանդի գրութիւնը աւելի վատացել է: Յակոբի սիրտը սաստիկ կոտրւեց, բայց ամեն կերպ զսպում էր իրեն, որ հայրը ոչինչ չը նըկատի: Միւս կողմից իրեն այնպէս էր թւում, որ հիւանդը հիմա աւելի հաստատ էր նայում, աւելի ազդու ու քնքուշ. նա աւելի յաճախ փորձեր էր անում մի բան ասելու:

«Է՞հ, բժիշկը սխալւել է», իրեն յոյս էր տալիս տղան, բռնում էր հօր ձեռքն ու անդադար կրկնում.

—Հանգիստ եղիր, ապի ջան, հանգիստ եղիր: Այ, շուտով կառողջանաս, այստեղից կերթանք. կերթանք մայրիկի մօտ: Մայրիկը, Մարթան, Ծննան հիմի մեզ են սպասում. մի քիչ էլ համբերի, մի քիչ էլ...

գ.

Հիւանդը մրափում էր: Ու Յակոբը տիսուր ու տրտում, վախով, յոյսով ու չարչարւած հոգով նստել էր նրա կողքին, ձեռքերը կրծքին, գլուխը կախ արած: Յանկարծ կից սենեակի դռնից լսւեց մի ծանօթ ձայն, որ ասում էր.

—Մնաս-բարով, քուրիկ, շատ շնորհակալ եմ.

Զայնը շատ էր հարազատ: Տղան ետ նայեց. տեսաւ մի մարդ ահազին կապոցը կոնստակին, ետևիցն էլ գթութեան բոյրը:

—Յակոբ, —աղաղակեց մարդը ու վրա վագեց:

—Ապի, ապի, —պոռաց տղան ուրախութիւնից խեղդւելով ու ընկաւ հօր գիրկը:

Գթութեան քոյրը, սպասաւորները, բոլոր այնտեղ գըտնւողները մնացել էին ապշած:

—Որդի ջան, —խօսեց հայրը, —դու էստեղ ի՞նչ ես շինում:

52

Ես էնքան սպասեցի քեզ. մայրդ գրել էր, որ գալու ես:

—Ես հինգ օր է էստեղ եմ, ապի: Բայց, տես... էստեղ...

Ու մատով ցոյց տւաւ հիւանդը:

—Քեզ բերել են ուրիշի մօտ. էտ ի՞նչպէս է պատահել,— գլխի ընկաւ մարդը. քիչ մտածեց զարմացած ու աւելացրեց,— ինչ և է. դէհ, գնանք. ես արդէն հիւանդանոցից դուրս եմ գալիս: Աստւած իմ, ով կարող էր էս տեսակ բան երևակայել:

Յակոբը առանց հօրից պոկ գալու՝ կրկնում էր միայն.

—Որչափ ուրախ եմ, որչափ ուրախ եմ. այն ինչ սարսափելի օրեր էին:

—Դէ, գնանք, —կրկնեց հայրը: —Իրիկունը տանը կըլի-նենք. մայրդ հիմի անհանգիստ կըլինի:

Տղան շուռ եկաւ, նայեց հիւանդին, որ այդ րոպէին աշքերը բաց էր արել ու նմանապէս նրան էր նայում:

—Զէ, ապի: Տես այդ ծերունին. ես դրան հինգ օր խնամել եմ. ես քո տեղն էի դրել նրան. տես, ինչպէս ինձ էնայում. մեղք է. լաւ չէ, որ ես նրան մենակ թողնեմ: Ես գիտեմ՝ նա պիտի մեռնի: Ապի, թող ինձ նրա մօտ. թող մենակ չըմեռնի...

Մարդը մին նայեց որդուն, մին նայեց հիւանդին. դժւարանում էր վճռի:

—Ո՞վ է այդ մարդը, —հարցրեց նա:

—Քեզ պէս մի գիւղացի, —պատասխանեց բժշկի օգնականը, որ վրա էր հասել: —Նա էլ օտարական է ու քեզ հետ նոյն օրն է մտել հիւանդանոց: Ուշը վրան չէր, որ բերին:

—Մնա, Յակոբ, —վճռեց վերջապէս հայրը կարճ վարանումից յետոյ:

Մարդը գրկեց որդուն, կրկին-կրկին համբուրեց ու գնաց:

գ.

Յակոբը վերադարձաւ անկողնի մօտ և վերսկսեց իր հիւանդապահի պաշտօնը. էլ առաջւայ պէս սիրտը չէր ձըմլուում, էլ առաջւայ պէս ծածուկ լաց չէր լինում զիշերը, բայց դար-

53

ձեալ առաջւայ պէս սիրով ու համբերութեամբ խնամում էր
հիւանդին, ժպտում, խօսում.

Երկու օր էլ անցաւ: Հիւանդը քանի գնում վատանում՝
էր. դէմքը բոլորովին մթնել էր, շնչառութիւնը ծանրացել:
Երեկոյան բժիշկը յայտնեց, որ չի լուսացնի: Յակորը կրկնա-
պատկեց իր հոգատարութիւնը. Հիւանդն էլ չէր հեռացնում
իր աչքերը տղայի դէմքից. Ի՞նչ զգւանք, ի՞նչ գորով կար այդ
աչքերի մէջ... Այդ գիշերը տղան քուն չեղաւ:

Լուսաբացին հիւանդը յանկարծ աչքերը բաց արաւ ու
նորից նայեց տղային:

Տղան կուացաւ ու բռնեց հիւանդի ձեռքը,
—Չեռքս սեղմեց, —գոչեց յանկարծ ուրախացած:
Մօտ վազեց գթութեան քոյրը, նայեց, կամաց բռնեց տղա-
յի թէկից ու հեռացրեց անկողնից:
—Ինչու, —զարմացաւ տղան:

—Գնա, որդիս, քո սուրբ գործը վերջացաւ, —պատասխա-
նեց գթութեան քոյրը: —Գնա, բախտաւոր եղիր. դու արժանի
ես բախտաւոր լինելու.

Բժիշկը, օգնականը, ծառաները իսկոյն իրար ետևից եկան
ներս ու մօտեցան ծերունու անկողնին: Յակորը նոր գլխի
ընկաւ որ հիւանդը մեռել էր: Ու հեկեկալով կրկնում էր.
—Ապի, մնաս-բարով, ապի...

34. Յորմատէրև ու ջաղացպանը

ա.

Մէկը ցորեն տարաւ ջաղաց,
էտ ցորենից ալիւր աղաց.
Ջաղացպանն էլ բաղարջ եփեց,
թոնրից հանեց, մէջտեղ դրեց.
—Արի պատմենք մի-մի լաւ բան.
ումը լինի սուր, դուրեկան,

էս բաղարջը թող նա ուտի.
ու շընայենք դորդի, սուտի:

բ.

Ցորնատէրը՝ թէ ես ասեմ,
ջաղացպանը՝ թէ կըլսեմ:
—Մենք ունէինք մի մեծ աքլար,
որին ընկեր մի տեղ չըկար.
հերու էր թէ մէկէլ տարին՝
հայրս հեծաւ էտ աքլարին,
գընաց Լոռի, ցորեն բերի:
Ճանապարհին չի նկատում՝
մի գայլ ձիու կողն է ուտում.
գընում հէրըս ուռ է բերում
ու աքլարի կողը գործում,
լւանում է ու ջուր ածում,
նորից հեծնում է աքլարին,
ման է գալի կըլոր տարին
ու հազար փութ ցորեն բարձած,
ինքն էլ բեռան վրա նստած,
զալիս կանգնում է մեր դոան:
Մենք շինեցինք մի ելարան,
ելանք, հօրս ներքե բերինք,
բեռով ցորենն էլ ներս դրինք.
Էն ցորնիցն է, որ դու ահա
էս բաղարջն ես թիւել հիմա:

գ.

Ջաղացպանը՝ թէ ես ասեմ,
ցորնատէրը՝ թէ կըլսեմ:
—Մենք ունէինք մի մեղրաճանճ,
համ պող ունէր, համ էլ ականջ:

Մէկ օր ճանճը փախաւ տանից,
 հօրս պարապ արաւ բանից.
 Խեղճը գընաց, շատ ման եկաւ,
 բայց գիծ ճանճը էլ ձեռք չընկաւ.
 Վերջը հայրս դարձաւ գեղը,
 մօրիցս առաւ մեծ ասեղը,
 տարաւ տնկեց գոմի կտրան
 ու ջուխտ ոտով ելաւ վրան.
 մէկ էլ տեսաւ դաշտի միջին
 որ գութան են լծել ճանճին.
 Տուն տընովի դաշտ վազեցինք,
 ճանճին գութնից արձակեցինք
 ու տուն բերինք բըռնած պոչից,
 բըռնած գըժի ջուխտ ականջից:
 Բայց արի տես՝ մեր առիւծը,
 որ չէր տեսած գոմշի լուծը,
 տըրորել էր իրա ուսը.
 հայրս բաշեց իր դըմբուզը,
 ջարդեց մի մաղ տան ընկուզը
 ու ընկուզից հանեց եղը,
 քըսեց ուսի ցաւած տեղը:
 Ամուն օր էր, սիրուն, պայծառ,
 իսկոյն ուսից բուսաւ մի ծառ.
 ծառը տեսաւ մի մեծ ագռաւ,
 իսկոյն ճիւղը վըրա թառաւ:
 Մի հողի կոշտ հայրս առաւ,
 էն ագռաւին վրա արաւ.
 կոշտը ցըրւեց, դարձաւ մի հող՝
 մի օրավար վարելահող:
 Երբ որ եկաւ հասաւ մարտը,
 ցորեն արինք մենք էն արտը.
 մտանք յունիս՝ ընկաւ բաղը,

ես վեր առայ սուր մանգաղը,
 մըտայ արտը՝ որ բաղեցի,
 բայց մի սաստիկ ճիչ լըսեցի:
 Խեղճ աղէսը, էն անմեղը,
 ցորնի միջին քնած տեղը,
 իմ մանգաղին դարձել էր զոհ:
 իմ արածից ես էլ դժգոհ
 բերի խեղճին ու բերթեցի,
 մորթին մսից բաժանեցի.
 բայց ի՞նչ կասես՝ մորթու տակից,
 ետի ոտքի աջ կրունկից,
 մի թուղթ ելաւ ձեռքով ծալած
 ու միջին էլ գրչով գըրած.
 «Այ, ցորնատէր, գնա քո բանին,
 բաղարջը տուր ջաղացպանին»:
 Ցորնատէրը գլուխը ցած՝
 ալիւրն արաւ, գընաց բաղցած:

Ո՞րն է էստեղ ամենից թունդ սուտը. ո՞րն է ամենից ծիծաղելու
 սուտը. ո՞րն է ամենից գեղեցիկ սուտը:

35. Չնագնդի

ա.

Բաղալն ու ես վաղուց թշնամի էինք. Դեռ անցեալ գար-
 նան էր, որ նա իմ կոճիները չուռ առաւ ու փախաւ. Էն օր-
 ւանից մենք թշնամիներ էինք և միշտ առիթ էինք փնտում
 իրար վնասելու, իրարից վրէժ հանելու. Ամառը մի բանի ան-
 գամ ես նրանց արտը արածեցրի, նա մեր բոստանը քանգել
 տւաւ. աշնանը մի անգամ տաւար արածացնելիս միմեանց
 հայհոյեցինք, քիչ մնաց կուէինք, բայց միւս տաւարածները
 չըթողին. Այս վերջին դէպքից յետոյ թշնամութիւնը սաստ-
 կացաւ ու երկուսս էլ սպասում էինք, թէ երբ կըլինի՝ որ մի

օր իրար պատահենք։ Եւ մի անգամ «իրար պատահեցինք», ու շատ զոռ պատահեցինք...

Սպիտակ ամպը բոնել էր երկինքը, սարերը չեին երեռւմ, կարծես թէ երկինքն ու երկիրը մօտեցել էին և ուզում էին դրկախառնւել։ Լեռնային ձիւնի թաւ փաթիլները արագա-րագ փրթում էին. բուք ու բամի չըկար և ձիւնը հանդարտ դիղւում էր ու դիզում։

Ես, Կոստին, Ալէքն ու Խէչանը մտադրւել էինք այդ օրը աղբիւրի սառածի վրա կոճի խաղանք, բայց որովհետեւ թազա ձիւն էր զալիս, պէտք էր ուրեմն ձնագնդի չաղացնէինք։ Այդ դէպրին ես վաղուց էի սպասում, որ կարողանամ իմ հակառակորդի քիթ ու պոռւնգը արնացնեմ։ Դրա համար էլ առաւտեան հացից յետոյ ուրախ-ուրախ տրեխներիս մէջը խոտ դրի, արխալուխիս կոճակները պնդացրի, գառան մորթէ գդակը գլուխս պնդացրի, մոթալի մորթուց իմ ձեռքով կարած թաթմաններս անցկացրի ու դուրս թռայ։

—Պա, պա, պա, երեխէք, ինչ ձիւն է... — ասաւ Կոստին։

—Աչք ու ականջ պիտի լցնեմ հա, — ասաւ Ալէքը, ձիւնագնդեր պատրաստելով։

—Ոչ, տղերք, երեքով շատ քիչ ենք, խաղը համ չի ունենայ։ Դու մեզանից պուճուր ես, — դարձաւ ինձ Կոստին, — զնա զեղամէջը, երեխաներին ասա՝ զան։

Ճամփին ինքս ինձ մտածում էի. «Ախ, ինչ լաւ կըլինի, որ Բաղալն էլ գայ, ինչ լաւ կըջարդեմ նրան. Կոստին հօչ թողնի, որ նա ինձ ծեծի»։

Ի.

Տասը ըոպէից յետոյ մենք մօտ քսան հոգի հալա-հալա էինք եկել և Կոստինի ու Ալէքի մայրութեամբ, իբրև երկու թշնամի բանակներ, կանգնած էինք իրար դէմ։

—Դէ, երեխէք, վրա տւէք, — հրամայեց մեր հրամանատար Ալէքը։

Ձիւնի գնդակները կարկտի նման թափւում էին երկու կողմից. մի քանի րոպէ ոչ ոք չէր կարողանում յաղթի. յետոյ սկսեցինք քիչ-քիչ միմեանց մօտենալ. Հետզհետէ մեր գընդակները կորցրին իրանց ձկը, մենք ուղղակի ձիւնի ահագին կտորներ էինք թափում իրար վրա. Նրանց կողմից Բաղալը մի գնդակով աչքիս խփեց. ես էլ չըհամբերեցի, հասայ բըռնեցի նրան և ձիւնի մէջ գլորեցի։

—Մեռելթաղուկն սկսւեց, — գոչեց Կոստին, և ամեն մէկս մէկին բոնած գլորում էինք ձիւնի մէջ. Երես, քիթ, պոռւնգ,



գլուխ, ամեն ինչ սպիտակ էր, միայն ձիւնն էր, որ երեռւմ էր։

Ես ու Բաղալը ոչ թէ խաղում, այլ կուռւմ էինք. ձիւնի մէջ թաղւած քլոլում էինք իրար, այլ և կրծոտում միմեանց. բոլորը թափւել էին մեզ վրա միմեանցից ազատելու. չէինք պոկւռում, կպել էինք և ձիւն էինք ձխտում միմեանց քիթ ու բերան։ Վերջապէս հեռացրին իրարից։ Բաղալի քթից արիւն էր գնում և ներկում սպիտակ ձիւնը. Ոչ ոք ուշագրութիւն չըդարձրեց այդ բանի վրա. Ոչինչ չէի զգում. ոչ միայն

ձեռներս ու ոտներս, այլ և ամբողջ մարմինս թմրել էր. Ընկերներիս բոլորի շրթունքներն էլ կապտել էին, այտերը կարմրել.

—Հերիք է, երեխէք,—ձայնեցին մայրերը և մենք ստիպւած էինք ետ դառնալ:

Իրարից հեռացանք, տեսայ թաթմաններս չըկան, և ձախ աչքիս մէջ ինչ որ բութ ցաւ էի զգում.

—Երեխէք, ում աչքն է ցաւում,—ասաւ Ալէքը.—թող գնայ, աղբիւրումը լւանայ:

Ես ու մի ուրիշը վազեցինք, սառը ջրով լւացւեցինք. և իրաւ, ցաւն անցաւ. բայց այժմ էլ ձեռներս ու ոտներս սկսեցին մըժմըժալ, մոմոալ,

—Կօստի, Բաղալն ու Սիմակը կուած են, արի նրանց հաշտեցնենք,—ասաւ Ալէքը:

—Դէ, հաշտեցէք, երեխէք, թէ չէ ականջներդ կը քոքեմ,—հպարտ ու հրամայող ձայնով ասաւ Կօստին:

—Հիմի էս է փէտացել ենք, հիմի գնանք տուն. ճաշից ետը կը հաշտեցնենք,—վճռեց Ալէքը:—Երեխէք, ճաշից ետը էլի ետ կը գաք. նշանի խփենք, իմացաք, կը գաք հա...

Այս հրամանից յետոյ ցըւեցինք. Ձեռներս ծոցս դրած, վազեցի մեր գոմը նարգիզ կովի շնչով տաքանալու: Վազում էի ու յամառութեամբ մտածում:

«Տեսնենք, ոնց էք հաշտեցնում»:

Պ.

Ճաշից յետոյ մէկ ասի՝ չը գնամ, բայց վերջը չը համրեցի ու գնացի: Բոլորը կալերումն էին:

Նշանի պիտի խփէինք: Մայրերը հերթ նշանակեցին՝ թէ ով ումնից յետոյ պէտք է խփի նշանին: Ապա սկսեցինք նշանը շինել:

Նշանը ձիւնից շինած մի մարդ էր, մի ձիւնէ ահազին արձան. հինգ ըովէում շինեցինք:

—Դէ, երեսին ցեխ բսենք ու նշան դնենք:

Բայց ցեխ գտնելը այնքան էլ հեշտ չէր, որովհետև ձիւնը խոր էր և գետինն էլ սառած:

—Աղբիւրումը կըլինի, աղբիւրումը,—սսաւ մէկը և բոլորս էլ վազեցինք դէպի աղբիւրը.

Մեր խաղերին նայելու էին եկել հասակաւորները և նոյնիսկ մասնակցում էին և նշանի խփելիս քաջալերում աջող խփողին:

Իրիկնաղէմին հասակաւորները որ տուն գնացին ու մնացինք մենակ երեխաներս, մէկ էլ լսեց Ալէքի ձայնը.

—Դէ, տղերք, եկեք Բաղալին ու Սիմակին հաշտեցնենք:

—Հաշտեցնենք, հաշտեցնենք,—կանչեցին ամեն կողմից:

Ես ոտն առայ, սկսեցի փախչել դէպի մեր տունը. Բաղալն էլ ուզեց ծկուի իրենց տունը: Մեր ետեկց հասան, բռնեցին:

—Զեմ, ուզում. չեմ ուզում, չեմ հաշտւի:

—Բա մայրերն ի՞նչացու են, թէ որ նրանց հրամանին լսելու չես:

Զոռով քաշեցին ու կանգնեցրին ինձ ձիւնի արձանի առջե. միւս կողմից էլ ձիւնի մէջ թրեելով՝ բերում էին Բաղալին:

—Խոռվելը լաւ բան չի. խռովկաններին՝ տեսնում էք՝ տանը հաց չեն տալիս,—խրատում և յորդորում էին Ալէքն ու Կօստին, որոնք ամենից հասակաւորներն էին մեր խաղընկերների մէջ:—Համբուրւեցէք,

Ամենքը մեր շուրջը հաւաքւեցին:

—Չեմ ուզում: Սիմակը ի՞նչու մեր արտը արածացրեց,—ասում էր Բաղալը:

—Աբա, դու չէիր, որ իմ կոճին չուռ արիր:

—Կոճու ժամանակը չէ, կոճու ժամանակը չէ,—աղաղակեցին ամեն կողմից:—Կոճի չենք ուզում. հիմա ձնագնդի ենք խաղում: Հաշտեցէք, հաշտեցէք, թէ չէ՝ էս է ձնագնդին գալիս է, էս պապը վկայ,—հանաք էին անում մեր ընկերները և ինձ ու Բաղալին իրար կողմը հրում, իրար սեղմում: Այնպիսի

աղմուկ աղաղակ բարձրացաւ, որ շնկւեցի. էլ չիմացայ, թէ
ինչպէս Բաղալի ձեռքն առած համբուրւեցինք:

—Հուռա, հաշտւեցին, տղերը, հաշտւեցին,—ծափ տւին
քոլորը ու առաջւանից աւելի եռանդով ձիւնին կպան:

Դ.

Արդէն մթնում էր. ցրտից սառել կապտել էինք, երբ ձիւնէ
արձանը քար ու քանդ անելով՝ վազեցինք ամեն մէկս մեր
տաւարը ջուր տալու:

—Իմ գլխին էս ի՞նչ քերին Կոստին ու Ալէքը, Է,—ասում
էի կատաղած ինքս ինձ՝ Նարգիզ կովին ջուր տալիս.—Էգուց
ես նրանց հախիցը էնպէս գամ որ...

Այնուամենայնիւ, երբ առաւօտեան դուրս վազեցի ու տե-
սայ, որ ձիւնը երէկւանից շատ է եկել, գետինը փափուկ
փափուկ ծածկել՝

—Հայ, հայ,—ծայն տւի ուրախ-ուրախ:

—Հէյ, հէյ,—լսւեց այն կողմից Բաղալի ձայնը.—Բարի
լոյս, Սիմակ: Էսօր ձնագնդի պիտի խաղանք:

—Բաս,—կանչեցի ես:—Եւ դեռ ո՞նց...

Այդ օրը այնպէս չաղացրինք ձնագնդին, որ իրիկունը
միայն տուն վերադառնալիս յիշեցի թէ ուզում էի Ալէքից և
Կոստինից վրէժ առնէի: Համա թէ պրծան իմ ձեռքից, հա...

36. Պոչատ աղւեսը

Փախաւ աղւէսը,
փախաւ թակարդից,
բայց պոչի կէսը
թողեց նա ներսը:
Էտպէս պոչատ,
պոչից անջատ,
գնաց ասաւ ընկերներին.

—Այ ձեզ մատաղ, ես ձեր գերին,
դէն զցեցէք ձեր պոչերը,
ինչու են պէտք էտ փչերը.
դրանք զարդ չեն ու զարդարանք,
այլ մեր գլխին պատիժ, փորձանք,
գետնի տւել,
վազքի խափան,
մեզ անվայել,
աւելորդ բան:—

Էտտեղ մի ձեր վարպետ աղւէս
ասաւ նրան՝ «Ապրես, ապրես,
այ ծակամուտ թոռիս թոռը.
Էտքան չեն տայ խելքին զոռը.
բա քանի որ տեղն էր պոչը,
ինչու չարիր գու էտ կոչը»:

Աղւէսը ինչո՞ւ է ուզում միաների պոչերն էլ կտրել տայ:

37. Գրագրի տղան

Յովսէփը ծխական զպրոցի վերջին դասարանի աշակերտ
էր: Հայրը երկաթուղու վարչութեան մէջ գրագրի պաշտօն
ունէր: Ընտանիքը մեծ էր, ոռձիկը աննշան, խեղճ էին ապրում:

Հայրը որդուն շատ էր սիրում, գգուում, միայն թէ շատ
խստապահանջ էր ուսման կողմից: Անհրաժեշտ էր որ Յովսէ-
փիկը շուտ պաշտօն գտնէր, իսկ պաշտօն գտնելու համար
պէտք է որ լաւ սովորէր: Թէև տղան ծոյլ չէր, բայց հայրը
դարձեալ շարունակ դրդում էր նրան:

Ինքը հայրը արդէն հասակն առած և անժամանակ ալեռ-
րած մի մարդ էր: Ընտանիքի ապրուստը հոգալու համար՝
նա պաշտօնից դուրս էլ գրագրութիւն և ուրիշ գործեր էր

յանձն առնում և գրեթէ ամեն գիշեր գրում էր: Վերջերս
մի գրավաճառ, որ գրքեր ու շաբաթաթերթ էր հրատարա-
կում, նրան յանձնել էր բաժանորդների հասցէներ գրելը:
Թղթէ գոտիների վրա հայրը պիտի գրէր ստացողի անունը,
ազգանունը, քաղաքը, փողոցն ու տան համարը: Խոշոր ու
պարզ գրւած հինգ հարիւր հասցէի համար վճարում էին
երկու րուբլի: Հայրը յաճախ գանգատում էր ճաշի ժա-
մանակ.

—Աչքերս տկարանում են. մաշւեցի այս գործի վրա:

—Թող, հայրիկ, ես քո տեղը արտագրեմ, —ասաւ մի օր
տղան.—մեր ձեռքը իրար նման է:

—Ոչ, —պատասխանեց հայրը կտրուկ.—դու սովորում ես.
քո ուսումը հասցէներից աւելի կարևոր է. դու քո գործը տես:

Յովսէփիկը ճանաչում էր հօր բնաւորութիւնը, էլ այդ
մասին ոչինչ չասաւ, բայց ահա թէ ինչ արաւ:

Հայրը սովորաբար ուղիղ կէս գիշերին թողնում էր գրելը,
ետ էր հրում աթոռը ու հանդարտ բայլերով գրասենեակից
անց էր կենում ննջարան: Մի գիշեր որդին զարթուն սպասեց
անկողնում մինչև հօր պառկելը. յետոյ կամացուկ վեր կա-
ցաւ, հագաւ շորերը, խարխափելով մտաւ գրասենեակը ու
լամպը վառեց: Գրասեղանի վրա դրւած էր գոտիների մի դէզ
և հասցէների ցուցակը: Յովսէփիկը սկսեց արտագրել, աշխա-
տելով հօր ձեռագրին նմանեցնել: Աշխատում էր հաճութեամբ,
ուրախութեամբ, բայց և վախով. երբեմն երբեմն կանգ էր առ-
նում, ականջ էր դնում ու նորից սկսում էր գրել աւելի մեծ
եռանդով: Այսպէս նա արտագրեց հարիւր եօթանասունը հինգ
հասցէ, վաստակել էր ուղիղ տասը շահի: Էլ թողեց գրելը,
ամեն բան սեղանի վրա կարգի բերաւ, լամպը մարեց ու ոտի
մատների վրա գնաց մտաւ անկողին:

Հայրը ուրիշ հոգսերով դրագւած՝ առհասարակ մեքենա-
բար էր արտագրում և իր աշխատանքը միայն ժամերով էր

չափում, ուստի և չընկատեց որդու արած խաղը: Միւս օրը
ճաշին հայրը լաւ էր տրամադրւած:

—Երէկ գիշեր մի երկու ժամում ամբողջ գործիս կէսը
աւարտեցի: Դեռ երբէք այդպէս չի եղած. ուրեմն դեռ ձեռքս
աջող է ու աչքս սուր:

Յովսէփիկը հրճում էր սրտի խորքում ու վճռեց այդպէս
էլ շարունակել:

Բ.

Եւ ամեն գիշեր, ժամը տասներկուսը խփեց թէ չէ, հէնց
որ հայրը գնում էր պառկելու, ինքը անցնում էր նրա տեղը
ու սկսում արտագրութիւնը: Բայց այդպէս իր քունը կարճե-
լով՝ առաւօտները ուշ էր զարթնում, յոզնած էր վեր կենում
ու դասերն էլ կարծես ակամայ էր սովորում. քունը տանում
էր գրեի վրա: Հայրը նկատեց, նախ քիչ խոժոռեց ու վեր-
ջապէս յանդիմանեց.

—Դու փոխւել ես, Յովսէփիկ. ծուլանում ես, լաւ չէ: Ամ-
բողջ մեր ընտանիքը ապրում է քո յոյսով... Ես քեզնից դըժ-
գոհ եմ, հասկանմամբ ես:

Այս առաջին խիստ կշտամբանքը շփոթեց տղային:
«Չէ, մտածեց նա, այսպէս շարունակել չի կարելի. այս-
պէս խաբելը լաւ չէ»...

Բայց նոյն օրը ճաշի վրա հայրը յայտնեց ուրախ-ուրախ,
որ այդ ամիսը տասնըչորս ըուբլի աւելի է աշխատել, քան
նախորդ ամիսը: Ամբողջ տասնըչորս ըուբլի:

—«Չէ, սիրելի հայրիկս, —մտածեց տղան.— Ես քեզ նորից
պիտի խաբեմ: Յերեկները կը ջանամ դասերս աւելի լաւ սո-
վորեմ, իսկ գիշերներն էլ մեր տան համար փող կաշխա-
տեմ»:

Ու սկսեց բոլոր ուժով աշխատել: Բայց քանի գնում
յոզնութիւնը աւելի էր սաստկանում ու գաղտնիքը պահելն
էլ օրէցօր աւելի դժւարանում: Այսպէս անցաւ երկու ամիս:

Հայրը շարունակ տրտնջում էր որդու ցրւածութիւնից ու ծուլութիւնից, կշտամբում էր և վերջապէս գնաց դպրոց վարժապետից տեղեկութիւն հարցնելու:

—Նա ուրիշներից ետ չի մնում,—պատասխանեց վարժապետը.—Ետ չի մնում, որովհետև ընդունակ է, բայց առաջւայ պէս ուսման սէր ցայց չի տալիս: Պատահում է որ դասի ժամանակ քնում է, յօրանջում է, անուշադիր է: Շարադրութիւնները շատ կարճ է գրում, վայրիվերոյ. կարող էր շատ աւելի լաւ պարապել...

Նոյն իրիկունը հայրը մի կողմ տարաւ Յովսէփիկին և խստութեամբ ասաւ.

—Տեսնում ես որ ես չարչարւում, մաշւում եմ մեր ընտանիքի համար: Դու ինձ օգնելու մասին բնաւ չես մտածում. դու անսիրտ ես: Քո փոյթը չէ ոչ հայրդ, ոչ մայրդ, ոչ փոքրիկ եղբայրներդ...

«Ո՞չ, ոչ, հայրիկ, այդ մի ասի»,—ուզում էր աղաղակել Յովսէփիկը, բայց ինքն էլ չէր իմանում՝ ինչպէս մնաց լուռ, գլուխը քաշ արած, ծնօտները սեղմած ու հեկեկանքը կոկորդումը խեղդելով:

Հէնց որ հայրը հեռացաւ, արցունքները թափւեցին աչքերից:

—Բան չըկայ, թող նա այդպէս մտածի, —ասաւ տղան ինքն իրեն, —բաւական է, որ ես թեթևացնում եմ նրա ծանր ու մաշող աշխատանքը...

Եւ օրերը անցնում էին՝ գիշերները աշխատելով, ցերեկները յովնած ու վշտացած: Ամենից ծանրը այն էր, որ հայրը քանի գնում, այնքան սառչում էր որդուց ու շատ քիչ էր հետը խօսում:

Յովսէփիկը անքնութիւնից ու վշտից հետզհետէ աւելի էր նիհարում ու նւազում և դպրոցումն էլ աւելի վատ էր պարապում:

Մի երեկոյ մայրը նկատեց, որ երեխան հիւանդ է:

—Ի՞նչ ունես, Յովսէփիկ, ի՞նչ է պատահել,—հարցրեց նա կարեկցութեամբ ու դառնալով ամուսնուն աւելացրեց.—Յովսէփիկը հիւանդ է, տես՝ ինչպէս գունատւել է:

—Շատ աշխատելուցը կըլինի, —ծաղրեց հայրը առանց գլուխը շուռ տալու:

—Բայց տղան հիւանդ է, —առարկեց մայրը:

—Ե՛, հիւանդ է՝ կառողջանայ, շատ հարկաւորս է, —վրաբերաւ հայրը անտարբեր:

Այս բառերը փշի պէս ծակեցին Յովսէփիկի սիրտը: Պարզ զգաց, որ կորցրել էր հօր սէրը:

Ո՞չ, սա արդէն իր ուժերից վեր էր. սխալ էր իր բռնած ճամփան. և վճռեց դաղարեցնել գիշերւայ արտագրութիւնները, որ կարողանայ նորից իր դասերովը զբաղւի. թող հայրը նորից իրան սիրի, ինքը յետոյ ուրիշ կերպով կաշխատի նրան օգնել:

4.

Բայց ընդհատելուց առաջ կամենում էր մի վերջին անգամ, գիշերային լոռութեան մէջ, տեսնել այն սենեակը, ուր այնքան թաքուն աշխատել էր որդիական ջերմ սիրով:

Վառեց լամպը: Ահա գօտիները, էլ չի գրելու այդ տեղերի անունները, այդ մարդկանց հասցէները... Նա անգիր գիտէր արդէն բոլորը: Մի տիրութիւն իջաւ նրա սրտին: Վերցրեց գրիչը և ուզում էր սկսի իր սովորական գործը մի վերջին անգամ, երբ յանկարծ գիպաւ մի գրքի. գիրքն ընկաւ ու աղմուկ հանեց: Յովսէփի արիւնը խփեց գլուխը. հապա եթէ հայրը զարթնէր: Ծունչը բռնած ականջ էր դնում: Լոռութիւն: Ականջը մօտեցրեց դուան. ամենքն էլ քնած էին: Տղան միամը լուսեց, եկաւ, նստեց ու սկսեց գրել:

Գրւած գօտիների թիւը աւելանում էր: Նա լսում էր, թէ ինչպէս գիշերապահ ոստիկանը կանոնաւոր բայլերով անց էր կենում դատարկ փողոցով և թէ ինչպէս ճոնչալով հանդարտ գնում էին սայլերը: Յետոյ դարձեալ խոր լոռութիւն. միայն

39. Աշկերտ Օհանը

ա.

Ծնունդի թաթախման իրիկունն էր։ Գասպարենց Օհանը, ինը տարեկան մի տղայ, որին երեք ամիս է ինչ աշկերտ էին տւել գերձակ Զաքարի մօտ, մենակ էր մնացել տանը։ Դերձակն ու իր կինը, ինչպէս և բոլոր տանեցիք, ժամ էին գնացել, նրան էին յանձնել տունը պահել։ Օհանը հէնց որ համոզւեց թէ էլ ոչ ոք չըկայ տանը և երեխան էլ հանգիստ քնած է օրօրոցում, զգուշութեամբ բարձրացաւ նստարանի վրա, ցած բերաւ վարպետի թանաքամանը պահարանից, գտաւ մի տեղից ժանգոտած գրիչը ու մի կտոր ճմուտած թուղթ ծոցից հանելով՝ ուղղեց ու փոեց իր առջև։ Բայց առաջին տառը դուրս բերելուց առաջ, մի քանի անգամ վախվիսելով նայեց դուն ու պատուհանների կողմը ու ծանր հոգոց հանեց։ Թուղթը դրել էր նստարանի վրա, իսկ ինքը չոքել յատակին։

Սկսեց գրել.

«Իմ կարօտալի Գասպար պապի, էս գիրը ես եմ բեզ զը-
րում, բո թոռ Օհանը։ Ծնորհաւոր Ծնունդ և Մկրտութիւն,
Աստւած քեզ շատ տարիներ պահի ինձ համար։ Ոչ հէր ունեմ,
ոչ էլ մէր, գու ես մենակ ինձ մնացել»։

Օհանը աշըը դարձեց պատուհանին, որի ապակու մէջ
արտացոլում էր կեղտոտ լամպի լոյսը, և նրան այնպէս թւաց
թէ տեսնում է այնտեղ Գասպար պապին։ Նիհար, կարմիկ
ծերունին ահա կանգնած է եկեղեցում, գուն մօտ, զգզգւած
վափախը գրած գետնին, ոտների մօտ։ սուրբերի պատկերի
առջև վառւող իստակ մոմերը լուսաւորում են նրա նիհար,
գեղնած բարի դէմքը։ բարակ շրթունքները անխօս աղօթք են
մըմնջում։ Չորացած ձեռները վերև պարզած, պղտոր աշքերը
մի կէտի յառած՝ նա կարծես բարացել է։

—Երեխ, հիմա ինձ համար է աղօթք անում, — մտածեց
տղան ու շարունակեց գրելը.

հեռւից լսում էր շների հաշիւնը։ Իսկ հայրը արդէն կանգ-
նած էր նրա ետեր...

Նա զարթել էր գրքի ընկնելու աղմուկից, քիչ էլ սպասել
էր ու ներս մտել։ Մայլերի ճոխնչը ծածկել էր նրա քայլերի
ձայնը ու դռան թեթև ճռոցը։ Ալեոր գլուխը Յովսէփի սև ու
գանգուր զլիսի վրա կախ արած՝ դիտում էր նրա գրչի սահելը
թղթի վրայով։ Խսկոյն ամեն բան հասկացաւ, ամեն բան յիշեց։
Նա գամւել մնացել էր իր տեղում։ Հայրը դողղոջ ձեռքե-
րով փարւեց նրա վզովը։

—Ներիր ինձ, հայրիկ, —աղաչեց մանուկը։

—Դու ինձների, —պատասխանեց հայրը հեկեկալով ու նրա
երեսը հազար անգամ համբուրելով։ —Այժմ իմացայ, այժմ
գիտեմ. ես, ես եմ քեզնից ներողութիւն խնդրողը, ով իմ
սուրբ երեխաս։

Որդին ինչո՞ւ համար էր ներողութիւն խնդրում. հապա հայրը
ինչու համար։

38. Չմեռ

Աշնան վերջին քամին եկաւ
սրբեց զաշտերը, ձոր ու լեռ
ու ամենքին համբաւ բերաւ
թէ գալիս է ցուրտ ձմեռ։
Ու մոայլեց երկինք, գետինք,
մէզը պատեց դաշտ ու սար,
ցուրտը եկաւ տիրեց երկրին,
ձերմակ հագաւ մեր աշխարհ։
Մարդ, անասուն ծերուկ հիւրից
վախվիսելով մտան տուն։
գետն էլ լոեց ցրտի ահից.
ախ, հեռու է գեռ գարուն...

«Երէկ ինձ լաւ դնքսեցին: Խազէյինը քաշէքաշ թուկ տւաւ ինձ դուրս և դնքսեց, որ երեխին օրօրելիս քունս տարել էր: Անցած կիրակի էլ կնիկը տւել էր մի չորացած ձուկ, որ իստակեմ. պոչիցն էի սկսել խստակելը. ձեռքիցս ձուկը խլեց ու մէկ թէ երկու, էնպէս տւաւ քթիս, որ դունչ ու պոռունգս արնոտեց: Աշկերտներն էլ վրաս ծիծաղում են, պապիրոսի են ղրկում, խանութից արաղ. են բերել տալիս, մազերիցս քաշշում են, իսկ խազէինս ամեն օր հազար անգամ ծեծում է: Առաւոտը մի կտոր չոր հաց, կէսօրին մի աման ապուր, իրիկնապահին էլ մի կտոր չոր հաց, իսկ իրենք առաւոտ իրիկուն ուտում տրաքւում են: Քնացնում են սառը հաշտում. երեխէն որ լաց է լինում, հօ իսկի չեմ քնում, երեխին եմ օրօրում: Պապի ջան, Աստծու սիրուն, առ ինձ էստեղից, տար գեղը, էլ չեմ դիմանայ: Ձեռքդ եմ պաշում, աղաչում, տար ինձ էստեղից»:

Օհանի բերանը ծուեց. մրոտած բոռունցքով աչքի արտասուբը սրբեց, հեծկլտաց, յետոյ նորից շարունակեց.

«Ես գեղի ոչխարը կարածացնեմ, քո տեղակ ջաղացում ծառայութիւն կանեմ, Աստծուն քեզ համար աղօթք կանեմ. թէ որ մի վատութիւն տեսնես՝ ծեծի, մեր բակի շան պէս ծեծի:

«Թիֆլիսը մեծ քաղաք է: Էստեղ ոչ ոչխար կայ, ոչ էծ, ոչ կով, ոչ գոմէշ:

«Մւֆ, հիմի ով գիտի ինչ ձիւն է մեր կտուրներին, կալերում, դաշտերում... էգուց տէրտէրը կըգայ՝ տնօրհնէք. երանի կըհարցնի՛ Օհանի մասին, երանի կըյիշի՛, ինչպէս էր ինձ դաս տալիս և գրել կարդալ սովորեցնում»:

Օհանը ծնօտը գրաւ ափին ու քիչ մտածեց. մտաբերեց իր հանգուցեալ մօրը, և յետոյ յանկարծ գրիչը վերցրեց ու շարունակեց:

«Արի՛, պապի ջան, թէ Աստւած կըսիրես, ինձ էստեղ մի թող, մեղք եմ: Սիրտս փակւել է, աշխարհը աչքիս չի երևում,

ողջ օրը մէկ գլուխ լաց եմ լինում: Պապի ջան կորած եմ... Կարօտով բարեներս յիշի Հոռոմսի մօքիրին, շղիկ Պէտօին, պաչ արա մեր Ասլան շան դունչը, իսկ իմ մեծ շւին ոչ ոքի շրտաս: Մնամ՝ Գասպարենց Օհան, Պապի ջան, շուտով արի՛:

Օհանը չորս տակ ծալեց խազմզած թուղթը ու զրաւ ծրարի մէջ, որ նախորդ օրը մի կոպէկով առել էր... Մի քիչ մտածելուց յետոյ գրիչը թաթախեց կը խոշոր տառերով գրեց հասցէն.


«Մեր գեղը, Գասպար պապիս:

Յետոյ գլուխը քորեց, մի քիչ մտածեց ու ժպտաց: Նա շատ գոհ էր, որ ոչ ոք իրան չըխանգարեց զրելիս, գլխարկը ծածկեց ու շապկանց դուրս վազեց փողոց:

Նրան ասել էին թէ նամակները պէտք է փոստարկով գցել. այնտեղից յատուկ մարդիկ հանում են, աշխարհի ամեն կողմը տանում կառքերով ու երկաթուղիներով: Օհանը վազէվազ մօտեցաւ առաջին փոստարկովին ու ձգեց թանկագին նամակը նրա ճեղքի մէջ...

Քաղցը յոյսերով օրօրւած, մի երկու ժամ յետոյ ամուր ընած էր...

Երազում տեսնում էր քուրսին. Պապը նստած է քուրսու տակին ու լսում, իսկ գիւղի տիրացուն կարգում է նամակը: Ասլանն էլ շուրջը պտտում է ու պոչը շարժում...

- 
- 1) Օհանի երազը պիտի իրականանայ:
 - 2) Ի՞նչ տեսակ մարդիկ էին դերձակ Զաքարենք:
 - 3) Ո՞րն էր Օհանի պլատոր դժբախտութիւնը:

40. Ազուան ու աղւեսը

Բախտի բերմամբ
թէ պատահմամբ,
մի մեծ ագռաւ
մի գունդ պանիր
դաշտում գրտաւ,
կըտուցն առաւ,
ծառին թառաւ,
Օ, ինչ պանիր, դեղին ոսկի...
Բայց գեռ չառած համը իսկի,
աղւեսն անցաւ
ծառի մօտով,
գերւեց,
էրւեց
պանրի հոտով:
Վազեց զնաց բերնի ջուրը
և թուլացաւ կուռն ու ճուռը:
Էն ժամանակ, իրա ձեխն,
ծառի տակից, աչքն ագռաւին,
հեղիկ-նազիկ,
փափկամազիկ,
բացեց լեզուն
անուշ-մեղուշ,
թափեց-չափեց
շաքար ու նուշ.
— «Ի՞նչքան լաւն ես,
ես ըս գերին,
ըս էտ սկիկ

վառ աչքերին,
նուրբ ծալքերով
զոյգ թերին:
Մի դու մըտիկ,
էտպէս քըթիկ,
էտպէս ճըտիկ,
մախմուր ագին,
խաս ու զումաշ
ատլասն հագին:
Գիտեմ, անշուշտ իմ քուրիկի
ձայնն էլ կըլի հըրեշտակի:
Երգի, քուրիկ, մի ամաչի,
իմ ուզածը մի մեծ բան չի:
Թէ որ չըքնաղ էտ տեսքի հետ
երգելում էլ եղար վարպետ,
օ, կը դառնաս, իմ սրբուհի,
թըռչունների մայր թագուհի»:
Ազուաւ ազին
իրա մասին
գովեստներից
շըշմած, ուռած,
ագռաւային
բըկովը մին
որ չը կըռոաց,
պանիրն ընկաւ կտցիցը
ցած,
շողոքորթը որխեց, գնաց:



41. Անտառու

Եղնիկները մրսում էին. Երկուսն էին, սեղմւում էին իրար
մի ահագին եղննու տակին: Ցուրտ ու մութ գիշեր էր, ու
ձիւնը գալիս էր անդադար, գալիս ու իր սաւանը փոռում
անտառի ծառերին, գետնին ու եղնիկների վրա: Եղնիկները
սեղմւել էին իրար, պառկել էին ու զունչ զունչի տւել:

Ի՞նչ սև գիշեր էր. ինչ անախորժ ձայներ էր հանում սան-
ձարձակ քամին. ծառերի մերկ գագաթները շվեռում էին իրար
և օձի նման սըւսըւում ու երկուսի կուրծքն էլ անորոշ եր-
կիւղ էր մտել:

Լսւեց բուի ձայնը. խուլ անտառը մի այլանդակ արձա-
գանք տւաւ: Եղնիկները սրեցին ականջները: Բուի ձայնը
կրկնւեց և ձիգ տարածւեց սառած օդի մէջ:

Ի՞նչ վատ գիշեր էր... Քամին փչում էր, բռնելով ձիւն
էր լցնում եղնիկների ականջը ու ոռնում:

Եւ հեռւից քամու հետ յանկարծ լսւեց մի ուրիշ ոռնոց.—
«Ունւ, ունւ, ունւ»...

Եղնիկների շունչը կտրեց ու վախից քարացան:
— Ունւ, ունւ, — լսւեց հակառակ կողմի սարերից, իբրև
պատասխան առաջին ոռնոցին:

Զիւնի ծանրութեան տակ ահա կոտրւեց մի չոր ճիւղ ու ճըռճըռալով ընկաւ գետին։ Եղնիկները ցնցւեցին սարսափահար ու ոտքի թռան։

—Ունւ, ունւ, —կրկնում էր զարհուրերի ոռնոցը միշտ աւելի ու աւելի մօտիկ։

Մի անսանձ երկիւղ տիրեց եղնիկներին, խելագար նայեցին դէս ու դէն և յանկարծ երկուսը միասին միանգամից առաջ նետւեցին ու սկսեցին փախչել։ Փախչում էին նետի պէս, ծառերի բների արանքով, ընկած կոճղերի ու դիզւած ձիւների վրայով, փախչում էին դէպի ցած, դէպի ձորը...

բ.

Իսկ վերը, ծառերի մէջ փայլեցին շարժուն կայծեր, առաջ մէկը, երկուսը, բայց շուտով շատացան ու մօտեցան։

Եւ այնտեղ, ահագին եղննու տակ, ուր քիչ առաջ պառկել էին եղնիկները, կանգ առաւ քաղցած գայլերի խումբը։

Նրանք անհանգիստ փնտրել սկսեցին. առել էին եղնիկների հոտը։ Մէկը վազեց աջ ու ձախ ծառերի մէջ. իսկ միւսները վրա ընկան ձիւնին, ետեի ու առջեկի ոտներով սկսեցին փորել ձիւնը ու ետ ածել. Ոչինչ չըկար. կանգ առան բոլորը միասին, ձայն ձայնի տւին. Ունւ. ունւ...

Նրանցից մէկը լոեց աւելի շուտ, վեր բարձրացրեց իր սուր քիթը, սկսեց սառն օդը ներս ծծել, կարծես իր քթին հարցնելիս լինէր, թէ ուր են գնացել եղնիկները. Բայց օդից ոչինչ չըհասկանալով՝ նորից կոխեց քիթը ձիւնի մէջ, քիչ էլ փորփորեց ու գտաւ եղնիկների բռնած ճամփան։

Ընկերները հետևեցին, ու անդադար հոտոտելով գնացին եղնիկների հետքով, մինչև նորից կանգ առան։


Կատաղի քամին աւելել էր ձիւնը, տարել դիզել էր ով գիտի՝ ուր. սրբել էր և եղնիկների հետքն ու հոտը. Փչում էր ու փչում և ոռնում էր մերկ ծառերի տակ...

Ոռնում էին և գայլերը՝ իրարեկողքի պըպըզած, դնչները քամուն, քաղցած ու խաբւած։

Եւ հեռւից, բարձր սարերի վրայից գալիս էր նրանց պատասխանը.

«Ունւ, ունւ», երկար ու չարագուշակ։

Սարսափելի գիշեր էր...



42. Վուն

Մէգ ու մշուշ, ձիւն ու ձմեռ...

Մունջ երկիրը բուն մտաւ,
ու ամեն ինչ խորին գիշեր
իր սե թեկի տակն առաւ։

Ծառ ու անտառ սառուց հագած՝
բնած են լուռ ու շւար,

սառ վերմակը գլխին բաշած՝
մեռել են գաշտ, ձոր ու սար...

Ու մի շշուկ, ոչ մի ծպտուն,
ամենը խոր մտել են քուն։

Ի՞նչ տարբերութիւն կայ այս գիշերւայ ու նախորդ յօդածի գիշերւայ մէջ, ինչի՞ցն է առաջանում այդ տարբերութիւնը։

43. Պայտառ Աւոն

ա.

Թրախկ-թրուխկ, զրախկ-զրուխկ... Դեռ հեռւից լսում
էին պայտառ Աւոն ծանր մուրճի հարւածները, որ իջնում
էին սալի վրա:

Ուրախ էր պայտառ Աւոն. ոչ մի հոգս չունէր: Վաղուց
վճարել վերջացրել էր հօր թողած պարտքը և ընդարձակել պա-
պական դարբնոցը: Նրա համբաւը հեռու տարածւել էր շրջա-
կայ գիւղերում և ամեն օր տասնեակ գիւղացիք խոնում
էին նրա մօտ, անասուններին պայտել տալիս կամ որևէ կոտ-
րած ծռած բան դարբնել տալիս:

Հանաքների տոպրակ էր պայտառ Աւոն: Ամեն անգամ մի
ձի պայտելիս այնքան կատակներ էր անում, որ ձիատէրը ծի-
ծաղու ձեռքից բաց էր թողնում կենդանու ոտը:

Մենակ ժամանակն էլ նա անվերջ խօսում էր իր կռանի,
սալի, հնոցի, փուքսի կամ կայծերի ու շիկացած երկաթի հետ
և զիլ ձայնով բարձր երգում էր նրանց գովքը:

Լուսաբացից մինչև մթնելը նա մի ըոպէ չէր հեռանում
իր դարբնոցից. կիրակի օրերն էլ, երբ չէր աշխատում, կանգ-
նած էր լինում իր դարբնոցի դռանը ու գիւղացիներին զւար-
ճացնում իր սրախօսութիւններով:

բ.

Այպէս անցան շատ տարիներ, ուրախ ու երջանիկ.
Բայց մի օր հնոցից դուրս պրծած կայծերով անզգուշու-
թեամբ կոպերը այրեց: Կոպերը բորբոքւեցին և աշքերը կու-
րացան:

Աւոն ստիպւած էր դարբնոցը կապալով տալ ուրիշին:

Լոեց նրա անհոգ երգը, դադարեցին կատակները... և Ա-
ւոն մի անգամից ծերացաւ:

Ամեն օր ձեռքի փայտով ճամփան շօշափելով՝ առաւօտ-
ւանից գալիս նստում էր դարբնոցում և ականջ գնում իր

փոխանորդի մուրճի կուռ հարւածներին: Սուր ականջով նա
ջոկում էր՝ թէ ինչ է անում դարբինը, և մէկ-մէկ կանչում.
—Գլխին տուր, գլխին...

կամ՝

—Կրակը գցի, թող փափկի...

Ապա դառնում էր փուքս փչող պատանուն.

—Փչի, փչի, հոգուդ մատաղ, փչի: Ժաժ եկ, որդի, մի ա-
մաչացնի:

Ու չէր համբերում. վեր էր կենում տեղից. խարխափելով
մօտենում էր փուքսին, առնում էր պատանու ձեռքից կո-
թերը և սկսում ինքը փչել:

—Տեսնում ես, մեր տղայ, ոնց պէտք է փչես,—կրկնում
էր երիտասարդ դարբինը:—Սովորի, ապօրից սովորի:

—Զան-ջան, Աւո ապէր,—քաջալերում էին դարբնոցում
նստած գիւղացիք.—ափսոս ջահէլութիւնդ, հա...

—Հէրիք է, հէրիք, շէն կենաս, ապէր,—վերջապէս ընդ-
հատում էր դարբինը.—յոգնեցիր, թող էտ ջահիլը փչի:

Պատանին նորից առնում էր ծերունուց փուքսի կոթերը
և շարունակում գործը:

Իսկ Աւոն քրտինքը սրբելով, դանդաղ գնում էր իր սովո-
րական տեղը, ծանր իջնում էր գետին ձեռնափայտի կողքին,
երկու ափով բռնում էր զլուխը ու խորը «ախ» քաշում:

Թրախկ-թրուխկ, զրախկ-զրուխկ, փուհ հա փուհ, փուհ
հա փուհ:

Կոանը զարկում էր, փուքսը փչում ու նրանց ձայների
հետ միախառնուում էին դառն հոգոցները, որ դուրս էին թըռ-
չում կոյր դարբնի տանջւած կրծքից:

1) Աւոն սկզբում ինչո՞ւ էր այնպէս ուրախ ու երջանիկ:

2) Կուրանալուց յետոյ ի՞նչն էր նրան տանջում:

3) Ինչո՞ւ էր ամեն օր գալիս դարբնոցը նստում:



44. Դարբին

Կըուանը ձեռքին, զընդանն առաջին,
քիթ-երես մըրոտ, դարբնոցի միջին,
կաշւէ գոգնոցը առաջը կապած,
լոիկ կանգնած է մեր Խէչօ ամին.

Փուքսը – փուհի հա փուհի,
փչում է, փչում,
կայծեր ու մոխիր դէս ու դէն փուում.
Երկաթի մի շերտ հընոցը կոխած,
սաստիկ տաքիցը վառուում, կարմրում:

Խէչօն հանում է երկաթի շերտը,
զընդանի վրա կոանով ծեծում,
շինում նրանից պայտ, մեխ ու կացին
և իսկոյն ջրի տաշտակը կոխում.

Թշում է երկաթը ցուրտ ջրի միջին,
ամպիպէս փուում տաք-տաք գոլորշին,
կրկին պնդանում, կրկին փափկանում,
մինչև որ պատրաստ, շպրտում դետին:
Կոում է Խէչօն, տքնում, աշխատում
մըրոտ ու նեղիկ դարբնոցի միջին,
կաշւէ գոգնոցը առջևը կապած,
կըուանը ձեռքին, զընդանն առաջին.

Ի՞նչո՞ւ է Խէչօն տքնում ու աշխատում. մարդիկ ինչո՞ւ են աշխատում:

45. Աբու-Հասանի մաշիկները

Ո՞վ չէր ճանաչում Բաղդադում Աբու-Հասանի հոչակաւոր մաշիկները, այն կողմերում հւմը յայտնի չէին Աբու-Հասանի երկելի մաշիկները:

Քթերը թափած, կըունկների մէկը դէսը, միւսը դէնը ծուած, հազար տեղից ծակ-ծուկ, գոյնը վաղուց թռած, քըրքըրւած, կեղտոտ մաշիկները նմանը չունէին ամբողջ Բաղդադում:

Ծերունիները հազիւ էին յիշում այն օրը, երբ այդ կօշիկները առաջին անգամ զարդարեցին Աբու-Հասանի ոսկրոտուները. Այն ժամանակ Աբու-Հասանը թէկնոյնչափ բարձրահասակ ու բարակ էր, բայց դեռ չորացած, չըմըշկած չէր, մօրուքը թէկ նոյնչափ երկար ու փառաւոր էր, բայց դեռ ոչ մի սպիտակ մազ չէր երկում:

Բ.

Աբու-Հասանը մի օր գնացել էր բաղանիք:
Հանւելիս ծանօթներից մէկը նայեց և ասաւ.

—Պատւելի Աբու-Հասան, երանի երբ և իցէ դէն կըզցես էտ մաշիկները, որ ոտքիդ փթել են:

—Հա, հա, ես էլ եմ տեսնում՝ մի քիչ մաշւել են, —մըրթմըրթաց Աբու-Հասանը և շտապով ներս մտաւ բաղանիք:

Բաղանիքից դուրս գալուց յետոյ, հագնւելիս Աբու-Հասանը իր բըրբւած մաշիկների կողքին նկատեց մի զոյգ նոր, սիրուն, գողտրիկ մաշիկներ. Ու բացականչեց.

—Անշուշտ, բարեսիրտ ծանօթս է էս մաշիկները ինձ նւիրել. Ալլահը նրան բարի տայ, մէկ օրը հազար անի, անսպառ լաւութիւնով լցնի նրա տունը...

Ու անվերջ օրհնելով առատաձեռն ծանօթին, Աբու-Հասանը հազար նոր կօշիկները ու երջանիկ դուրս գնաց բաղանիքից:

Դու մի ասա, այդ մաշիկները դադիխնն է եղել:

Դուրս է գալիս դադին բաղանիքից, դէս մաշիկ, դէն մաշիկ, չըկայ: Գոռգոռում է դադին: Բաղնիսպանը, ծառաները զլուխները կորցրած որոնում են: Մէկ էլ ահա բերում են Արու-Հասանի փառաւոր մաշիկները, քթերը թափած, կրունկների մէկը դէսը, միւսը դէնը ծուած, հազար ու մի տեղից ծակ-ծակ, քրքրւած, կեղտոտ մաշիկները:

—Էս հօ Արու-Հասանի զգւելի մաշիկներն են,—գոչում է դադին.—Էն ժլատը գողացել է իմ նոր մաշիկները: Շուտով, հասէք, բռնեցէք:

Հասնում են Արու-Հասանին հէնց իր տան դռների առջև, բռնում են տանում դատարան: Կարող էր արդարանալ որ... Գողացած մաշիկները ոտքին էին: Եւ Արու-Հասանը պէտք է բանտ նստէր, և, ոհ սոսկալի՛ բան, տուգանք վճարէր, և նորից իր հին մաշիկներով տուն վերադառնար:

Այդ օրւանից Արու-Հասանը ատեց իր հին հոչակաւոր մաշիկները. չէ որ բոլոր դժբախտութիւնների պատճառը նըրանք էին եղել:

Տուն վերադառնալուն պէս հանեց մաշիկները ու շպրտեց առուն, որ հոսում էր տան առջեկից:

դ.

Երեք օր յետոյ ձկնորսները ուսկանով ձուկ որսալիս ջրից հանեցին ձկան տեղ, մաշիկներ. քթերը թափած, կրունկների մէկը դէսը, միւսը դէնը ծուած, հազար ու մի տեղից ծակ-ծակ, քրքրւած, կեղտոտ մաշիկներ:

—Էս հօ Արու-Հասանի անպիտան մաշիկներն են,—պոռացին նրանք ու բարկացած տարան ձգեցին Արու-Հասանի բաց պատուհանից ներս: Մաշիկներից մէկը դիպաւ հնուց մնացած թանկագին յախճապակի սափորին ու փշրեց:

Մօտ վազեց Արու-Հասանը, տեսաւ իր հին հոչակաւոր մաշիկները, տեսաւ փշրւած սափորը, երկու ձեռքով գլխին

տւաւ. Էլ ի՞նչ: Առաւօտը, լոյսը բացւելուն պէս իջաւ այգին ու թաղեց, խորը թաղեց մաշիկները մի ծառի տակ, որ ազատւի ու էլ նրանց երեսը չը տեսնի:

ե.

Հարեանը կտուրից նկատեց ու մտքումը ասաւ.

—Էս լաւ է, վերջապէս իմացայ՝ որտեղ է պահում Արու-Հասանը իր սոկիները:

Ու հէնց նոյն գիշեր ծածուկ մտաւ Արու-Հասանի այգին: Փորեց, փորփորեց, արմատահան արեց թփերը, վերջապէս ծառի տակից դուրս եկաւ մի ինչ որ բան:

Լուսնեակի լուսով լաւ զննեց և տեսաւ՝ մաշիկներ էին, քթերը թափած, կրունկների մէկը դէսը, միւսը դէնը ծուած, հազար ու մի տեղից ծակ-ծակ, քրքրւած, կեղտոտ մաշիկներ:

—Էս հօ Արու-Հասանի գարշելի մաշիկներն են,—կանչեց հարեանը ու զայրացած այնպէս տւաւ մաշիկները Արու-Հասանի տան դռան, որ խեղճ ձերուկը վեր թռաւ տեղից ու դողդողալով շապկանց վազեց տեսնելու՝ գողերը հօ չեն մը-տել իր սնդուկները փախցնելու:

Վախից դուռը բաց չարաւ. բայց էլ քուն կը գա՞ր աչքերին:

գ.

Առաւօտեան, երբ դուռը բաց արաւ՝ ապշած մնաց. իր հին հոչակաւոր մաշիկները ընկած էին շեմքին, իսկ այգին, իր աշբի լոյս այգին տակնուվը արած:

Արու-Հասանի ծնկները դողացին, աշբերը դէպի երկինք դարձան, ձեռքերը վեր պարզւեցին ու նա կարողացաւ միայն բացականչել.

—Ծլան, այս ի՞նչ պատիժ է:

Ամբողջ օրը խանութում Արու-Հասանը միմիայն մի բանի մասին էր միտք անում՝ թէ ինչպէս ազատւի իր հին հոչակաւոր մաշիկներից:

Եւ երեկոյեան դէմ կամացուկ դիմեց քաղաքից դուրս

—Այ հրաշք, Աբու-Հասանը զբօսնելու է գնում, —ասում
էին զարմացած նրան պատահող ծանօթները:

Աբու-Հասանը գնաց հեռու, գետի ափով, շուրջը նայեց,
տեսաւ՝ մարդ չըկայ, ու ջուրը նետեց իր մաշիկները:

—Գնացին, —ուրախանում էր նա, —ծովը գնացին:

Եւ հանգիստ սրտով վերադարձաւ տուն ու անուշ բնեց:
է.

Գետից ջուր էր բերած բաղաքի հրապարակները. Միւս
օրը, Բաղդադի կանայք երբ գնացին աւազանից ջուր առնելու,
տեսան որ ջուրը կտրւել է, աւազանը դատարկ. Կանչեցին
քաղաքապետին, քանդոտեցին խողովակները և յանկարծ խո-
ղովակների մէկից դուրս եկան մաշիկներ, քթերը թափած,
կրունկների մէկը դէսը, միւսը դէնը ծուած, հազար ու մի
տեղից ծակ-ծակ, բրբրւած, կեղտոտ մաշիկներ.

—Էս հօ Աբու-Հասանի բորբոսնած մաշիկներն են, —պո-
ռացին ամենքը, —բերէք Աբու-Հասանին, քաշ տւէք Աբու-Հա-
սանին դատաւորի մօտ, էտ անպիտան ջուր ապականողին:

Դարձեալ կանգնեց Աբու-Հասանը դադիի առջև: Ի՞նչ պիտի
ասէր. բազմութիւնը իր աշբովն էր տեսել նրա մաշիկները
ջրի խողովակի մէջ: Աբու-Հասանը պիտի վճարէր մեծ տու-
գանք և ուտէր մտրակի յիսուն հարւած:

—Մեռայ, —աղաղակում էր նա, —վայ մեռայ...

Տնքալով անիծելով այն օրը, երբ գնել էր իր հոչակա-
ւոր մաշիկները, անիծելով իր սև բախտը, նա վերադառնում
է տուն ու կրկնում.

—Ուրիշ ճար չը կայ, ուրիշ ճար չը կայ, պիտի այրեմ,
կրակը պիտի գցեմ...

ը.

Բայց մաշիկները այնպէս թաց էին: Աբու-Հասանը դրաւ
պատուհանին, որ չորանան: Տան կատուն ցատկեց պատու-
հանը՝ արեի տակ տաքանալու համար, կպաւ մաշիկներին,
մաշիկները գլորւեցին ցած՝ փողոցը, ընկան ուղղակի տակովն

անցնող կնոջ գլխին:

Կինամարդը ցաւից ճշաց. հաւաքւեց ժողովուրդը և ինչ
տեսնի: Ճակատը ճղւել է, արիւնը կաթիլ-կաթիլ ծլծլում է,
իսկ գետնին ընկած են մաշիկներ, քթերը թափած, կրունկ-
ների մէկը դէսը, միւսը դէնը ծուած, հազար ու մի տեղից
ծակ-ծակ, բրբրւած, կեղտոտ մաշիկներ:

—Տեսէք, էս հօ Աբու-Հասանի զազրելի մաշիկներն են,—
գոչեցին ամեն կողմից: —Այ Աբու-Հասան, այ Աբու-Հասան,
դուրս արի, մարդասպան:

Աբու-Հասանի դէմքը երևաց պատուհանից և մի ակնթար-
թում կտաւի պէս գունատւեց:

Ամբոխը քաշէրաշ տարաւ նրան նորից դադիի մօտ:

—Արդար դատաւոր, ողորմի, —աղերսում էր Աբու-Հա-
սանը՝ գետնին տարածւած, —լսի ինձ: Իմ մաշիկները, իմ անի-
ծած մաշիկներն են ինձ էս տեղը հասցնողը: Հոգիս դուրս
եկաւ, ճար չունեմ: Ինչքան ոսկի ուզում ես վերցրու, միայն
թէ փրկի ինձ մաշիկներիս ձեռիցը:

Հագին չը կարողացաւ ծիծաղը պահի:

—Վեր կաց, Աբու-Հասան, —ասաւ նա, —տես, առաջ դու-
չէիր ուզում քո հին հոչակաւոր մաշիկներիցը բաժանւես,
հիմա էլ մաշիկներդ չեն ուզում քեզնից ձեռք վերցնեն: Նե-
րողութիւն խնդրիր այս կնոջից, բժշկի վարձը տուր
ու ճանապարհ դիր, ինքդ էլ գնա քո բանին: Մա-
շիկներիդ համար էլ դարդ մի անի:

Ու հրամայեց Աբու-Հասանի մաշիկները կա-
խեն Բաղդադի մեծ հրապարակի վրա:

Ո՞վ չէր ճանաչում Բաղդադում Աբու-Հասանի
այդ մաշիկները, քթերը թափած, կրունկների մէկը
դէսը, միւսը դէնը ծուած, հազար ու մի տեղից
ծակ-ծակ, բրբրւած, կեղտոտ մաշիկները, որ ժաման
չէր սարսափում դրանց մօտիցն անցնելիս:

Մաշիկները ինչո՞ւ կախնցին մեծ հրապարակի վրա:

46. Առաջին ձնծաղիկները

ա.

Երկար ու սպիտակ միրուքով մի ծերունի նստել էր ու յօնքերը կիտած մտածում էր. Մութ ու ցուրտ էր նրա շուրջը:

Կատարեալ խաղաղութիւն էր տիրում շուրջը, բայց յանկարծ ինչ որ աղմուկ ընդհատեց ծերունու մտածմունքը:

«Այս ի՞նչ բան է. Ո՞վ է համարձակւում ինձ խանգարել: Ես ամենքին հրամայել եմ լոել ու անշարժ մնալ... Այս ձայնը կարծես ջրի կարկաչը լինի, բայց չէ որ ես հրամայել եմ ջրին, որ էլ չը խոխոջի: Իսկ սա ի՞նչ բան է. Ասես թռչունների երգը լինի... Բայց չէ որ ես թռչուններին էլ ուղարկել եմ հեռաւոր հարաւը», — ասում էր ծերունին՝ աւելի և աւելի կիտելով թաւ յօնքերը:

Այդ ժամանակ տեսաւ իր առաջ կանգնած մի պատանի, ոսկեփայլ զանգուրներով ու կարմրաթուշ դէմքով:

— Քեզ ո՞վ թոյլ տւաւ այստեղ գալ, — բարկացած փընթփընթաց ծերունին:

— Ի՞նչ դժգոհ ես երեւում, պապի, — ասաւ պատանին. — Ներիր որ եկել եմ առանցքով թոյլտութեան: Բայց նայիր, տես՝ ինչ ուրախ են ամենքը զալուս. կարծում էի դու էլ...

— Ո՞չ, ոչ, ես ուրախ չեմ, — մըրթմըրթաց ծերունին:

— Ես շատ եմ լսել մեծամեծ գործերիդ մասին, — շարունակեց զւարթադէմ պատանին, — և եկել եմ հաստատ իմանալու, ճիշտ է արդեօր այն ամենը, ինչ որ պատմում են քո մասին:

— Ես արել եմ աւելին, քան թէ դու կարծում ես, տղայ, ոչ ոք չի կարող թւել իմ կատարած բոլոր հրաշքները...

— Ասա, ծերուկ, ի՞նչ է արածդ. Ես կարծում էի թէ բացի ինձանից ոչ ոք հրաշք չի գործում:

— Ես կը փշեմ գետին, ունա կը ծածկուցով, — սկսեց ծերունին:

— Իսկ ես կը փշեմ սառուցին ու կազատեմ կաշկանդւած գետը, — պատասխանեց պատանին:

— Ես կը թափահարեմ ալեզարդ գլուխս, ու երկիրը կը ծածկուի ձիւնով:

— Ես կը թափահարեմ ոսկեհեր գանգուրներս, և պայծառ կը ժպտայ արեգակը ու կը հալւի ձիւնը:

— Ես կը հրամայեմ թռչուններին լոել և չւել այստեղից ու թևերը բանալով նրանք կը դիմեն դէպի հեռաւոր երկիրներ:

— Իսկ ես կասեմ՝ «Թռչուններ, վերադարձէք». կը գան նրանք, կը պտտւեն գլխիս ու օդը կը լցնեն զիլ երգերով:

— Ոչ ոք չի կարող մէկ մէկ համարել այն բոլոր տերեները, որ սարսափից զողղողալով թափւում են գետին, երբ ես կպչում եմ նրանց իմ սաոցէ մատներով կամ փչում եմ իմ ցուրտ շունչը: Տեսել ես դու այդ երբ և իցէ:

— Ես երբէք չեմ տեսել տերեները ծառերից թափւելիս, ես տեսել եմ նրանց միշտ դալար, միշտ մատղաշ, իմ երեալուս ուրախ զողղողալիս, — առարկեց պատանին:

Եւ ծերն ու պատանին խօսում էին ամբողջ գիշեր: Ծերունին սկսեց յոգնել, իսկ պատանին հետզհետէ աւելի զւարթանալ:

Լուսաբացին արևը փայլեց օդը լցւեց թռչունների ուրախ ծըլւլոցով:

Պատանին հասկացաւ, որ արդէն ամենքն հասկացել էին իր գալու մասին ու իրար ողջունում էին ուրախ զւարթ: Երջանիկ ժպիտով նա նայեց իր շուրջը, ապա դարձաւ ծերունու կողմը, որ գնաս բարե ասի նրան...

Բայց ծերունին էլ չը կար:

Այստեղ, ուր նա նստած էր մի քիչ առաջ, երեսում էին
մի քանի սպիտակ բծեր, ձիւնի վերջին մնացորդները:

Պատանին մօտեցաւ նրան ու ժպտաց: Բծերը ոչ թէ
ձիւնի մնացորդներ էին, այլ սպիտակ ձնծաղիկներ, գարնան
առաջին ծաղիկներ, որոնք դեռ յիշում էին ձմեռը:

Էլ ի՞նչ ծաղիկներ գիտէք, որ բացում են ծիւնի հալելուն պէս:

47. Յոգնած երկիրը

Յոլուն աստղերը կապոյտ երկնքում
երգում են անուշ միասին խմբւած,
և ըզգուշութեամբ կամաց են երգում,
չը զարթեցնեն երկիրը նիրհած:

Ա՛խ, ամբողջ օրը շրջող ոտներից,
անվերջ աշխատող կուռ բազուկներից,
ամուր բարախող մարդկանց սրտերից
խեղճ մայր-երկիրը սաստիկ է յոգնած...

48 Արեւի մօտ

ա.

Մի անտէր երեխայ՝ ցնցոտիներ հագած կուչ էր եկել
պատի տակ: Գարնան անուշ արեւ բարի աչքերով նայում էր
նրան:

—Կարմիր արև, բարի արև, դու ես միայն ինձ տաքաց-
նում, —մտածում էր խեղճ մանուկը. —դու ես միայն ինձ
գգւում, համբուրում, ինչպէս երբեմն իմ անգին մայրս: Եթէ
չէ՝ մարդիկ աչք են դարձնում վրաս:

Բայց կամաց-կամաց արեւ թեքւում էր կանաչ սարերի
ետեւ, երեխան կարօտով ու արցունքով նայում էր նրան,
մինչեւ որ ոսկեհեր արեւ սահեց ու անցաւ սարի այն կողմը...

—Զէ, ես չեմ կարող առանց արեւի, —վճռեց մանուկը, —
ես պիտի երթամ արեւի մօտ. ես գիտեմ ճամփան. այ, այս
սարի ետեւ:

Վճռեց ու ճամփայ ընկաւ:

Ե.

Մութը ընկնում էր և կանաչ սարը սեղվ ծածկում:
Ճամփին մարդիկ էին հանդիպում և հեռաց ձայն տալիս.

—Է՛յ հէյ, հվ ես դու:

—Ճամփորդ տղայ եմ, —պատասխանում էր տղան:

—Ուր ես գնում:

—Արեւի մօտ. այ, այս սարի ետեւ:

—Ցիմար տղայ, —ասում էին նրանք ու հեռանում:

Բայց երեխան ուշը չէր դարձնում. նա պարզ զգում էր,
որ արեւ այս սարի միւս երեխին է. մի քիչ էլ, մի քիչ էլ, ու
կը լինի արեւի մօտ:

Ու անվախ, վստահ քայլերով գնում էր վերև, բարձր,
միշտ բարձր:

Գ.

Բաւական ուշ էր արդէն, երբ լսեց մօտիկից շների հա-
չոց ու տեսաւ՝ շատ մօտիկ մի կրակ է շողշողում:

—Ո՞վ ես, —լսեց խաւարի միջից մի ձայն. —Ուր ես գնում:

—Անտէր ճամփորդ տղայ եմ. գնում եմ արեւի մօտ. Ասա,
հրն է արեւի ճամփան. մութն է, էլ սարերը չեմ տեսնում:

Ճրագը ձեռքին մօտեցաւ երեխային մի մարդ, նայեց
նրան ու ասաւ քնքուշ ձայնով:

—Դու դադրած կը լինես ու քաղցած, գնանք ինձ մօտ:

Ասաւ բարի անծանօթը, բռնեց երեխայի ձեռքից ու տա-
րաւ տուն:

Գ.

Նրա տունը մի հասարակ խրճիթ էր. մէջտեղում վառ-
ում էր օջախը, որի շուրջը նստել էին բարի մարդու կինը

և երեք փոքր երեխաներ, որոնք համարեա հասակակից էին ճամփորդ երեխային. Խրճիթին կից մի մեծ սրահում որոշում էին ոչխարները. Նա հովիւ էր, սարի հովիւ:

—Սիրելի երեխաներս, ձեզ եղբայր եմ բերել. Թող չը լինէք երեք եղբայր, լինէք չորս. Երեքին հաց տւող ձեռքը չորսին էլ կը տայ. Սիրեցէք սրան. Եկէք համբուրեցէք ձեր եղբօր ձեռքը:

Ամենից առաջ հովւի կինը մօտ եկաւ, գրկեց երեխային և մօր պէս ջերմ-ջերմ համբուրեց. յետոյ երեխաները եկան և եղբօր պէս համբուրեցին նրան:

Երեխան իր սրտում մի քաղցր տաքութիւն զգաց, և նրան այնպէս թւաց՝ թէ արևը հէնց ուղիղ խրճիթի վերևն է վառւում...

Ե.

Ուրախութիւնից լաց եղաւ, անուշանուշ լաց եղաւ և պատմեց բոլոր իր գլխի եկածները:

Յետոյ օջախի առջև սեղան նստեցին. կերան, խմեցին, ծիծաղեցին. Մայրը նրանց համար անկողին շինեց և ամենքին քնեցրեց իր կողքին. Երեխան շատ էր յոգնած, տեղը մտաւ թէ չէ, իսկոյն աչքերը խփեց ու քնեց...

Երազի մէջ ժպտում էր ուրախ:

Իբրև թէ ինքը արևի մօտ էր, գրկել էր նրան ամուր ու պասկել էր նրա գրկում, տաք ու երջանիկ...

Մէկ էլ սրտի ուրախութիւնից վեր թռաւ, զարթնեց ու տեսաւ որ արևի փոխարէն իր մօր գրկումն էր. Եւ նրան թւաց, որ արևը հչ թէ այս խրճիթի վերևն է, այլ հէնց այս խրճիթի մէջը, որ ինքը ուղիղ հէնց արևի գրկումն է...

Այս պատհածքի մէջ ո՞րն է հոգու արեւը եւ ինչո՞ւ:



49. Սասունցի Դաւիթը զառնարած

Մեր Դաւիթ հըսկան
մի մանուկ էր զեռ հօթ-ութ տարեկան.
մանուկ եմ ասում, բայց էնքան ուժեղ,
որ նըրա համար թէ մարդ, թէ մըժեղ:
Հօրեղբայր Օհանն երեխի ոտի
մի զոյգ ոտնաման բերաւ երկաթի,
երկաթի մի կոռ շալակին դրած,
ու արաւ Սասմայ քաղքին գառնարած:

*

Քըշեց գառները մեր հովիւ հըսկան,
ելաւ Սասունի սարերն աննըման.

«Էյ ջան, սարեր.
Սասման սարեր...»

որ կանչեց, նրա ձէնից ահաւոր
դըղորդ-դըմբդըմբոցն ընկաւ սար ու ձոր.
վայրի գազաններ բըներից փախան,
քարէքար ընկան, դատարկուն եղան:
Դաւիթը ընկաւ նըրանց ետևից,
որին մի սարից, որին մի ձորից,
աղւէս, նապաստակ, գայլ, եղնիկ բըռնեց,
հաւարեց, բերաւ, գառներին խառնեց,
իրիկւան քշեց ողջ Սասմայ քաղաք:
Կաղկանձ ու ոռնոց, աղմուկ, աղաղակ...
Քաղքցիք յանկարծ մին էլ էն տեսան՝
գալիս է հըրէս անհամար գազան.

«Վայ, հարայ, փախէք...»

Մեծեր, երեխէք

սըրտաճաք եղած,

գործերը թողած,

որը տուն ընկաւ, որը ժամ, խանութ,
ու ամուր փակեց դուռն ու լուսամուտ:

Դաւիթը եկաւ, կանգնեց մէյդանում.

—Վահ, էս մարդիկը ինչ վաղ են քընում:

Հէյ ուլատէր, հէյ գառնատէր,

ելէք շուտով, բացէք դըռներ.

ով մինն ունէր, տամն եմ բերել,

ով տամն ունէր՝ բըսանն արել...

Շուտով ելէք, եկէք, տարէք,

ձեր գառն ու ուլ գոմերն արէք:

Տեսաւ՝ չեն գալի, դուռ չեն բաց անում,
ինքն էլ մեկնըւեց քաղքի մէյդանում,
գլուխը դրաւ մի քարի՝ մընաց
ու մուշ-մուշ քընեց մինչև լուսաբաց:

*

Լուսին՝ իշխաններ ելան միասին
գընացին Զէնով Օհանին ասին.

«Աման, քեզ մատաղ, այ Օհան ախպէր,
մեր գառն ու մեր ուլ թող մնան անտէր,
միայն սըրանից ազատ արա մեզ.
ոչ գառն է ջոկում, ոչ գայլն ու աղւէս,
էս քաղքի գլխին փորձանք կը բերի,
գայլերոց կանի, կը տայ՝ կաւերի»:

Ելաւ Դաւիթի մօտ գնաց Օհանը.

—Հը, Դաւիթ, ասաւ, հնց է քո բանը:

—Հօրեղբայր Օհան, շատ է դժար բան.

Էն կարմիր, անպոչ գառները որ կան

խելօք են, ամա պոչաւոր գառներ

ցըրւեցին, փախան ողջ սարերն ի վեր.

Էնքան գազեցի, որ ելաւ հոգիս,

էլ իսկի տըրեխ չը մնաց հագիս:

—Դաւիթ ջան, ասաւ, էտ շատ է դըժար,

նետ աղեզ եմ ես շինել քեզ համար,

նետ-աղեղդ առ, գընաց որս արա,

ման արի աղատ սարերի վըրա:

Նետ-աղեղն առաւ Դաւիթն Օհանից

հեռացաւ քաղքից, քաղքի սահմանից

ու դառաւ որսկան.

50. Դեպի քաղաք

ա.

Մեծ պասի վերջին շաբաթւայ օրերից մէկն էր. Այս շաբաթ գիւղացիները իրենց բոլոր բարին կրում են քաղաք, որ ծախեն:

Աւետ ապէրն էլ, աքաղաղը կանչելուն պէս, վեր կացաւ
կէս գիշերին, ճրագը վառեց, լւացւեց, երեսը խաչ հանեց ու
սկսեց իր էշերը համետել:

Ամբողջ ընտանիքը դեռ քնած էր, միայն Եղիսարէթը օգնում էր ամուսնուն: Նա դեռ մի օր առաջ պատրաստել էր երկու տիկ իւղ, մի բեռ նոր պանիր, երկու կթոց ձու և մի քանի հատ հաւ, որ մարդը քաղաք էր տանելու:

Աւետը բեռները կապելու վրա էր, որ մութ անկիւնում, անկողինների միջից վեր բարձրացաւ մի փոքրիկ գլուխ:

Նայեց, իսկոյն գլխի ընկաւ ու ասաւ.

—Հօրեղբայր, ինձ էլ պիտի տանես. ես էլ կը գամ:

—Զէնդ կտրի, վէր ընկի, քաղաք գնալդ էր պակաս, —պատասխանեց Աւետը իր գործը շարունակելով:

Տղան լոեց, գլուխը դրեց բարձին, երեսը թաքցրեց վերմակի տակ ու սկսեց խուլ ձայնով լաց լինել: Լացի ձայնից զարթնեց պառաւ Շուշանը, որ պառկած էր միենոյն անկողնում իր թոռնիկի հետ: Նա իմացաւ Կալօի լացի պատճառը:

—Աւետ, որդի, ինչի՞ ես լացացնում խեղճ տղին, —միշամտեց պառաւը: —Տար. էլ ինչիւ ես սիրաը կոտրում:

—Ախար, նրա ինչ քաղաք գնալու ժամանակն է, —պատասխանեց Աւետը աւելի մեղմ ձայնով:

—Հրէն, Պետրոսենց Գիւքին էլ է գնում. նա ինձանից խօմեծ չի, —լսելի եղաւ վերմակի տակից Կալօի լալագին ձայնը:

—Տար քեզ հետ, որդի, —կրկնեց պառաւը համոզելով: —Տար, թող աշխարհ տեսնի. խօ աղջիկ չէ, որ միշտ առիքի տակը մնայ, տնից դուրս չը գայ, տղայ է՝ սիրաը ուզում է, բան կը սովորի, աչքը կը բացւի:

Պառաւի խօսքերը առանց հետեանքի չը մնացին:

—Դէ, վեր կաց գնանք, մի ուշանայ —վճռեց վերջապէս Աւետ ապէրը:

Ի.

Առաջին անգամն էր, որ Կալօն քաղաք պիտի տեսնէր. նրա ուրախութեանը չափ չը կար: Ծտի պէս դուրս թռաւ քնաշորերի միջից, մի քանի րոպէ այս ու այն կողմ վազեց,

ինքն էլ չիմանալով ինչ բանի համար, և յետոյ սկսեց իր երկար ցուպը վնտուել. Կալօի համար երկար պատրաստութիւն պէտք չէր. իր սովորութեան համեմատ առանց հանւելու էր քնել. պէտք է միայն տրեխները հագնէր ու ամեն ինչ վերջացած էր: Արագութեամբ կատարեց բոլորը, մօտեցաւ պառաւ տատին ու փաթաթւեց վզովը.

—Քեզ համար ինչ բերեմ քաղաքից:

Պառաւը ոչինչ չը պատասխանեց, միայն ժպտաց ու համբուրեց նրան:

Աւանակները արդէն բեռնած պատրաստ էին բակումը:

Եղիսարէթը ճրագը ձեռին կանգնած էր այստեղ, իսկ Աւետը մտել էր ոչխարների գոմը: Նա շուտով դուրս եկաւ, բերելով մի չաղ գառը ու կապեց բեռան վրան:

Դեռ բաւական ժամանակ կար մինչև լուսանալը, երբ փոքրիկ քարաւանը ճամփայ ընկաւ:

Շուտով նրանց միացան մի քանի ուրիշ գիւղացիներ, որոնք նոյնպէս ծախելու բան էին տանում քաղաք:

գ.

Եղանակը հանդարտ էր: Աստղերը անուշ ժպիտով փայլում էին պարզ երկնքին: Օգի մէջ տիրում էր գարնանային թարմութիւն:

Կալօն մի քանի հասակակից և իրենից մեծ տղաների հետ քշում էր աւանակները: Նրանց ետևից կամաց-կամաց գալիս էին մեծերը, գալիս էին ու խօսում իրենց ցաւերից, իրենց հոգսերից, իրենց պարտքերից:

Բայց Կալօի ուրախ խումբը առաջ ընկած քշում էր աւանակների քարաւանը, զբաղւած իր խօսակցութեամբ:

—Սաքի, —հարցնում էր Կալօն, —դու քաղաք տեսել ես. ասա տեսնեմ, էնտեղ գառները նրտեղ են արածում:

Սաքին, որ տարիքով իր ընկերներից մեծ էր ու մի քանի տարի մնացել էր քաղաքում, պատասխանեց.

—Քաղաքացիք ոչխար չունեն, գառներ չեն պահում։
 —Բա նրանց տղերքը ի՞նչ են շնում, որ գառներ չեն
 արածացնում, —կրկին հարցրեց Կալօն։
 —Կարդում են։
 —Նրանց տէրտէրը ինչով է ծեծում, երբ դասը չեն իմա-
 նում։
 —Նրանք տէրտէրից դաս չեն առնում, դպրոցումն են
 կարդում։
 —Դպրոցն ինչ է։
 Սաքին չը զիտէր ինչ պատասխանի և ասաւ.
 —Դպրոցը դպրոց է, չես իմանում։
 Մի ուրիշ երեխայ հարցրեց.
 —Քաղաքի տղերքը, ով զիտի, ինչ լաւ տրեխներ կունե-
 նան, չէ։
 —Նրանք տրեխներ չեն հագնում, կօշիկ են հագնում, —
 պատասխանեց Սաքին։
 —Կօշիկն ինչ է։
 —Են էլ քաղքի տրեխ է։
 —Ենտեղ մօշ կայ, զկեռ կայ, —հարցրեց մի ուրիշը.
 —Չը կայ, ծմակը հեռու է քաղաքից։
 —Բա քաղաքի տղերքը ի՞նչ են ուտում։
 Սաքին չէր իմանում, ինչպէս գոհացնի ընկերների հետա-
 քրքրութիւնը։ Նա կարճ նկարագրեց քաղաքի կեանքը, ասաւ՝
 թէ այնտեղ մեծ մեծ տներ կան, շուկայ կայ, թէ եզան ու
 գոմէշի տեղ ձի են լծում, սայլերը ուրիշ տեսակ են, կառք են
 ասում, ու բանեցնում են միայն նստելու համար։ Յետոյ էլ
 աւելացրեց, թէ քաղաքի տղաները գիւղացի տղաներին ծաղ-
 րում են և պատահած ժամանակ էլ ծեծում։
 Վերջին խօսքերը գրգռեցին Կալօի բարկութիւնը և նա իր
 երկայն ցուպը բարձրացնելով սպառնաց։
 —Տեսնում ես մահակս. Էնպէս կը չափեմ նրանց բարակ
 մէջքին, որ «վայ, նանի» կանչեն։

Իսկ հեռուն նրանց առաջ երկում էին արդէն կանաչների
 միջից եկեղեցիների գմբէթները ու մինարէների սուր ծայրերը։
 Մօտենում էին քաղաքին։

- 1) Կալօն ինչ պէտք է պատմի տանը իր նոր տեսած քաների
 մասին։
- 2) Ինչպէս կը նկարագրի քաղաքացի տղան գիտի կեանքը։

51 Ուռենի

Սիրուն ուռենի,	որ էտքան ջահել
կանաչ ուռենի,	գլխիկդ ես ծռել,
ճիւղերդ կախ-կախ,	վշտոտ ես դառել,
ինչու չես ուրախ։	ծնկիդ ես խփում,
Միրտդ է ծարաւել,	արցունք ես թափում։
արևն է վառել,	

52. Գառը մեր տալիս

Կէսօր է արդէն. կանաչ կալւարից
 իջնում է հանգիստ ոչխարը կըթի.
 կըթւելով մաս-մաս, անցնում է բերից,
 լըստում է անուշ վըշշոցը կաթի։
 Հովիւ, հովլուհի նստոտած շարքով
 կըթում են ուրախ խաղ ու ծիծաղով։
 Ահա վերջացաւ ոչխարի կիթը,
 կաթսաներ տարան թարմ կաթնով լիրը.
 մէկն էլ գդակը շարժելով օդում,
 զեռ գառնարածին «հէյ, եկ» է կանչում։

Ու երկար չանցած՝ սարի գագաթին
գառների կայտառ հօտը երևաց,
խառնւելով իրանց մայրերի հօտին
բերկրանքի յոյզով մայում են ցրւած:
Կանչում են, բայում գառըն ու մաքին,
անուշ ձայներով փընտըռում միմեանց.
որը գըտնելով իրա գառնուկին՝
ծըծել է տալիս, փայելով սրտանց.
որը խաղում է մօր հետ կուշտ փորով,
որն էլ մընում է տրխուր մայելով.
և ամեն անգամ գառը մէր տալիս,
կարծես թէ անուշ համերգ են տալիս.

Ինչո՞ւ են ջոկ-ջոկ արածացնում գառնեղն ու մաքիները,

53. Զատիկ

— Զատիկ, Զատիկ, — լսում ես ամեն կողմից:

— Զատիկը գայ, գարունը բացւի, ծառերը ծաղկեն, քեզ
համար նոր շորեր կարեմ, — յոյս է տալիս մայրը իր սիրասուն
զաւակին:

— Զատիկը կը գայ, օրերը կը բաղցրանան, շուտով կառող-
ջանաս, մայրիկ ջան, — մխիթարում է աղջիկը հիւանդի ան-
կողնի կողքին նստած:

— Զատիկը գայ, օրերը ջերմանան, ձեզ հետ միասին գը-
նանք հանդը, վարենք, աշխարհը լիացնենք, իմ սեռուկ գոմ-
շուկս, իմ պոչը ծաղիկ եզներս, — փաղաքշում է գիւղացին իր
հաստավիզ լծկանների մարմինը քորելով:

— Զատիկը կը գայ, դաշտերը կը կանաչեն, ծաղիկներով կը
զարդարւեն, կերէք անուշ խոտը, տըողեցէք ու առատ կաթ-
տւէք, — սիրտ է տալիս խաչնարածը թէ իր հօտին, թէ իրեն.

— Թող մի Զատիկը գայ, պինդ-պինդ ձւերը ջոկենք, ներ-

կել տանք, շխկացնենք, կուեցնենք. — օրեր են համարում
մանուկները:

Մարդ չը կայ, որ Զատիկ չը կանչի. Ամենքը սպասում են
նոր կեանքի, նոր յոյսերի, նոր ուրախութեան ու բնութեան
նոր զարթնումին:

Հը՛, հը՛, դէ՛հ, մեծ պասը գլորւեց. Էլի միայն երկու շաբաթ,
մի շաբաթ. առ քեզ Աւագ հինգշաբթին, Աւագ ուրբաթը և
ահա արդէն իւղահոտը քթներիս դիպաւ. նաւակատիկն է:

Մեր գրացի ազգերը դեռ մի գիշեր էլ պիտի լուսացնեն,
կիրակիի սպասեն Զատիկը տօնելու, իսկ մենք, հայերս, շա-
բաթ օրը, ճաշը թերւեց թէ չէ, տալիս ենք իրար կեանքի
զարթնումի, Քրիստոսի յարութեան մեծ աւետիսը.

«Քրիստոս յարեաւ ի մեռելոց»:

1) Դո՞ւ էլ սպասում էիր Զատիկին: Զատիկը քեզ ինչ սերաւ:

2) Ի՞նչ ասել է «Քրիստոս յարեաւ ի մեռելոց». ի՞նչ լեզով է
այդ լեզուն հիմա հրտեղ ենք գործ ածում:

54. Գարուն առաւօտ

Բարի լուսի զանգեր զարկին

զընզընզալէն անուշ, անուշ:

լուսը բացւեց մեր աշխարհին

ճըղճըղալէն անուշ, անուշ:

Հովտում առուն խոխոջում է

Վըլգըլալէն անուշ, անուշ:

բամին բարակ շընկընկում է

Վըլգըլալէն անուշ, անուշ:

Կոռնկն եկաւ երամ կապած

կըոկըոալէն անուշ, անուշ:

կաքաւ քարին տաղ է կարդում
կըղկըղալէն անուշ, անուշ:

Հարսն ու աղջիկ հանդերն ելան
շորորալէն անուշ, անուշ.
ծաղկանց բուրմունքն անմահական
սըլսըլալէն անուշ, անուշ:

55. Ծիլն ու ապառաժը

.ա.

Եերկ ապառաժի տակ, երկու քարերի մէջ, վաղ գարնան
բուսել էր մի սէզ, մի պարզ, հասարակ, փոքրիկ խոտի շիւղ:

Օրօրւում էր նա նոր ծագող լոյսի մէջ ցողով փայլվը-
լուն, յանկարծ աչքն ընկաւ ժայռի մութ ճեղքին և նկատեց
այնտեղ նոր ելած մի ծիլ:

—Ա՛յ, —գոչեց նա. —դու հվ ես, որտեղից եկար:

Ծիլը, որ արդէն կէս մատնաչափ կար, ցած նայեց, տե-
սաւ վտիտ սէզին ու ասաւ.

—Բարե, բարեկամ, միթէ ուրախ չես, որ քեզ ընկեր եկայ:

—Օ՛, ուրախ եմ, սաստիկ ուրախ, բայց հվ բերաւ քեզ, և
ինքդ հվ ես:

Ծիլը ժպտաց. ժպտաց, օրօրւեց ու այսպէս երգեց.

Ծառի ծիլն եմ ես,
ելայ անտառից,
քամու թեռվը
թռայ դաշտերից,
անցայ սար ու ձոր
եկայ քեզ դրկից:

Յետոյ երգը կտրեց ու հարցրեց.

—Իսկ դժւ ով ես, ընկեր, դժւ որտեղից եկար:
—Օ՛, —ասաւ սէզը, —ես ծնւել եմ այստեղ, իմ մօր կըրծ-

քից, մտել եմ հողի մէջ, քնել ձմեռը, այժմ դուրս եմ եկել,
եղել տանս տէր:

—Դու ուրեմն տուն-տեղ ունես այդտեղ:

—Ունեմ. մի կտոր հող. շատ պահանջկոտ չեմ:

—Տեսնում եմ. իսկ իմ տեղը չափազանց նեղ է և ես
ստիպւած եմ բոլոր ուժս գործ դնելու, քարի կուրծքը մտնե-
լու, որ տեղս քիչ լայնացնեմ:

—Եւ կարողաննեմ ես, —հարցրեց սէզը զարմացած:

—Դժւար է. բայց ուրիշ ճար չը կայ. թէ չէ կը մեռնեմ:
իսկ ես ապրել եմ ուզում:

բ.

Եւ ծիլն աշխատում էր. աշխատում էր մեծանալ, ուժե-
ղանալ ու քարից իրա համար տեղ խլել. նա աշխատում էր
անվերջ, անդադրում, գիշեր ու ցերեկ, անկոտրում յամա-
ռութեամբ:

Ու այդպէս ամիսներ, տարիներ, շատ-շատ տարիներ:

Զմեռը քնում էր, կազդուրւում, իսկ երբ զարունն էր
գալիս, ենում էր աշխուժ, նոր ուժ ստացած արմատները
մեկնում, գործը սկսում:


Երբեմն սնունդը քիչ էր լինում. քամիների ըերած հողն
ու փոշին հերիք չէր անում, երբեմն ամառները անձրւներ
չէին գալիս, քիչ էր մնում յուսահատւի ու չորանայ:

Բայց նորից նոր սիրտ էր առնում. չէնց որ քիչ կազդուր-
ւում էր, նուրբ ու բարակ արմատները խրում էր, խրում ու
աւելի-աւելի խորքերը գնում:

Եւ ինչքան արմատները տեղ էին գրաւում, այնքան բունը
ամրանում էր ու հաստանում, այնքան էլ հպարտ գլուխը վեր
էր բարձրանում դէպի երկինքն ու դէպի արել...

—Տես բարձրը, քարափի ծայրին. տեսնում ես այն խոշոր,
հսկայ ծառը:

Նախկին ծիլն է. նա յաղթել է արդէն. նա ապրել էր ու-
զում և կապրի:



56. Գութան

Լուսը լուսացաւ,
բարին շատացաւ.
վաղ լուսաբացին
գութան լծեցին.
հորովէլ հօ...

Գութանը լարած,
հօտաղը շարած,
մաճկալը մաճին,
ձեռը ականջին.
հորովէլ հօ...

Գութան ջան, վարի.
ակօսը շարի.
թափ տուր, թև արա,
շուր տուր, սև արա.
հորովէլ հօ...

Յանենք, արտ անենք,
հնձենք, տուն տանենք,
ամբարենք մեր հաց.
օրհնեալ է Աստւած.
հորովէլ հօ...

57. Ծոցանուկի

ա.

Գարունքացել էր, աշխարհը կենդանացել. Արևը ծիծաղում էր սար ու դաշտի երեսին և ամենքին տանից դուրս հանում, ուղարկում էր բան ու գործի:

Թաղի գրեթէ բոլոր գեղջկուհիները, մօտ տաս-տասնընդինդ հոգի, կալապանի տակ մի կարպետ էին փռել, վրան ծալապա-

տիկ նստոտել և երանդով աշխատում էին:

Իրար հետ մրցելով՝ որը գուլպայ էր անում, որը գուլպան ասղարուր նախշում, մի երկուսը սանդերքով բուրդ էին զզում, միւսներն էլ ճախարակով թել մանում:

— Անուշ ջան, Անուշ, արի ես ու դու «ծոցանուկի» տանք. տեսնենք՝ ով շուտ կը պրծնի իր բանը, — ոգեորւած առաջարկութիւն արաւ չալտիկ Մանուշը:

— Աչքիս վրա, — պատասխանեց Անուշը — դու էն չուստլիկը չես, որ քեզանից քաշւեմ:

— Դէ, գուլպիդ նշան արա, ես թելս կապ տւի, տեսնենք՝ ով շուտ կը հասնի գուլպի թաթին:

— Շատ լաւ, թող էս կարմիր ծաղիկն էլ իմ նշանը լինի, — ցոյց տալով իր գուլպի նկարը՝ համաձայնեց Անուշը:

Նրանք սկսեցին մէկ-մէկու հետ ձեռագործով մրցել. Երկուսն էլ ճիգ էին թափում, որ միմեանցից առաջ վերջացնեն գործը. ով շուտ կը հասնի պայմանաւորւած նշանին՝ նա էլ կը լինի յաղթողը:

Շէկիկ Շուշիկն էլ գրագ մտաւ Նուշիկի հետ:

— Աղջի Նուշիկ, արի ես մանեմ, դու ինձ համար փաթիւներ գգի, տեսնենք՝ կարմս ինձ հետ լուծը քաշես:

— Օհօ, ինչ մի զօշաղն էլ դու ես, որ չը կարենամ քեզ փաթիւ հասցնեմ, — պատասխանեց Նուշիկը և սանդերքը առաջը քաշելով, մի գունդ բուրդ գրեց կողքին և սկսեց ամենայն արագութեամբ գգել:

Նա գզում էր, Շուշիկը նրա փաթիւները ճախարակով մանում: Երկուսն էլ այնպիսի արագութեամբ էին գործում, որ շատ դժւար էր իմանալ՝ թէ ով ումնից առաջ կանցնի:

Բոլորն էլ յափշտակւած աշխատում էին մեքենայի պէս. աշխատելու ժամանակ էլ շուտ-շուտ կրկնում էին.

«Ով շուտ ու շուտլիկ,
նա կուշտ ու կուշտլիկ,

ով կամաց-թամբալ,
նա պառաւ-համբալ»:

Բ.

Երկար ժամանակ զգեցին ու մանեցին, գործեցին ու կարեցին, և մէկ էլ յանկարծ Մանուշը նշանին հասնելով՝ ոգեւորւած ճչաց.

—Անոնց, Անոնց, պառաւը ծոցդ, քոռ պառաւը ծոցդ, ես պրծայ:

Այսինքն թէ՝ «Արդէն պառաւել ես և անշնորհութիւնը ծոցդ է թափել ու թուլացրել քեզ»:

—Ես էլ պրծայ, հրէսիկ պրծնում եմ,—կարմրած պատասխանեց Անուշը:

Բայց ընկերներն էլ էտ էին ուզում. դէհ, ծափ տւին ու ասին. «Անուշը պառաւել է, մեր պառաւից առաւել է»:

Ասին ու կրկնեցին և կուշտ-կուշտ ծիծաղելով՝ այնուհետեւ սպասում էին ուրիշի յաղթւելուն...

Օրը թեքւել էր, արեւը յոգնել և չէր կարողանում այլևս իրիկնադէմի զով քամուն դէմ դնել, իսկ Շուշիկն ու Նուշիկը դեռ շարունակում էին իրենց մրցութիւնը. այնպէս էլ ոչ մէկը չը կարողացաւ միւսին «պառաւը ծոցն» անել:

Գեղջկուհիները ուրախ-ուրախ վերջապէս ցրւեցին իրենց տները. ամեն մէկը գրեթէ երկու աշխատաւորի ձեռադործ էր արել:

Իսկ տղերը աշխատանքի ի՞նչ տեսակ մրցութիւններ ունեն:

58. Փոքրիկ երկրագործ

Եկաւ գարուն, եկան հաւքեր,
տաքցաւ արեւ, գըլգըլան ջրեր.
Եկան վարի-ցանքի օրեր:
Կոռւնկն ամոլ արեցի,
սագերն հորիք լըծեցի,

Ճնճղուկն հօտաղ վարձեցի,
կարաւն հացւոր բոնեցի,
արտ ունէի՝ վարեցի,
ցորեն, գարի ցանեցի:

Ո՞րտեղ էր նրա արտը:

59. Մի կտրիճ

ա.

Գարնանամուտ էր:

Բարձր սարերում հալւում էր ձիւնը և հազարաւոր խըշ-խըշուն վտակներ աղմկում էին, գլորւում ցած:

Գետը ազատւել էր սառցէ կապանքից, փրւել, վարարել: Բարձր կոհակները գնում էին գալիս, ելնում ու իջնում ահա-պին աղմուկով:

Գետի վրա ձգւած էր մի կամարակապ երկար հին կա-մուրջ:

Ահա մօտենում է կամուրջին մի գիւղացի. հետն է կինը՝ մանուկը գրկած: Ուզում են անցնեն էն միւս ափը:

—Է՞յ, գիւղացի, զգնուշ, կամուրջը խարխուլ է:

Սառուցի կոյտերը գալիս են զարնուում կամարների քա-րերին, գիգլում ու գիգլում. ջուրը յորդանում է:

Եւ գիւղացին շտապում է, որ շուտով անցնի:

Արդէն քիչ էր մնացել, մի տասը քայլ, որ հասնէին ափին, յանկարծ պոկ է գալիս ու փլում է կամարի այն մասը, որ միացած էր հողին: Գիւղացին ու կինը սարսափահար վազում են դէպի հակառակ կողմը: Բայց հազիւ են մի քանի քայլ անում, նրանց առջև դղրդիւնով քանդւում է միւս կողմի կա-մարն էլ:

«Աստւած իմ, դու փրկես մեզ,—կանչում է խեղճ գիւղացին յուսահատ. լալիս է կինը, ճշում երեխան. Ոռնում է գետը, սուլում է քամին, և այդ աղմուկի մէջ կորչում են թշւառների աղեկտուր ձայները.

Մէջտեղը կանգուն է միայն հիմնական սիւնը, որի վրա յենւած էին երբեմն երկու կողմից զոյգ կամարները. Եւ ահա այդ կտորի վրա պատսպարւել, կուչ են եկել գիւղացին ու կինը՝ երեխան գրկած:

Պ.

Գետի երկու ափին խմբւել են մարդիկ: Գոռում են, գոչում, դէս ու դէն վազում. բայց նրանցից ոչ ոք չի համարձակում օգնութեան համնել...

Ահա նժոյգ ձին հեծած, սրարշաւ գալիս է իշխանը ու ձեռքին բռնած մի քսակ ոսկի՝ բարձր ձայն է տալիս.

—Հարիւր ոսկի նրան, ով որ կը փրկի այդ զժբախտներին:

Ամբոխը կարկամած ու լուռ կանգնել է. Մեծ է վտանգը և վարանելու ժամանակ չը կայ. վարարած գետը ցնցում է վերջին սիւնը:

—Է՞յ, մարդիկ, ով է սրտոտը ձեր մէջ,—կրկնում է իշխանը ու թափահարում քսակը ձեռքին:

Լսում են ամենքը, լուռ են ու անշարժ, կարծես քարացած...

Դ.

Ափով գալիս էր մի յոզնած ձիաւոր, մի յաղթանդամ երիտասարդ, գալիս էր հեռուներից. Նա տեսաւ թէ չէ սոսկալի պատկերը, վայր թռաւ ձիուց, խաչ հանեց երեսը, ցատկեց ափին կապած նեղ ու փոքրիկ մակոյկը ու սկսեց թիավարել:

Խփում են ալիքները, զարնւում են սառուցի խոշոր կըտորները, ծռում նաւակը, քշում դէս ու դէն. բայց երիտա-

սարդը թիավարում է, թիավարում է անընդհատ, ուժեղ ու յամառ...

Ահա հասաւ կամուրջի մնացորդին. Ափից ամենքը ուրախութեան ձիչ են արձակում: Երիտասարդը ամուր բռնած սիւնի բարերից՝ օգնում է որ մակոյկն իջնեն գիւղացին, կինն ու երեխան:

Նստեցին թի չէ՝ առնում է նորից թիերը. և հազիւ հեռացած կամուրջից, ուժգին թափով շուռ է գալիս ահազին



սիւնը ու թաղւում ջրի մէջ:

Իսկ ամբոխը շունչը պահած հետեւում է նաւակին, որ հոսանքի հետ կուելով, կուելով սառուցի կոյտերի հետ, աշխատում էր եղերքին մօտենալ:

Բերկրանքի աղաղակը դուրս է թըռչում հարիւրաւոր բերաններից. ամենքը շտապում են օգնեն մակոյկը դէպի ափը բաշելու և հարիւրաւոր բերաններ երիտասարդ օտարականի գովքն են անում:

—Մօտեցիր այստեղ, —կանչում է իշխանը.—դ՛ւ, քաջ մարդ ու անվեհեր հերոս. առ այս քսակը. թող սա լինի բեզ պարզե:

—Իմ կեանքը, իշխան, ես ոսկով չեմ ծախում. տւէք այդ
ոսկին թշւառ գիւղացուն,—ասում է անցորդը, հեծնում է իր
ձին, քշում ու անհետ կորչում բլուրի ետև.

—Ո՞վ է դա, որտեղից և հւր չքացաւ,—հարցնում էին
ամենքը իրար:

Եւ մէկ պատասխան ունէին միայն.

—Մի կտրիճ էր...

1) Ի՞նչ տարբերութիւն կայ իշխանի ու այս օտարականի մէջ:

2) Ինչի՞ մէջն է օտարականի կտրմութիւնը, իսկ ինչի՞ մէջն է
նրա մեծութիւնը:

60. ԱՌ, սեւ ամպեր

ԱՌ, սև ամպեր, վայ սև ամպեր,
սիրտս պատեց սև ու մութ.
արդեօք ի՞նչ էք դուք ինձ բերում,
դարնան անձրկ թէ կարկուտ...

Յուսով-լուսով արտ եմ ցանել,
արիւն թափել ու բըրտինք,
ողջ սուրբերին մոմ եմ վառել,
աղօթք արել, որ երկինք
արտիս նայի, տանս խնայի,
օր տայ, կեանք տայ իմ հացին.
վայ բալէքիս... Աստւած չանի,
թէ որ անհաց մնացին...

ԱՌ, սև ամպեր, ի՞նչ էք գոռում,
սիրտը պատեց սև ու մութ.
արդեօք ի՞նչ էք արտիս բերում,
դարնան անձրկ թէ կարկուտ...

61. Կարկուտը

ա.

Սև ու ծանր ամպերը սարի ետեից դանդաղ եկան, դիզ-
ւեցին ու կախ ընկան երկնքից. խորին մթութիւնը ամեն ինչ
պատեց:

Յանկարծ որոտաց երկինքը, երկիրը դորդաց, ցոլաց վայ-
լակը, կայծակը խփեց, մոնչեց քամին, ծառերը դողացին, թե-
քեցին գլուխները. խոշոր ու ծանր կաթիլները ընկան տերե-
ներին:

Անձրել սաստկացաւ. անձրեի ետեիցն էլ սառցէ գնդակ-
ներ, շըրը իսկ հա շըրը իսկ, թակեցին գետինը յորդ և ուժեղ:
թակում են, թակում, սար ու ձոր ծածկում, ոչ դաշտ են
հարցնում, ոչ արտ ու այգի:

բ.

Ամեն տեղ շփոթ ու իրարանցում: Հօտը ցրւում է, նա-
խիրը փախչում, ձիերը խրտնած դէս ու դէն են վազում,
թոշունները պահւում իրենց բներում. հորթարած, փայտ-
հատ, ամենքը իրենց գործերը թողած՝ թփերի տակին ապաս-
տան են վնտոռում:

«Կարկուտ, ախ ինչ կարկուտ,—կանչում են գիւղացիք ի-
րենց գոանը կանգնած,—այս ինչ պատիժ է»:

Ծերը ծնկաչոք, արցունքը աչքին Աստւած է կանչում.
պառաւը երկաթէ կասկարան հանում շպրտում է բակը ու
նզովք է կարդում. հարսներն ու աղջիկները պատի տակ շար-
ւած սուր դանակներով կարկուտ են կտրում ու նայում եր-
կինք. իսկ երկրագործը կանգնած է անձար, ձեռքը ծոցում,
շարժում է գլուխը ու ախ բաշում:

գ.

Կարկուտը դադարեց, լոեց որոտը, ամպերի ձեղքից նա-
յեց արել, երկիրը ժպտաց, նորից վայլ առաւ:

Այգեպանը վազեց իր այգին, նայեց իր շուրջը և գլխին

տւաւ։ Ծառերը տերևաթափ ու ճղակոտոր, պտուղները փլուած գետնին..,

—Ափսոս իմ այգի, ափսոս իմ աշխատանք, —հեծեց նայուսահատ ու աչքերը լցւեցին։

Որտատէրը վազէվազ իր արտը հասաւ։ Հասկերը ջարդւած, հողին հաւասար, ցեխն ու աւազը արտումը կիտւած... Ոտքերը թուլացան, աչքերը սեացան. քարացած մնաց։

1) Էլ ուրիշ ի՞նչ մեծ չարիքներ գիտես, որոնք ոչնչացնում են հողագործի աշխատանքը։

2) Մարդիկ կարողանում են կուել այդ չարիքների դէմ, եւինչով։

62. Ճանձ

Խոնարհ ու հեղ
մի յոգնած եղ
արօրն ուսին,
ճանճը պողին,
մի իրիկուն
գալիս էր տուն։
Մին էլ ճամփին
մի ուրիշ ճանճ
էն նստածին

Էս առակը ի՞նչ է ուզում ասել։


ասաւ. «Տօ մանչ,
էս եղան հետ
որտեղից էտ»։
Նա՝ ցից արած
քիթը ասաց.
«Մենք որտեղից.
վարում էինք,
վարատեղից»։

63. Փակւած ու ազատ

Փակւած վանդակում
սոխակ էր երգում,
նրա երգերից
լաց-ողը էր լըսւում։

Ազատ երկնքում
ծիծառ էր թրոշում
նըրա երգերից
բերկրանք էր հընչում։

64. Բանտի պատուհանին



Մի մեծ քաղաքում, նեղ ու ամուր բանտի մէջ նըստածէր մի խեղճ բանտարկեալ. Երկար տարիներ նստած էր նա այնտեղ, հիւանդ ու տրտում։ Ամբողջ օրը կանգնում էր նեղիկ պատուհանի առջև, նայում էր դրսի աշխարհին ու կարօտով մտածում իր սիրելիների մասին, իր փոքրիկ զաւակների մասին։ Մտածում էր՝ գուցէ վաղուց արդէն ամենքը մոռացել են իրեն ու մեռած են համարում։ Մտածում էր՝ արգեօք ի՞նչ է կատարում այնտեղ, դուրսը, իր հայրենիքում։

Մի երեկոյ էլ, երբ արել մայր էր մտնում, նա մօտեցաւ պատուհանին։ Պատուհանի դիմաց հանդարտ սաւառնում էր արծիւր։

—Արծիւ, արծիւ, —կանչեց բանտարկեալը. —Արի, նստի պատուհանիս, պատմի՝ թէ ինչ է կատարուում աշխարհում, մի երգ երգի ինձ համար։

—Ոչ, —պատախանեց արծիւը, —քո պատուհանը շատ է նեղ, նստելու տեղ չը կայ ինձ համար։ Ես չեմ կարող քեզ պատմել թէ ինչ է կատարուում աշխարհում։ Ես սակաւ եմ իջնում ներքեւ։ Ես իմ բունը շինում եմ բարձր ժայռերի ու գարաւոր կաղնիների վրա։ Ես թռչում եմ բարձր, բարձր, և իմ երգը միայն անմահ արևն է լսում։

Ու լայն թերը թափահարեց, վերացաւ դէպի ամպերը:
Բանտարկեալը դարձաւ ծըտերին, որոնք պատուհանի
շուրջը գնում էին գալիս:

—Ճնճղուկներ, այ ճնճղուկներ, եկէք նստեցէք պատու-
հանիս, դուք պատմեցէք՝ ինչ է կատարւում աշխարհում. Մի
երգ երգեցէք ինձ համար.

—Ծիւ, ծիւ, մենք ժամանակ չունենք: Մենք գործ ու-
նենք: Մենք գնում ենք հաւաքելու ջաղացպանի թափած հա-
տիկները,—ծլւլացին ճնճղուկները ու փախան:

բ.

Այն ժամանակ թռաւ եկաւ մի գեղեցիկ թռչնակ, պտըտ-
ւեց բանտի պատուհանի առջև ու նստեց երկաթէ ձողի վրա:

—Բարով եկար, իմ սիրուն սոխակ: Շնորհակալ եմ որ ինձ
այցելեցիր: Պատմի՝ ինչ է կատարւում աշխարհում, մի երգ
երգի ինձ համար:

—Ես կը պատմեմ քեզ, թէ ինչ է կատարւում աշխար-
հում, ես կերգեմ քեզ համար,—պատամանեց սոխակը.

Եւ այնպէս սրտալի երգեց, որ խեղճ բանտարկեալը ու-
րախութիւնից լաց եղաւ: Ընկաւ ծղօտի վրա, անվերջ լաց էր
լինում ու լաց էր լինում:

«Երէկ, լուսագէմին,—երգում էր սոխակը,—այնպէս զով
էր ու թարմ: Ես թռայ իջայ քո տնակի առջև, պարտէզը,
նստեցի կանաչ թփին, բաց պատուհանի դէմ ու երգում էի:

«Նոր զարթնել էր քո փոքրիկ տղան ու հարցնում էր՝
ուր է հայրիկս, մայրիկ, երբ կը գայ հայրիկս»:

«Քո հարազատները միշտ յիշում են քեզ ու լաց են լի-
նում, քեզ շատ են կարօտել. սպասում են քեզ ամեն օր:

«Մի վհատի. Աստւած տեսնում է, որ անմեղ ես դու, կա-
զատւես այս բանտից, կը տեսնես քո տունը, քո ընտանիքը,
ու գարձեալ կապրես, ինչպէս ապրում էիր մի ժամանակ,

«Ամառայ խաղաղ երեկոներին քո կնոջ հետ կը նստես

ձեր դուանը, երեխաներդ աղմուկով շուրջդ կը խաղան, իսկ
պարտէզում, կանաչ թփի վրա կը թառեմ ես ու կերգեմ ձեզ
համար»...

Սոխակը երգում էր, իսկ բանտարկեալը երեսնիվայր ըն-
կած իր ծղօտէ անկողնի վրա լաց էր լինում, լաց էր լինում
յուսով ու կարօտով...

Սա ի՞նչ սոխակ է, որ այդպէս բանտարկեալի սրտիցն է խօսում,
եւ ո՞րտեղ է ապրում այդ սոխակը:



65. Արտուտի երգը

Մի մարդ տեսաւ գարնան մարգում
ոնց է արտուտն անուշ երգում,
վեր ճախրելով,
ճռւողելով:

«Սա որ, ասաւ, էս վայրի տեղ
երգ է ասում էսքան շքեղ,
հապա թէ մեր տանը լինի:
ինչ գրախտի ձայն կը հանի»:
Բոնեց մարգի սիրուն երգչին,
տարաւ փակեց վանդակի մէջ:
Թռչնակը լուռ նայում էր խեղճ
հեռնեւ, հեռնեւ ճոխ մարգերին.
միտն էր բերում կեանքը նախկին,
ու էն կեանքի հուը կարօտով,
նեղ վանդակում, կոտրած
սրտով,
երգում էր երգն իր գերու-
թեան:

66. Մայիսը

Ճամփայ տւէք, սս ու ու դաշտեր,
ճամփայ բացէք էն հիւրին.
Նա թերում է ձագեր, թիթեռ,
նաշխուն օրեր մեր երկրին.

Ալւան-չալւան գորգի վըրով
տեսէք հիվ է գալիս էս.
Նուշիկ-մուշիկ, նազ ու թուղով,
սիրուն դէմքով ժպտերես.

Դուրս են գալի նրա առաջ
գառնուկ, թոչնիկ, մարդ, ծաղիկ,
հազար գոյնի շորեր հազած,
երգ ու տաղով գեղեցիկ:

Ճամփայ տւէք, ծառեր ու խոտ,
մեր անուշիկ էտ հիւրին,
նա մայիսն է ցողոտ-շաղոտ,
ամիսների թագուհին:

67. Ճերմակը

ա.


Արագած սարի լանջին երամակի ամենից գեղեցիկ ձին,
ամենից կայտառը Ճերմակն էր.

Երբ արշալոյսին պահապանները հեռու էին քշում ձիերը
օրաների մօտից և օդի մէջ թրխկում էին նրանց երկար մըտ-
րակները, ամբողջ երամակը սլանում էր լայնատարած մարգա-
գետնով. ու ամենից առաջ սլանում էր Ճերմակը նետի պէս,
ոտները գետնից կտրած, փարթամ բաշն ու ճոխ պոչը տւած

քամուն. Սլանում ու յանկարծ կանգ էր առնում, բարակ ոտ-
ներով գետինը փորում, ականջները սրում, լայն կրծքով խո-
րը ներս ծծում առաւտեան թարմ օդը և ուրախ խրխնջում
արևի առաջին շողերի հանդէպ:

Նրա ողորկ մազը պողպատի պէս փայլվլում էր արևի ոս-
կեգոյն ճառագայթների տակ և աչքերը վառւում էին ազա-
տութեան բոցերով:

Մէկ էլ ծառս էր լինում, թափէթափ էր տալիս լայն ճա-
կատը, ցատկում ընկերներից հեռու ու վստահ առանձին ա-
րածում: Ոչ գայլը, ոչ էլ մի ուրիշ գազան չէր համարձակ-
ւում մօտենայ. նրա բացին պառկեցնում էր յանդուգնին
տեղն ու տեղը:



Եւ ուժեղանում էր ու օրէցօր գեղեցկանում Ճերմակը,
Արագածի դալար բարձունքներում, ազատ ու երջանիկ:

բ.

Մի օր մի խումբ ձիաւորներ մտան երամակը ու աշխա-
տում էին մօտենան Ճերմակին: Մէկ թոփչքով խոյս տւաւ
նրանցից Զիաւորները ընկան ետեիցը. Ճերմակը քամու պէս
սլանում էր: Ճկուն մարմինը ծածկեց սպիտակ փրփուրով.
իսկ ետեից շարունակ լսում էր հետապնդողների սմբակների
դոփիւնը: Հետզնետէ դանդաղում էր նրա վազքը ու մի ձիա-
ւոր արդէն հասնելու վրա էր: Ճերմակը յանկարծ մի այն-
պիսի քացի հասցըեց նրան, որ մարդն ու ձին միասին գլոր-
ւեցին գետին: Հպարտ, իր յաղթութեամբ զմայլւած, վերբարձ-

ըացրեց ձերմակը իր գեղեցիկ գլուխը։ Եւ հէնց այդ ըոպէին պարանի մի կլոր օղակ օդի մէջ վզզաց ու գրկեց նրա երկար վեզը։

Նժոյգը փորձում էր փախչի, թափ էր տալիս պարանը վզից. օդի մէջ քացի էր տեղում, բայց քանի աւելի էր ճզնում պարանը կտրի, այնքան աւելի ու աւելի ուժեղ էր թոկը սեղմում նրա կոկորդը ու խեղդում։ Ձերմակի շունչը կըտրում էր, կուրծքը փրւում, աչքերը լցւեցին արիւնով. ազատ սարերը, պայծառ աշխարհը մթնեց գլխին, և նա ուժասպառ չոքեց…

Իսկոյն նրան շրջապատեցին, կապեր ձգեցին նրա գնչին, բերանը մի կտոր երկաթ դրին ու պարանը թուլացրին։ Երբ ձերմակը նորից վեր թռաւ, մի մարդ ամուր բոնել էր սանձի ծայրից և փաղաքշելով շոյում էր նրա ճակատը, դունչը, լայնացած որնգները։

Ձերմակը սաստիկ յոգնած էր ու հեռում էր. իսկ երկաթը սեղմում էր լեզուն, ցաւեցնում։ Բաւական ժամանակ ման ածեցին նրան, տարան գետը ջրելու, ապա ոտները բխովեցին, հանեցին սանձը ու թողին, որ արածի։

Ձերմակը գլուխը դարձրեց հեռուն, ազատ արածող իր ընկերներին, կանչում էր նրանց ու խրխնջում այնպէս կարոտով, այնպէս սրտառուչ…

գ.

Ամեն օր գալիս էր մի մարդ, սանձը զցում նրա բերանը ու երկար պարանի ծայրից բոնած՝ ստիպում էր ձերմակին որ պտոյտ-պտոյտ շրջան անի, չարչարում էր, յոգնեցնում, յետոյ շոյում, փաղաքշում, ջրում, նորից բխովում և թողնում որ արածի։

Մէկ անգամ էլ եկաւ մարդը, ձիու մէջքին մի ծանր բան զցեց ու փորից կապեց։ Ձերմակը հետաքրքրութեամբ նայում էր թէ ինչ պիտի լինի. յանկարծ մարդը թռաւ, հեծաւ թամբին, ոտներով ամուր հուպ տռաւ ձերմակի կողերը

ու քաշեց սանձը…

Ձերմակը կատաղեց։ Նրա սիրտը լցւեց մի անզուսպ ցանկութեամբ. ուզում էր կտրտի, պատառ-պատառ անի գլխի, բերնի, փորի կապանքները, վայր զցի մէջքի ծանրութիւնը, ազատւի ու փախչի ազատ մարգագետինները, զնայ խառնւի իր ընկերների երջանիկ երամակին։

Ծառո-ծառս էր լինում, քացի էր տեղում, ամբողջ մարմինը թափ էր տալիս, ատամներով փորձում էր հեծնողի ոտները կծի, ետևի սմբակներով աշխատում էր փորի գոտին արձակի…

Բայց մարդը ամուր կպած էր նրա մէջքին, սեղմում էր կողերը, ձիգ քաշում էր սանձը, պատում շրթունքները, ցաւեցնում լեզուն…

Այն ժամանակ ձերմակը խելակորոյս առաջ նետւեց, սլացաւ արագ, ինչպէս այն երջանիկ օրերին, երբ սլանում էր ընկերների հետ ազատ երամակում։ սլացաւ՝ գլուխը կորցրած, խրտնած, սարսափահար…

դ.

Անցան օրեր, տարիներ, ազատասէր ձերմակը, էն Արագածի պարծանք ձերմակը, այժմ սանձած, պայտած, թամբած, հանգիստ կանգնած էր մութ ախոռում։ իր բարի աչքերը շարունակ դարձնում է դէպի դուռը և անհամբեր սպասում է տիրոջ երևալուն։

Եւ հեռուից լսում է թէ չէ տիրոջ ոտնաձայնը, ազնիւ նժոյգը բարձր խրխնջում է ուրախութիւնից, խրխնջում է ու կանչում, կանչում է որ գայ, իրեն շոյի, փաղաքշի ու հանի դուրս, լոյս աշխարհը…

1) Զին ինչո՞ւ է ուզում ազատ լինել։ Մարդն ինչո՞ւ է ուզում նրան սանձել։

2) Մարդիկ ինչպէս են անւանում ազատ կենդանիներին, ինչպէս են անւանում հպատակ կենդանիներին։

68. Վարդը

Փոքրիկ տղան մի վարդ տեսաւ,
տեսաւ մի վարդ դաշտի միջին.
Վարդը տեսաւ, ուրախացաւ,
մօտիկ վազեց սիրուն վարդին.
սիրուն վարդին, կարմիր վարդին,
կարմիր վարդը դաշտի միջին.



Տղան ասաւ.— «Քեզ կը պոկեմ,
այ կարմիր վարդ դաշտի միջին»:
Վարդը ասաւ.— Տես, կը ծակեմ,
որ չը մոռնաս փըշոտ վարդին.
փըշոտ վարդին, կարմիր վարդին,
կարմիր վարդը դաշտի միջին:

Ու անհամբեր տղան պոկեց,
պոկեց վարդը դաշտի միջին.
փուշը նըրա ձեռը ծակեց,
բայց էլ չօգնեց քնբուշ վարդին.
քնբուշ վարդին, կարմիր վարդին,
կարմիր վարդը դաշտի միջին.

Փուշն ինչի՞ համար է:

69. Թաւաւագ մեղուն

ա.

Անտառի խորբում մի հոկայ ծառի փչակում մեղուները
շինել էին իրենց փեթակը:

Փեթակի բազմաթիւ փոքրիկ խցիկները, որոնք մոմից էին
ձուլւած, բոլորն էլ լիքն էին: Նրանց մէջ կամ ոսկի մեղրն էր
պահւած, կամ սպիտակ ձւերն էին, կամ թրթուրները իրենց

պատեանների մէջ փաթաթւած:

Այդ պատեաններից մէկի միջիցն էր ահա, որ դուրս սո-

ղաց մանուկ մեղուն ու գլուխը հանեց բժիճից:

իսկոյն նրա դէմը վազեց դայեակ մեղուն:

— Ո՞, բարե, փոքրիկս. գալուստդ բարի. Էտ ինչ սիրուն
ես, ինչ թաւ մազեր ունես, եկ անունդ գնենք թաւամազ:

Ասաւ ու սկսեց լիզել նրան. մաքրեց, յարդարեց ու ա-
ռատ կերակրեց մօտի մեղրի պաշարից: Եւ երբ թաւամազը
լաւ կշտացաւ, դայեակը տարաւ նրան փեթակի դուռը:

Աստւած իմ, ինչ լոյս էր, ինչ պայծառ: Թաւամազը իս-
կոյն բացաւ թևերը ու թռաւ թէ չէ՝ տեսաւ իր շուրջը կա-
նաչ, անվերջ դաշտեր, իսկ վերեր մաքուր, կապոյտ երկինք.
և ինչ անուշ բուրում էին ծառերն ու ծաղիկները:

Մեղուն սլացաւ և հրճւանքի պտոյտներ էր անում օդի
մէջ:

բ.

— Եյ, բարեկամ, ինչ բանի ես այդտեղ,— հարցրեց պա-
ռաւ մեղուն:

— Զւարձանում եմ, — պատասխանեց թաւամազը:

— Զւարձանում ես. թէ Աստւածդ սիրես,—
հեզնեց պառաւը. — Բոլորս այժմ աշխատում ենք,
ինչ բէֆի ժամանակ է. այդպէս առոյգ, այդպէս
առողջ. մազերդ էլ այդպէս թաւ, ծաղկի փոշին
իսկոյն կը կպչի. Թոք ետեիցս. ես քեզ կը սովո-
րեցնեմ:

Մեծ մեղուն այնպէս արագ էր թռչում, որ
թաւամազը հազիւ էր կարողանում ետեից հասնի:

Մեծ մեղուն շիտակ մտաւ մի ահագին կա-
պոյտ ծաղկի բաժակը, սկսեց ծծել յատակի մեղ-
րը. քսեց ետեի ոտներին ու գնաց ծաղկի դեղին
փոշու ամանների մօտ, վերցնում էր դեղին փո-
շին ու քսում մեղրոտ ոտներին:



Թաւամազը նոյնն էր անում: Յանկարծ որ չը նայեց իրեն
ու պառաւ մեղւին, ծիծաղը պահել չը կարողացաւ: Երկուսն
էլ կարծես դեղին վարտիքներ էին հագել:

—Հը, հաւանեցի՞ր վարտիքդ,—ասաւ մեծ մեղուն.—Դէ,
գնանք տուն:

Հազիւ էին փեթակ մտել, որ փեթակի բոլոր դայեակներն
ու բանւորները վրա թափեցին:

—Վայ, պահապաններ, օգնեցէք, վարտիքս կերան, վար-
տիքս:

Բան չը կայ, բաղցած են,—ասաւ մեծ մեղուն:—Դէ,
լաւ, բաւական է,—դարձաւ միւսներին և առաջնորդեց Թա-
ւամազին շտեմարանը և ցոյց տւաւ, թէ ինչպէս պէտք է ածի
մեղը մոմէ բճիճների մէջ:

Ու Թաւամազը դարձաւ մեղը հաւաքող: Յոգնեցնող աշ-
խատանք էր, ճիշտ է, բայց աշխատանք էր. և ինչ լաւ ու
կարեոր բան էր այդ աշխատանք ասւածը:

Գ.

Այսպէս էլ մի անգամ, երբ Թաւամազը բեռնաւորւած
դաշտից տուն էր գառնում, տեսաւ փեթակի շուրջը մի ան-
սովոր իրարանցում. լսում էր սաստիկ բզզոց ու մի սարսա-
փելի գոռոց:



Էր վրա տւել: Եւ ինչ թշնամի. ինքը արջը:
Ետեկի թաթերի վրա կանգնած, նա մըթմըթալով ման էր

գալիս ծառի շուրջը, իսկ առջնի թաթերով աշխատում էր
հասնի մեղրի պահեստին:

Յանկարծ քաշեց, պոկեց ծառի կեղևի մի կտորը, որտե-
ղից դուրս թափւեցին ներսը մնացած մեղուները: Արջը մի
թաթով պաշտպանուում էր նրանց յուսահատ յարձակումից,
իսկ միւս թաթը կոխում էր փեթակի խորքը, ուր մեղրի շտե-
մարանն էր, հանում էր դուրս ու ագահաբար կուլ տալիս
անուշ ոսկեզրյն մեղրը:

Այս որ տեսաւ Թաւամազը, էլ իրեն զսպել շըկարողացաւ,
կատաղած նետւեց արջի վրա ու խայթեց ուղիղ աչքը: Արջը
մոնչաց սաստիկ ցաւից, թողեց փեթակը ու փախաւ:

Բայց խեղճ Թաւամազը... իր զայրոյթից այնպէս խորն
էր խայթել, որ խայթոցը մնացել էր աչքի մէջ: Խեղճը յան-
կարծ թուլացաւ, ընկաւ գետին իր նման նահատակների մօտ
ու աչքերը յաւիտեան փակեց:

Բայց մեռնելիս նա չէր զզնում իր արածի վրա. չէ որ
փեթակի ազատութեան համար էր զոհել իր կեանքը, իր տան
համար, իր հայրենիքի:

Չէ որ՝ «ամենքը մէկի համար, մէկը ամենքի»:

Բացի փեթակից ուրիշ ի՞նչ տեղ գիտես, ուր «ամենքը մէկի հա-
մար են ու մէկը ամենքի»:

70. Գարուն իրիկուն

Հուսնակն անուշ, հովն անուշ,
շինականի բունն անուշ,
ծագեց լուսնակն երկնուց,
հովեի սրինգն էր անուշ:
Հօտաղն եզներն կարածէ,
մաճկալ պառկել, բունն անուշ,
զըղղըղուն բամին կը փըշէ,

ծովային հովն է անուշ:
Դաշտեր ձորեր մընջել են,
ջըրեր զլլան, ձէնն անուշ.
Հաւըեր թուան իրենց բուն,
բլբուլի տաղն էր անուշ.
անմահական հոտ բուրէր,
բեաֆուր վարդի հոտն անուշ:

71. Մուտլիկ որսկանը

Հօրս կնունքով, մօրս ծնունդով, վեր կացանք մի օր հինգ
ու վեց հոգով, թրով հրացանով որսի գնացինք։ Հաղին էր, Հիւղին
էր, Զատին էր, Մատին էր, հէրս էր, ես էի. գնացինք որսի...
Սարեր, ձորեր շիտակ գնացինք. որտեղ որս կար՝ սուս ու
փուս գնացինք, որտեղ ահ էր՝ կուզ ու կուզ գնացինք...

Գնացինք, գնացինք, շատ թէ բիշ, մին էլ տեսնենք երեք
լիձ. երկուսը ցամաք, մընի մէջ էլ իսկի ջուր չը կայ:

Մին էլ ըհը, մտիկ տանք որ էս անջուր լճում լողում են,
ճըչում երեք հատ սպիտակ բադ. երկուսը սատկած են, մինն
էլ կենդանի չէ.

—Հաղի, տնւր հա, տնւր.

Թէ՛ հրացան չունեմ.

—Հիւղի, տնւր հա, տնւր.

Թէ՛ ես էլ չունեմ.

—Զատի... Մատի...

—Մենք էլ չունենք:

—Բա ի՞նչ անենք:

Հօրս ձեռին կարճ ու երկար, հաստ ու բարակ մի փէտ
կար. երեսն առաւ, նշան դրաւ, մին էլ՝ տրաք, որ կրակեց...
Նա կրակեց, ես զարկեցի. որ զարկեցի՝ փուեց էսպէս, —ամեն
թէը հինգ գազ ու կէս...

—Հաղի, դանակ...

—Թէ՛ դանակ չունեմ.

—Հիւղի, դու...

—Ես էլ չունեմ.

—Զատի... Մատի...

—Մենք էլ չունենք:

—Բաս ի՞նչ անենք.

Հէրս էլ ունի, բերան չունի:

Էս անբերան դանակը բաշեցինք. Հաղին մորթեց, չը կա-
րաց. Հիւղին մորթեց, չը կարաց. Զատին չը կարաց, Մատին
չը կարաց, հէրս էլ չը կարաց. Ես բաշեցի մորթեցի:

Մորթեցի, վէր զցեցի. բադ մի ասիլ—մի գոմէշ ասա:
Հաղին շալակեց, չը կարաց. Հիւղին շալակեց, չը կարաց. Զա-
տին չը կարաց, Մատին չը կարաց, հէրս էլ չը կարաց, ես
շալակեցի. Շալակեցի, գնացինք:

Գնացինք, գնացինք, հասանք մի տեղ. մին էլ տեսնենք
երեք գեղ. երկուսի տեղն իսկի չի երևում, մընումն էլ իսկի
շէնլիկ չը կայ: Էս անշէն գեղում դէս ման եկանք, դէն ման
եկանք, մի տուն գտանք, մէջը երեք պառաւ. երկուսը մե-
ռած, մընի բերնումն էլ շունչ չը կայ:

—Ծղերք, ասինք, եկէք բադով փլաւ անենք:

Էս անշունչ պառաւը գնաց, դէս ման եկաւ, դէն ման ե-
կաւ, կէս բրինձ գտաւ, երեք պղինձ. երկուսը ծակ, մինն էլ
իսկի տակ չունի:

Զուրը լցրինք էս անտակ պղինձը, մէջը ածինք բադն ու
բրինձը, անկրակ եփեցինք: Եփեց, եփեց, միսն ու բրինձը
գնացին, մնաց ջուրը.

Որսից եկած սոված մարդիկ, վրա եկանք, կերանք, կե-
րանք, ոչ աչքներս բան տեսաւ, ոչ բերաններս բան մտաւ:

Ի՞նչպէս կը պատմէր իսկական որսկանը.

72. Գորտն ու ազուր

Գորտն ընկաւ ցամաք առուն,
կըոկըռում էր ու կըոկըռում:

—Քիչ կըոկըռա, այ գորտ բեռի,
աշուն կը գայ՝ ջուր կը բերի,—
յոյս էր տալիս մի ծեր ագուաւ.
—Է՛, ի՞նչ անեմ, սիրտս վառաւ,
մինչև ցամաք առուն ջուր գայ,
գորտի աշքն էլ հօ գնւրս կը գայ:

Առած էշ, մի սատկի, եօնջա կը գայ:

73. Ծաղիկների երեկոյթը

ա.

Գարունը իր մեկնելուց առաջ ուզեց իր հրաժեշտի երեկոյթը տալ այս գիշեր ծաղիկներին:

Կանչւած են սոխակները նւազելու և լուսատրիկները ճրագալոյցի. Կանչւած է նաև զեփիւռը՝ պարերը կառավարելու:

Երեկոյթին հրաւիրւած են անտառի բոլոր ծաղիկները, բոլորն էլ անպատճառ իրենց ամենասիրուն ու գունագեղ հագուստներով:

Եկել է սուսամբարը կանաչ շրջազգեստը հագին. մարգարիտները սիպտակ պսակներով իրենց դեղին գլուխներին.

Եկել են բոժոժները, սպիտակ, աշխուժ ու գւարթ. Եկել է սիրի-սիրին իր կարմրաւուն գանգուր գլուխը ուղիղ պահած:


Եղածաղիկն էլ է ներկայ, դեղնագլուխ, փոքրահասակ. այլ և անուշահոտ կապուտաչւի մանուշակները, որոնք խմբով մի թփի տակ քաշւած փսփսում էին իրար հետ:

Հապա զանազանները իրենց գոյնզգոյն թաւիշ գլխարկնելու վու վզները նազանքով թեքած. հապա հպարտ, ցից մեխակը՝ ատամնաւոր պսակը գլխին, կարմիր կամ ճերմակ:

Էս սպիտակ եղինջը՝ փարթամ տերեների ծոցում, էլ կապոյտ անանուխը, էլ



մարգարիտ



բոժոջիկ



սիրի-սիրի



մանուշակ



մեխակ



անանուխ

դեղին պուպուն, որից շուտով սատանի կառերն էին ծնւելու. Էլ նրան ասեմ, բոլոր անտառի ծաղիկները, բոլորն էլ հրաւիրւած էին գարնան այս գիշերւայ երեկոյթին:

բ.

Հենց որ ահազին կաղնու ետևից լուսինն երեաց ու նրա արծաթի ճառագայթները ընկան փոքրիկ մարգագետնի վրա, բոլոր հրաւիրւածների դէմքերը զւարթացան:

Իսկոյն լսւեց սոխակների նւազախումբը, մինչ ծղրիտները ձայն էին պահում:

Թեթև զեփիւռը դուրս պրծաւ անտառից ու վազ տւաւ մարգագետնով. բոլորը շնորհալի ողջունեցին իրար, ու պարերը սկսւեցին:

Մի տեղ շրջան կապած եայլի են բռնել, պարում են պարում ու միշտ նոյն տեղում. մէկ էլ եայլու շրջանը քանդում, և սկսւում է կենտապարը:

Տեսնելու բան է, ինչպէս նարգիզը իր երկայն վիզը պշրանքով թեքած իր գլուխն է ծռմռում, թեթև ու սիրուն, և ամբողջ

ձողունը դողում է յուղումից:



զանազան

Իսկ ինչպէս խենթ-խենթ թրթում էին կապոյտ ու ճերմակ զանգակները՝ շարւած իրենց երկար-բարակ ձողունին. Հապա շուշանը, ինչպէս նազանքով շարժում էր կամաց իր քնքուշ ճերմակ գլուխը:

Ինչ եռանզով պարում էին բոլորը:

Կապուտիկ պատառուկը թփերի ու ոտերի վրա էր մազլցել, որ աւելի լաւ



պուղու

տեսնի. Մինչ ցածում բազմատեսակ խոտերն ու սէզերը ուրախութիւնից ծափ էին տալիս.

դ.

Յանկարծ նւազը լռեց. քամին կանգ առաւ ու պարերը դադար առին:

Եւ հնչեց սոխակի քաղցր ու աննման երգը. երգում էր մէկը. երգում էր ու գովում գարնան գովը ու անտառների ծառ ու ծաղկի գեղեցկութիւնը.

Ծաղիկները յափշտակւած, անշարժ, անշշունջ ականջ են դնում. Ականջ է դնում ամբողջ անտառը, կարծես քարացած:

Մէկ էլ զեփիւոը վազում գալիս է նորից. նորից սկսւում են պարերն ու քչփշոցը:

Ծաղիկները գլուխները իրարու հակած՝ խօսում են իրենց անցած կեանքից, խօսում են իրենց զաւակներից, որոնք շուտով գալու էին:



դանդակ

Գիշերը անցնում էր աննկատելի:

Ահա լուսինը հանգիստ իջաւ ծառերի ետեր ու ծածկւեց.

Մութը պատեց մարգագետինը. քամին յոգնած՝ թողեց ու քաշւեց. Բոլոր ծաղիկները նոյնպէս յոգնած պարից ու զրոյցից կախեցին իրենց ծանրացած գլ-



նարգիզ



պատառուկ

լուխները ու բը-նեցին:

Անտառի խոր-քից լսում է միայն, հեռուն, սոխակի մեղմ ու քնքուշերգը. կար-ծես օրօր է ա-սում...



շուշան

74. Գիշեր

Ննջել են բոլոր ծաղկունքը մուշ-մուշ անքուն հովերի սրինգովն անուշ, ննջել է արօտ, ննջել է նոճին, ոտնուծոց արել բլուրներն հեռուն, հանգիստ են հիմա հըսկան ու ճրճին, երագում թաղւած խնդում է առուն:

75. Արիասիրտ բանորը

ա.

Սարսափելի է գազերի պայթիւնը ածխահանքերում. պա-կաս սարսափելի չէ հեղեղումը:

Ստորերկրեայ աղբիւրները հետզհետէ մաշում ծակում են ածխահորերի պատերը և յանկարծ ներս խուժում ու ողո-ղում անցքերն ու խուցերը. Եւ եթէ աշխատանքի ժամանակ է, ուր փախչեն անօդնական ածխահատները:

Սրանից մօտ հարիւր
տարի առաջ Բելգիայի
Լիէժ քաղաքի մօտ ած-
խահորերում մի այս-
պիսի դէպք պատահեց:

Ստորերկրեայ ջուրը
հաւաքւել էր վաղուց
թողած հորերում, յան-
կարծ պատռել էր պա-
տերը ու ներս լցւել հա-
րեան բանուկ անցքերը,
որտեղ աշխատում էին
մօտ հարիւր հոգի։ Մի-
քանիսը իսկոյն շտապե-
ցին դէպի այն հորը, որտեղով ածխահատներին վեր էին բարձ-
րացնում, և թափւեցին նստեցին կթոցների մէջ։ Մերենան
իսկոյն կթոցները քաշեց վեր, բայց կթոցները նորից իջեցնել
անկարելի եղաւ, որ միւսներին էլ հանեն. ջուրը արդէն կտրել
էր ճամփան։

Տասնըինը բանւոր գլուխները կորցրած վազեցին առաջ
ու ջրի հեղեղի մէջ խեղդւեցին. Իսկ եօթանասունըշորս հոգի,
որոնց մէջ էին նաև տասնըինդ մանուկներ, փակւած մնա-
ցին մի հեռաւոր անցքում։

Դրանց թւում և՛աւագ բանւորը, մի փորձւած ու հմուտ
ածխահատ։

Բ.

Փորձանքի սկզբին նա ամենից մօտ էր գտնւում կթոց-
ներին և կարող էր թռչել նստել կթոցն ու ելնել վեր։ Բայց
նա չուզեց ընկերներին թողնել։ Իրաւ է, այնտեղ, վերեւում,
նրան սպասում էր կինը վեց որդիների հետ, բայց այդ վայր-
կեանին նրա փորձառութիւնն ու օգնութիւնը աւելի հարկա-
ւոր էր իր ընկերներին։ Նա կթոցի մէջ չը նստեցրեց նոյնիսկ



իր տղին, որին սիրով հետները կը վերցնէին վերև ելնող բան-
ւորները։ Նա չուզեց օգտւել այն բանից, որ ինքը աւագ է,
չէր ուզում իր գաւակի մասին աւելի մտածած լինի, քան
մնացած միւս մանուկների։

Նա արագ հարցրեց իր տղին. — Կը մնամ ինձ հետ։

— Այս, — պատասխանեց տղան ու սեղմւեց հօրը։

Այն ժամանակ բանւորների աւագը գրկեց մի ուրիշ տղի
ու նստեցրեց կթոցի մէջ, որը արդէն վեր էր բարձրանում։

Իսկ ինքը դարձաւ ու յայտարարեց ընկերներին։

— Ես բոլորիդ կը փրկեմ, կամ կը մեռնեմ ձեզ հետ։

Ածխահատները ոգեզրւած նրա պատւէրով, առան իրենց
քլունգները և սկսեցին ամբողջ ուժով աշխատել, որ ճամփայ
բանան դէպի ջրի հակառակ կողմը։

Պ.

Գիշեր ցերեկ բանդում էին հողը. հինգ օր անցաւ այդ լար-
ւած աշխատանքի մէջ. Երբ ածխահատների կէսը յոգնած փըռ-
ւում էր գետին քնելու, միւս կէսը շարունակում էր գործ։

Իսկ աւագը աշքը չէր խփում ու ղեկավարում էր աշխա-
տութիւնները։

Միրտ էր տալիս, բաջալերում, ուշը էր բերում ընկեր-
ներին, երբ նրանք յուսահատութիւնից քիչ էր մնում որ խե-
լագարւէին։

Ամենահամարձակները սարսափից ու սովից խելքները
կորցնում էին. Քաղցը յագեցնելու համար ուտում էին գոտի-
ների կաշին, կրծում էին փայտի կտորները. Մի փոքրիկ մոմի
կտորի համար սոսկալի կոխւ ընկաւ։

Աւագը մի բոպէ չէր հեռանում ընկերների մօտից ու հրո-
կում էր նրանց ամեն մի խօսքին։

Մի անգամ նորից, ածխահատներից երկուսը իրար վրա
յարձակւել ու տալիս էին իրար. Երբ աւագը միջամտեց որ
հանգստացնի, յանկարծ մի ածխահատ ընդհատեց նրան ասելով.

— Բան չունես, թող կուեն. եթէ մէկը միւսին սպանի, աւելի լաւ, կուտենք նրան:

Այն ժամանակ աւագը կանգնեց կուողների մէջտեղ և կուրծքը մերկացնելով՝ գոչեց.

— Ով ձեռք կը բարձրացնի իր ընկերոջ վրա, հարւածը թող նախ իմ կրծքին հասցնի:

Նրա աշքերը վառւում էին չը տեսնւած կրակով. ձայնը որոտի պէս հնչում էր ահաւոր կամարների տակ. Կուողները ամաչեցին ու սկսեցին վերսկսել աշխատանքը:

դ.

Երկրորդ օրը պատահմամբ մի ծակ բաց արին դէպի ածխաշերտերի մի անցք, որտեղից մահաբեր հանքային գազեր էին դուրս գալիս. Բաւական էր գազը բռնկէր, որ պայթիւնից բոլորն էլ կորչէին. Բանւորների աւագը իսկոյն պատւիրեց ծակը խցեն, իսկ երկու երիտասարդ ածխահատներ ձայն էին տալիս այն կողմից.

— Ինչու ես խցում. աւելի լաւ է լապտերը մօտեցնենք գազին, թող պայթի, գոնէ մէկ անգամից սատկենք, պրծնի:

Բայց նա զսպում էր ընկերների յուսահատութիւնը իր սառնասրտութեամբ և արիութեամբ:

Հինգերորդ օրը լապտերները հանգան մաքուր օդի պակասութիւնից. ահոելի խաւարը պաշարեց բոլորին:

Մի քանիսը գրեթէ ցնորւել էին սարսափից. սկսել էին հաւատացնել թէ իրենց դիտմամբ էին սոված թողնում. Ըմբռստանում էին իրենց աւագի դէմ, պահանջելով որ հաց ճարի իրենց համար, կարծես ունէր ու չէր տալիս:

Վերջին ուժերը սպառւում էին. մի քանիսն այն աստիճան թուլացել էին, որ մեռնելու վրա էին. Աւագը խրախուսում էր, աղաչում, որ աշխատեն, խոստանում էր մօտալուտ փրկութիւն, և ինքն էլ անխոնջ բանում էր՝ քլունգը ձեռքին:

ե.

Վեցերորդ օրն էր, որ հակառակ կողմից լսւեցին զարկեր:

Դրսից ընկերները դէպի նրանց անցք էին փորում. Այդ ձայները նոր ուժ ներշնչեցին փակւածներին և երբ երկու անցքերը իրար հանդիպեցին ու թարմ օդի հոսանքը յանկարծ դիպաւ դժբախտների երեսին, ուրախութեան ճիշը դուրս թռաւ բոլորի կրծքից ու շատերը ուշաթափ ընկան գետին. Տանջւածքանտարկեալները սկսեցին լոյս աշխարհ դուրս գալ. մի բանիսը այնքան թոյլ էին, որ չէին կարողանում իրենք շարժւեն. Մուտքի մօտ սպասում էր ածխահատների ամբողջ աղգաբնակութիւնը:

Բոլոր եօթանասուն և չորս հոգին էլ փրկւած էին. Աւագը մնաց գետնի տակ, մինչև որ բոլոր ընկերները դուրս ելան. Նրա տղին հանել էին ամենից առաջ, միւս մանուկների հետ:

Նա դժւրս եկաւ վերջինը. Մուտքի մօտ սպասում էր կինը երեխաների հետ. Արտասւալի աշքերով, երջանկութիւնից թրթուսն, նա ընկաւ ամուսնու գիրկը, մինչ մանուկները կախւում էին վզից ու թերեից...

- 1) Ո՞րն է այստեղ աւագ քանորի ամենաազնի վարժունքը:
- 2) Ո՞րն է այդ բանորի ամենամեծ հպարտութիւնը:
- 3) Իսկ որդու վարժունքին ի՞նչ անոն կը տաս:

76. Անբախտ վաճառականներ

ա.

Մի օր Զըղջիկն ու Ճայն եկան թէ՝ եկ դառնանք վաճառական. Ասին ու խելք խելքի տըւին, հաւան կացան, պայման դըրին. բայց՝ արի տես... որ փող չունեն. Շատ միտք արին թէ ինչ անեն. վերջը եկան փըշի մօտը, ընկան նըրա ձեռն ու ոտը, ու մուրհակով, շահով կարգով,

փող վեր առան բաւականին,
 ինչքան պէտք էր իրենց բանին:
 Չիղչը մընաց, տընպահ դառաւ,
 ձայը բոլոր փողերն առաւ,
 առաւ, նըստեց նաւի միջին,
 հասաւ Մըսըր, Չինումաշին,
 ֆարս, Հընդըստան,
 Արաբըստան...
 Էլ թանկագին քիրմանի շալ,
 Էլ մարգարիտ, զըմրուխտ ու լար,
 հընդու խուրմա, փըստա, բաղամ,
 և... որ մէկի անունը տամ.
 Ինչ որ տեսաւ, աչքը սիրեց,
 բօլ-բօլ առաւ, նաւը լըցրեց.
 Նաւը լըցրեց հազար բարով
 ու ետ՝ եկած ճանապարհով
 ուրախ-ուրախ տուն էր գալի:
 Ճամփին ծովում սարսափելի
 ալեկոծում, մըրրիկ ելաւ,
 երկինք հանեց ալիք ու նաւ,
 երկինք հանեց, թողեց ներքն,
 ողջ կըլանեց անդունդը սե:
 Միայն սովորաբեար ձայը էնօր
 ազատւեցաւ մերկ ու տըկլոր:
 Ազատւեցաւ, փառք իր Աստծուն,
 բայց ի՞նչ սրտով խեղճը գայ տուն,
 գայ՝ ի՞նչ ասի պարտքատէրին,
 հնց երևայ իր ընկերին...

Բ.

Ընկերն էնտեղ՝ դուռը կըտրած,
 աչքը ճամփին, վիզը ծըռած,
 համրում է օրն օրի վըրա

թէ՝ մեր ձայը երբ պիտի գայ...
 Երկար նայեց,
 ճամփէն պահեց,
 շատ լաւ ու վատ երազ տեսաւ,
 մինչև պարտքի օրը հասաւ,
 ու՝ մուրհակի թուղթը ձեռին,
 Փուշը տընկւեց կըտեր ծէրին:
 «Էյ, բարեկամ, ի՞նչ բանի էք.
 Էլ չէք ասում թէ պարտք ունէք...
 Գործ բըռնեցիք, հօրս ողորմի,
 ետ տւէք դէ փողըս հիմմի:
 Թուղթ էք տըւել՝ վախտ իմացէք,
 ամօթ, աբուռ, ահ ունեցէք...
 Թալան հօ չի... մեղք եմ ես էլ...
 Օխպէր, էսպէս բան էք տեսել.
 ոսկի տայ մարդ իրեն ձեռով,
 չը կարենայ առնիլ զօռնվ...
 Սրանից ետը դէ արի դու
 ու ձեռ մեկնի աղքատ մարդու...»
 Գոռգոռում էր ողջ թառակում,
 հայհոյում էր, խայտառակում.
 ամեն մարդ էլ, ով որ լըսում,
 հէնց մի բերան էն էր ասում.
 —Այ ամօթ ձեզ, Չըղջիկ ու ձայ.
 Ինչ ենք լըսում, վայ, վայ, վայ.
 անուններդ վաճառական
 ու էս տեսակ խայտառակ բան...
 Վայ, վայ, վայ վայ, Չըղջիկ ու ձայ...

Գ.

Չըղջիկն էսպէս միշտ լսելիս
 սիրտը բերնով դուռս էր գալիս:
 Բարկանում էր իրեն մըտքում,

անիծում էր, չըքում, թըքում.
 «Այ քո տունը բանդւի, ա ձայ,
 այ դու դառնաս Գըրողի փայ:
 էս ի՞նչ բան էր որ դու արիր.
 գլուխս էս ի՞նչ փորձանք բերիր...»
 Ու խընդրում էր ամեն անգամ.
 —Մի նեղանայ, Փուշ բարեկամ,
 շատ ես կացել,
 կաց մի քիչ էլ.
 թուղթ ստացայ երեկ ձայից,
 թէ դուրս եկայ Արարիայից.
 որտեղ որ է՝ շուտով կը գայ,
 դեռ մի բան էլ աւել կը տայ...
 —Ես չեմ ուզում աւելն, ախպէր,
 կանխիկ համրած իմ փողը բեր.
 շահ էք գըրել,
 վախտ էք գըրել,
 ինչ գըրած է էն եմ ասում,
 ձեզնից աւել բան չեմ ուզում.
 —Զէ, աղա Փուշ,
 թէ վաղ թէ ուշ,
 փողն իր կարգին, շահն իր կարգին,
 իսկ պատիւրդ .. ես իմ հոգին...
 Ես յոյս ունիմ... ասենք պարտ ենք...
 բայց չէ ախար մենք էլ մարդ ենք...
 Զէ, քո արածն ով մուտանայ,
 իր Աստւածն էլ նա կուրանայ...
 դ.

Խեղճը էսպէս լեզու ածաւ,
 շատ յոյս տրւաւ, շատ խոստացաւ.
 շատ սուտ ասաւ պարտքատէրին,
 շատ ըսպասեց իր ընկերին.

բայց ընկերը չը կայ, չը կայ:
 «Էս ի՞նչ ցաւ էր, Աստւած վըկայ,
 ինչ իմ բանն էր՝ մըտայ մէջը,
 որ խայտառակ լինեմ վերջը...
 ի՞նչպէս պըրծնեմ էս կըրակից,
 էս ահագին պարտքի տակից.
 էլ ի՞նչ ասեմ,
 հնց ըսպասեմ.
 Նա Երբ կը գայ, ի՞նչ իմանամ,
 որ ջուրն ընկնեմ... ում մօտ գընամ...»
 Շատ միտք արաւ,
 դէս դէն թըռաւ.
 ինչ որ ունէր տանը, հագին,
 ողջ հաւաքեց տրւաւ պարտքին,
 ցիփ մերկացաւ,—
 էլ չը պըրծաւ:
 Վերջը տեսաւ, որ ճար չեղաւ,
 թեր առաւ, ինքն էլ փախաւ,
 փախաւ կորաւ, որ էլ էնպէս
 դատարկ, սընանկ ու սկերես,
 ոչ պատահի պարտքատէրին,
 ոչ երևայ լոյս աշխարհին:
 ե.


Այնուհետեւ, իր նամուսից,
 զըդիկը մերկ փախած լուսից,
 ցերեկները դէս դէն թաքչում,
 գիշերն է միշտ մըթնում թըռչում,
 որ չերևայ իր թայ-թուշին,
 ոչ պարտքատէր աղա-Փուշին:
 Ճայն էլ ծովում,
 ճըշում, ծըւում,
 ջուրն է մըտնում,



դուրս է պրծնում,
 թեին տալիս,
 ման է գալիս,
 թէ մի գուցէ բախտը բանի,
 կորուստն էլ ետ ջրից հանի:
 իսկ Փուշն, արդէն յոյսը հատած,
 ճանկուատամ սուրպատրաստած,
 կողքովս ով որ անց է կենում
 քաշում է փէշն ու հարցընում,
 թէ չեն տեսել մէկն ու մէկին,
 էն լիրը ձային կամ Զըղջիկին:
 Ու էն օրից մինչև օրս էլ
 մէկը մէկին դեռ չեն տեսել:



77. Մայրը



Մի գարնան իրիկուն դունը
 նստած զրոյց էինք անում,
 երբ այս դէպքը պատահեց:
 Եւ այս դէպքից յետոյ ես չեմ
 մոռանում էն գարնան իրի-
 կունը:

Ծիծեռնակը բուն էր շինել
 մեր սրահի օճորքում: Ամեն
 տարի աշնանը գնում էր, գարնանը ետ գալի ու նրա բունը
 միշտ կպած էր մեր սրահի օճորքին:

Եւ գարունն էր բացւում, և մեր սրտերն էին բացւում,
 հէնց որ նա իր զւարթ ճիշով յայտնուում էր մեր զիւղում ու
 մեր կտորի տակ:

Եւ ինչ քաղցր էր, երբ առաւօտները նա ծըլւըլում էր
 մեր երդիկին, կամ երբ իրիկնապահերին իր ընկերների հետ
 շարւում էին մեր երկար ձողի վրա ու «կարդում իրիկնաժամը»:

Եւ ահա նորից գարնան հետ նա վերադարձել էր իր բու-
 նը: Զու էր ածել, ճուտ էր հանել, ու ամբողջ օրը ուրախ
 ճշալով թռչում, կերակուր էր բերում իր ճուտերին:

Էն իրիկունն էլ, որ ասում եմ, եկաւ, կըտցում կերակուր
 բերաւ ճուտերի համար: Ճուտերը ճշճալով դեղին կտուց-
 ները դուրս հանեցին բնից:

Էտ ժամանակ, ինչպէս եղաւ, նրանցից մինը, գուցէ ամե-
 նից անզգուշը կամ ամենից սովածը, շտապեց, աւելի դուրս
 ձգւեց բնից ու ընկաւ ներբեւ:

Մայրը ճշաց ու ցած թռաւ ճուտի ետեից: Բայց հէնց էտ
 վայրկեանին, որտեղից որ էր, դուրս պրծաւ մեր կատուն,
 ճուտն առաւ ու փախաւ:

«Փիշտ, փիշտ», վեր թռանք ամենքս, իսկ ծիծեռնակը
 սուր ծղրտալով ընկաւ կատւի ետեից՝ նրա շուրջը թըրթըռա-
 լով ու կտցահարելով, բայց չեղաւ. Կատուն մտաւ ամբարի
 տակը: Եւ այս ամենը այնպէս արագ կատարւեց, որ անկա-
 րելի եղաւ մի բան անել:

Ծիծեռնակը դեռ ծղրտալով պտըտւում էր ամբարի շուր-
 ջը. իսկ մենք, երեխաներս մի-մի փայտ առած պտըտում
 էինք ամբարի տակը, մինչև կատուն դուրս եկաւ ու փախաւ
 դունչը լիզելով:

Ծիծեռնակը դատարկ կատւին որ տեսաւ, մի զիլ ծըղըր-
 տաց ու թռաւ, իջաւ դիմացի ծառի ճիւղին: Այնտեղ լուռ
 վէր եկաւ: Մին էլ տեսանք, յանկարծ ցած ընկաւ մի քարի
 կտորի նման: Վազեցինք, տեսանք՝ մեռած ընկած է ծառի
 տակին:

Մի գարնան իրիկուն էր, որ այս դէպքը պատահեց: Շատ
 տարիներ են անցել, բայց ես չեմ մոռանում ոչ այս դէպքը,
 ոչ այն գարնան իրիկունը, երբ ես առաջին անգամ իմացայ,
 որ ծիծեռնակի մայրն էլ մայր է ու սիրտն էլ սիրտ է, ինչ-
 պէս մերը:

78. Անձեւ

Ալկոր լեռան
սպիտակ գլխին
եկան դիզւեցին
չարագուժ ամպեր.
ճընշեցին նըրան,
ծանրացան վըրան,
սարը մըռայլեց
խըստադէմ մի հօր
ճակատի նըման.

Շուրջը խաւարեց
ու խոր լոռութիւն.
Բայց կամաց-կամաց
վերևից լըսւեց
խըլաձայն որոտ:
Լոեց մի վայրկեան
ու ճայթեց յանկարծ,
որոտաց, գոռաց
կատաղի թափով.

և արար-աշխարհ
դըղըրդաց ահեղ:
Եւ խոշոր-խոշոր
կաթիլները յորդ
պատոած երկընքից
զայրացած, ուժգին
թափւեցին գետին
մայր հողի վրա.
Ու լեռան կողից
վտակներն ուռած,
աղի, ջերմ առատ
արցունքի նման,
արագ, կարկաչով
թափւեցին ներքեւ,
դիմեցին հեռու,
դէպի լայն դաշտը,
դէպի Մայր-Արաքս...

79. Մրտոտ տղան

ա.

Անձեւը մի քանի օր անդադար գալիս էր. Փոքրիկ վտակները մի-մի հեղեղ էին դարձել ու փըրփըրալով, կատաղած ցած էին գլորւում լեռների վրայից. ձորերն ու կիրճերը դղրդում էին:

Երկաթուզու գծի մօտ կանգնած մի տնակում խաղում էին չորս տղայ. բոլորն էլ գրեթէ իրար հասակակից.

— Դէս, Սաքօ, — կանչեց նըրանցից մէկը, — ապա թէ քաջ

տղայ ես, կանգնիր ռելսերի մէջտեղ, այս ըոպէիս անցնելու է արագ գնացքը:

— Ինչու կանգնէմ, — պատասխանեց Սաքօն, — բան ու գործը կտրել է:

— Ի՞, վախկնա, վախկնա. պարծենում էլ ես թէ ամենքիցը քաջն ես:

Եւ երեք ընկերները սկսեցին ծաղրել Սաքօին, բայց նա ոչինչ չէր պատասխանում: Մի փոքր ժամանակից նրանք դուրս պըրծան սենեակից նայելու, թէ ինչպէս կանցնի արագ գնացքը, իսկ Սաքօն ետեներիցը ձայն տւաւ.

— Աւելի լաւ է տանը մնացէք: Բան չունէք, անձրեկի տակ գուր տեղը ի՞նչ էք թրջւում:

Բայց յանկարծ լսւեցին սարսափելի աղաղակներ.

— Սաքօ, Սաքօ:

Տղան դուրս վազեց: Եւ իսկոյն նկատեց, որ մօտակայ կամուրջը սկսել է նստել: Իսկ գնացքը այն է պիտի գար ու վրայով անցնէր:

— Կը գլորւի, անպատճառ անդունդը կը գլորւի:

Բոլորի սրտերը սաստիկ բարխում էին:

— Պէտք է շուտով մի հնար գտնենք գնացքը փրկելու, — կանչեց Սաքօն: — Քանի ժամանակում կարելի է հասնել կայրանը:

— Կէս ժամից աւելի, այստեղից կարճ ճամփով չորս վերստ կը լինի:

— Արդեօք մէկից ձի չի կարելի ճարել:

— Զաղացպան Գիբորն ունի. բայց մինչեւ ջաղացը բաւական ճամփայ է:

— Դու, Յովսէփ, վազի դէպի ջաղացը և փորձի մի կերպ կայարան հասնես գնացքի դուրս գալուց առաջ: Արմօ, դու էլ շտապի գծի ճամփով, գուցէ կարողանաս պահապանին իմաց տաս, որ գնացքը կանգնեցնի: Իսկ ես ու Զատին կը մնանք այստեղ. եթէ դուք բան չանէք, մենք կաշխատենք կանգնեցնենք:

—Վաղուց է այսպիսի թոն չեմ տեսել,—ասում էր մեքենավարը, որ կառավարում էր գնացքը:

—Ես էլ,—պատասխանեց օգնականը,—երանի թէ կամուրջները վնասւած չը լինեն: Տես, ինչ հեղեղներ են սարերից թափւում:

Գնացքը արագ սլանում էր:

—Ի՞նչ է անում այդ տղան,—հարցրեց օգնականը, տեսնելով գծի կողքին քարի գլխին մի տղայ, որ ձեռ ու ոտով էր անում:

—Այս անձրեսին էլ որ փոքրիկներին դուրս են թողնում,—բարկացաւ մեքենավարը:

Գնացքը վշշալով օձի պէս սողում էր կատաղած գետի ափով:

—Առաջ նայի,—կանչեց մեքենավարը,—այն ի՞նչ պիտի լինի:

—Երկու երեխայ ժամանակ են գտել ուելսերի վրա խաղալու: Սուլիք, որ հեռանան:


Մեքենան սուլեց: Արձագանքը խուլ կրկնւեց ձորերի պըտոյտների մէջ:

Ճամփին կանգնած էին տղաները. պարզ էր, որ սպասում էին գնացքին: Մէկը թաշկինակն էր թափ տալիս, աւելի և գետի հեռուն էր ցոյց տալիս:

—Այ, ես ձեր...

—բացականչեց մեքենավարը կատաղած:

—Ելի սուլիք, էլի սուլիք:



Անհանգիստ սուլոցները կրկնւում էին: Տղաներից մէկը փախաւ, բայց միւսը կանգնած էր ուղիղ երկու գծի մէջտեղը ու շարունակում էր թաշկինակը թափ տալ:

—Շուտով, տօրմազ, տօրմազ...—բացականչեց օգնականը սարսափած,—Տէր-Ծստւած, պառկեց հէնց ուելսերի վրա, պիտի ճխլւի... Կամ կոյր ու խուլ է, կամ խելագար:

Թէև յոյս չը կար, սակայն երկուսն էլ շտապ շտապ սկսեցին պտտացնել տօրմազը, որ գնացքը կանգնի:

Միայն մի հարիւր, հարիւր քսան քայլ էր բաժանում երեխային գնացքից, որը իր թափիցը դեռ առաջ էր մղւում:

—Աստւած իմ, արդեօք երեխան պիտի փրկւի:

Գնացքը դեռ շարժւում էր և աւելի ու աւելի մօտենում...

Անդադար սուլոցները վախեցրել էին ճամփորդներին. բոլորն էլ սարսափահար խոնւում էին գէպի գոներն ու պատուհանները:—«Ի՞նչ կայ»,—հարցնում էին միմեանց:

Արդէն միայն մի քսան քայլ էր բաժանում տղային մահից, միայն մի տասը քայլ... Յանկարծ ուրախութեան մի բարձր ճիշ դուրս պրծաւ մեքենավարի ու օգնականի կրծքից. գնացքը կանգ առաւ տղայից երկու-երեք քայլ հեռու:

Մեքենավարը դուրս թեքւեց և զայրացած աղաղակեց.

—Անպիտան... գէնը կորի:

Իսկ տղան խելագարի պէս վեր թոաւ և ցոյց տալով գէպի կամուրջը՝ ասաւ.—Քանդւել է...

—Ու իսկոյն վախից և յուզումից ուժասպառ նորից ընկաւ գետինը:

Ուղեորները դուրս թափւեցին վագօններից ու վազում էին գէպի մեքենան: Ի՞նչ է, ի՞նչ է:

—Կամուրջը քանդւած է, ահա մեր փրկիչը,—կանչեց մեքենավարը յուզւած:

Ու բազմութիւնը խոնւեց ուշաթափ Սաքօի գլխին...

Վերեսից անձրես՝ շարունակ թափւում էլ և լեռնային հեղեղները դղրդալով վիժում էին ցած, գէպի կատաղած գետը...

80. Ծեր կաղնու մտածունքը



Տես, օրօրւում է ւերունդը մատաղ,
կայտառ են նրանք և միշտ էլ ուրախ:
Տարիներ անցան, ես մոռացայ էլ
թէ ջահելութիւն, թէ ուրախ երգել.

Տարիներ անցան՝ հինգ հարիւր տարի...
տեսայ ես այստեղ շատ չար ու բարի:
Էյ, ընկնելու եմ, ընկնելու հիմի,
խաղում է արդէն արմատըս մի-մի...

81. Հանդիպութ

ա.

Շուտով մի տարի էր լինելու, որ Միխակը թողել էր գիւղը,
եկել էր բաղաք ու ծառայ էր դարձել մի ընտանիքի մէջ։
Նրա ամենամեծ ուրախութիւնը նրանումն էր, որ երբեմն
բազարում տեսնում էր իրենց գիւղացիներից մի քանիսին,
երբ բան էին բերում քաղաք ծախելու։

Մի անգամ անցնում էր հրապարակի միջով՝ յանկարծ
տեսաւ իր ընկերներից մէկին։

—Ա՛ Թուն, ա Թուն, —կանչեց նա իր վաղեմի ընկերոջ,
մօտ վագելով։

Ընկերը չը ճանաչեց։ Միխակը քաշ ընկաւ նրա վզից և
սկսեց համբուրել։

—Խաչը վկայ, չը ճանաչեցի, —խօսեց գիւղացի տղան։ —
Էտ ի՞նչ շորեր են...

—Ի՞նչ անեմ, Թունի ջան, բաղաքում էսպէս են հագ-
ցնում։ Դու էն ասա, Թունի ջան, մեր տունը գնում էիր,
մերոնք ո՞նց են, ի՞նչ են անում երեխէքը։

Եւ առանց պատասխանի սպասելու շարունակեց։

—Դու ինչ էիր շինում, Թունի ջան։ Ամեն օր լողանում
էիր գետումը. ախ, էստեղ իսկի ժամանակ չեն տալի, մարդ
ջրի երես տեսնի։ Հիմի խոտը ճնձում կը լինեն, էնպէս չէ։
Ով էր հաւաքում մեր խուրձերը։ Ես եկել եմ հիմի բազարից
կանաչի առնելու, հացն էլ ինձ են առնել տալիս, ասում են՝
առուտուր սովորի։ Իսկ մեր շլորենիքը հասել են։ Հիմի ով է
արածացնում մեր գառները։ Էստեղ լաւ չի, Թունի ջան,
սիրտս տրաքում է ուրիշի տանը. չեմ իմանում թէ ի՞նչ
անեմ... Որ գնաս, մեր տանն ասա՝ Միխակին տեսայ։ Դու
ում հետ եկար. Երբ ես գնալու։ Ծառայ լինելը շատ վատ է,
Թունի ջան...

Նա իր բազմաթիւ ու անկապ հարցերով բոլորովին շւա-
րեցրեց ընկերին, որ չը գիտէր՝ որ մէկին պատասխանի։

—Հօրս հետ եմ եկել, —ասաւ նա. —պանիր էինք բերել,
ծախեցինք, էսօր պիտի գնանք։ Դու երբ պիտի գաս գիւղը։
Գիտես Միխակ, մեր բոստանն էլ հասել է, էնքան սեխ եմ
ուտնում։ Ես քո բաժինը կը պահեմ. Երբ ես գալու։

—Զեն թողնում, Թունի ջան, —պատասխանեց Միխակը
տխուր ձայնով. —շատ եմ ուզում գամ, մերոնց տեսնեմ, մեր
տանը մնամ. չեն թողնում, ասում են՝ «արջի քոթոթ, ձեր
ծմակները չես մոռանում»։ Դէ ոնց մոռանամ, Թունի ջան,
ախար էստեղ ի՞նչ կայ. տներ, նա տներ. մարդիկը իս գիւ-
ղացուն էշի տեղ են գնում...
գ.

Թունին մի քանի տարով մեծ էր Միխակից. լսելով ըն-
կերոջ խօսքերը, խղճաց նրա դրութեան վրա և մտածեց
օգնի։

—Եկ, ես քեզ կը տանեմ գիւղ, —ասաւ նա։

—Ի՞նչպէս գամ, էստեղ էլ հօրախպէրս գլխիս կը տայ,
կասի՝ ի՞նչու եկար. Զէ, Թունի ջան, լաւն էն է, գնամ ջուրը
ընկնեմ՝ մի անգամով պրծնեմ։

Թունին միիթարեց նրան, սիրտ տւաւ և խոստացաւ, որ

կերթայ կը խօսի նրանց տանը։ Միխակը ուրախացաւ. մանկա-
կան բարեսրտութեամբ ուզեց ընկերոջը մի բանով վարձատրի։

— Գիտես, Թունի ջան,— ասաւ նա,— լաւ միտս եկաւ։ Ես
վէգերս թաղել էի մեր մարագի դռան տակին, էնտեղ, ուր մի
կոճղ է դրած, կը գնաս, կը հանես, հարիւր հատից աւել է.
ինչքան կուզես՝ դու վեր առ, մնացածը բաժանի մեր ընկեր-
ներին։ Ես որ չեմ կարայ խաղամ, դուք էլ է խաղացէք։

— Թոմասին բաժին չեմ տայ, — ասաւ ուրախացած Թու-
նին. — Նա լաւ տղայ չի, անցած օրը ինձ հետ կուեց։

— Նրան էլ տուր, մեր ընկերն է, հաշտւեցէք, — խօսեց
խրատական կերպով Միխակը։ — Ի նչ կայ, ընկեր ընկերի հետ
կը կուի էլ, կը հաշտւի էլ։ Անցած գիշերը ես էլ Պօղոսի հետ
կուեցի՝ մահակով խփեցի, գլխիցը արիւն գնաց։

— Պօղոսի հետ. էստեղ ի՞նչ էր շինում։

— Երազումս կուեցի. Թունի ջան, հէնց որ զարթնեցի, էն-
քան լաց եղայ, էնքան լաց եղայ՝ թէ ինչու նրա գլուխը պատ-
ռեցի։ Դրուստն ասա, Թունի ջան, նրան խօ մի բան չի եղել։

— Ոչինչ չի եղել. երէկ չէ, մէկէլ օրը ինձ հետ խօսում
էք, յետոյ միասին գնացինք իրենց այգին, ծիրան կերանք։

Երկու փոքրիկ գիւղացիների խօսակցութիւնը ընդհատեց
Թունիի հայրը, որ հեռուից ձայն տւաւ։

— Այ տղայ, էտ ում ետ ես խօսում. եկ, գնում ենք։

— Թունի ջան, հիմի որ գնում ես, — ասաւ Միխակը նրա
փէշից պինդ բռնելով, — մտի մեր տունը, ամենին շատ բարև
արա, ասա՝ որ տեսայ Միխակին։

— Կասեմ, — խոստացաւ Թունին ու հեռացաւ։

Միխակը երկար կանգնել էր ունայում էր ընկերոջ ետևից։

— Էրնէկ նրան, գնում է գիւղը…

1) Ինչու Միխակին քաղաքումն էին թողնում, քանի որ չէր ուզում։

2) Ինչու Միխակը ծառայ լինելը վատ բան էր համարում. Եւ
նթէ չէր հաւանում ինչու մի ուրիշ գործ չէր անում։

82. Գորտն ու կովը

Գորտը գորտին
ասաւ. «Քեռի,
հլա էսդին
մի ետ դառի...
տես, ուռել եմ,
փուքն առել եմ:
Ուղիղն ասա,
կովին հասայ»։
— Զնւր է, վերջ տուր,
կովն ուր—դու ուր։
«Հիմա, քեռի,
փոխւայ ըսկի»։
— «Շատ չեն զոռի,
նոյնն ես, սըսկի։
«Մի տես, քեռի»։

— Նոյնն ես, լոի։
աշխարհ կանցնի,
եթէ գորտը
կովին հասնի։
«Էս հետ...քեռի»։
— Թէկուզ մեռի,
դու բաց աչքով
չես դառնայ կով։
Գորտը ուռաւ,
փքւեց նորից,
խիստ փուքառաւ
ճաքեց զոռից։
Ով որ փքւի,
նա կը չքւի։

83. Հունձ ա.

Եղսում հարսը վաղուց էր վեր կացել և պաշարի խուր-
ջինը պատրաստել հացը, սխտորն ու քացախով լիք շիշը
խուրջինի մի մատն էր ածել, իսկ սրոցը, մատնոցը, սահէնն
ու փարչը միւս. էշին էլ մի լաւ թիմարելուց յետոյ՝ փալանն
ու չուլը կապել էր ու պատրաստել։

Մարդը ոտքի կանգնեց, երեսին մի երկու չուփ ջուր
խփեց, գլխի փափախով դէմքը աջ ու ձախ քսմսեց, սրբեց,
գերանդին ուսին ձգեց ու բեռնած էշն առաջ անելով՝ գուրս
գնաց տնից։

Գնում էր էշին թօշ-թօշ անելով, ու մի հացը կոան տակը
դրած՝ և ուտում էր, և մտածում։

— Վերի փէշից կը սկսեմ հունձը, մինչեւ ճաշը կաղնինե-
րին կը հասնեմ, մի քիչ պատառ-մատառ բերանս կը զցեմ,
յետոյ մինչեւ իրիկուն մի երեք տասնեակ խուրձ էլ է որ
կապեմ, հալալ կը լինի իմ կերածը։

Գնալիս, աղբեւրից փարշը ջրով լցրեց. ինքն էլ, էշն էլ մի կուշտ ջուր խմեցին և շարունակեցին ճանապարհը: Արեւ մի չւան բարձրացել էր, որ նրանք տեղ հասան: Նա շատ ուրախացաւ, երբ հասուն արտը տեսաւ. Նրա մտքովն անցուծ հազար ու մի տեսակ չար ենթադրութիւններ կորան, քէֆն եկաւ, որ հասկերը դեռ ոտքի վրա էին ու չէին կծղել, փշացել: Նրան թւաց թէ՝ հասկերը իրար քսմսւելով, մի խոնարհ ողջոյն տւին իրեն. Փափախը վերցրեց, ծունկ չոքեց, հասկերից մի փունջ բռնեց և համբուրեց. յետոյ աշքերը դէպի երկինք բարձրացրեց ու ասաւ.

— Տէր-Աստւած, քաղցը է Քո դատաստանը, մինչև օրս պահել պահպանել ես ինձ, օրէս դէնն էլ ողջութիւն տուր, անվնաս հնձեմ, խրձեմ, գիզեմ, կրեմ, կասեմ ու դեղնազարդիս տիրանամ, յետոյ ես գիտեմ իմ մարդութիւնը:



Որքան հնձում էր և ոսկե-
փայլ հասկերը պառկեցնում
գետնին, այնքան աւելի քա-
ջալերւում էր: Հնձեց. արևի
թէժ բոցն ու կրակը չէր ազ-
գում ոգեստրած մշակին. Քր-

տինքը ճակատից և ականջ-

ների քամակից կաթկթում
էր, թիկունքն ու կուրծքը խօ և քրտնում թաց էր լինում,
և տաք արեի տակ չորանում: Նա անդադար հնձում էր:

Երբ սովեց, գերանդին առաւ, գնաց կաղնիների ստւերը,

աջ ցուցամատով ճակատի բրտինքը ծոր-ծոր ցած թափեց, ապա սահէնը հանեց, սխտորը մէջը ծեծեց, քացախով լցրեց, հացը բրդեց մէջը և մի կուշտ կերաւ: Թըթւաշ բրթուը այնքան ախորժելի էր և զովացուցիչ, որ երկրորդ անգամ պատրաստեց ու կերաւ: Յետոյ փարչը շրթունքներին դնելով՝ մի կուշտ էլ ջուր խմեց, բթացած գերանդին սրեց և դարձեալ ոտքի կանգնեց, գնաց իր գործին:

— Մինչեւ մութը կը հնձեմ,—մտածում էր նա.—իրիկնապահին՝ կապիչները կը պատրաստեմ ու խուրձերը կը կապեմ:

Այդպէս էլ արաւ: Երեկոյեան երբ համարեց, տեսաւ՝ ուղիղ չորս տասնեակ խուրձ էր հնձել ու կապել:


84. Հանգիստ

Էհէյ, ախպէր, էստեղ արի,
էս շոք վախտին նուր կերթաս.
սոված, յոգնած պէտք է լինես,
էտպէս ըշտապ նուր կերթաս:

Արի մեզ մօտ, Աստծու դրկած
դու մեր հիւրն ես թանկագին.
արի դէզի շւաքի տակ,
դու տեղ ունես մեր գլխին:

Հէնց նոր մերոնք հացի նըստան,
գերանդիքն են բթացել.
արի, ախպէր, պաղ հովերը
թող որ շոյեն քո կուրծքն էլ:

Էհէյ, արի, ճամփորդ ախպէր,
էս շոք վախտին նուր կերթաս.
սոված, յոգնած պէտք է լինես,
էտպէս ըշտապ նուր կերթաս:



85. Կալի երզը

Արի եզը ջան, Ծիրան ջան.
Հորովէլ ա, հորովէլ ա...
Ոտիդ արա, ուսիդ արա,
կալը կասենք, անձրև չը գայ:
Տար, ման արա, ա քեզ մեռնեմ,
դարման արա, ցաւըդ առնեմ:
Դարմանը դու, ցորենը մենք
ձմեռն ուտենք, հանգիստ ապրենք:
Օրը գնաց, ա Ծիրան ջան,
բանը մնաց, ջան ախպէր, ջան:
Ոտիդ արա, ուսիդ արա,
կալը կասենք, անձրև չը գայ:

Գիւղացին նրբ է անձրեւ ինորում, եւ նրբ է անձրեւից վախենում: Կալը ինչո՞ւ համար է:

86. Փոկակապ Ակոփ-ապէր

ա.

Մեր դպրոցը վանքի ընդարձակ պարսպի մէջն էր. այդտեղ էր նաև ընթերցարանն ու թատրոնը: Կային դեռ շատ մանր ու մեծ, կիսախարխուլ կամ բոլորովին աւերակ դարձած խուցեր, մառաններ, խուլ, մութ ու մեզ վախ ազգող նկուղներ, այլև վանահօր բնակարանը:

Վանքի պարիսպներին ետևի կողմից կպած էին ընդարձակ ձոխ այգիները. և մինչև հոկտեմբերի կէսերը ուղղակի անհնար էր լինում վարժապետների դասերին ուշադիր հետևելը:

Հէնց դասարանի լուսամուտի տակ, երկու քայլ հեռու, թփերից շարան-շարան կախւած փայլում էին խաղողի հիւթալից ճիւթերը, կարմրաթուշ գեղձերը պսպղում էին ամեն կողմից և տանձերը երեսում էին բարձրում:

Փոխանակ մեր թւաբանական խնդիրները լուծելու՝ մտածում էինք դասի ժամանակ, թէ ինչպէս հասնենք այդ գայթակղիչ պտուղներին: Խորհում էինք, հնարներ որոնում, և մի օր մեր ընկերներից մէկը լուծեց խնդիրը:

Ճիշտ մեր դասարանների գլխին գտնւում էր մի փայտանոց, ուր կարելի էր գնալ մի նեղլիկ ու վատ շինւած սանդուղքով: Փայտանոցն ունէր փոքրիկ լուսամուտ պարտէզի վրա: Ահա այգելից էր, որ մտածել էր մեր հնարագէտը մագլցելով իջնել այգին ու սկսել արշաւանքը:

Ասաւ ու գնաց որ փորձի: Փորձը աջողւեց: Նա վերադառն զրպաններն ուռած և բերանը աղտոտ:

—Եղաւ, —ասաւ նա խորհրդաւոր կերպով.—սրանից յետոյ ամեն օր ես կիջնեմ, տոպրակը կը լցնեմ, իսկ դուք պատուհանից վեր կը քաշէք. ելնելն ու իջնելը հեշտ է...

Միւս օրը եօթը դաւադիրներս փայտանոց ծլկւեցինք և ամբողջ մեծ դասամիջոցին, որ ճիշտ երկու ժամ էր տևում, ցած չեկանք: Ուտում էինք ու զրպաններս լցնում:

բ.

Երկար չը տեղ սակայն մեր այդ քաջագործութիւնը:
Դպրոցում մի զիւղացի ծերունի ծառայ ունէինք, այտին
մի մեծ ուռուցք, զլխին՝ մի մեծ փափախ:

Անունը Յակոբ էր. մենք կանչում էինք «Փոկակապ Ակոփ
ապէր»: Շուտասելուկը հօ յիշում էք:

Միամիտ, բարեմիտ, դանդաղաշարժ և քնկոտ մի ծերուկ
էր: Կատակներ, խաղեր ու ծաղր կարկուտի պէս տեղում էին
զլխին, բայց լուռ ժպտում էր ու երբէք չէր բարկանում:

Ահա այդ «Փոկակապն» էր, որ մի օր վրա հասաւ մեզ



այն րոպէին, երբ վեց հոգի շարւած փայտանոցի մութ ան-
կիւնումը փայտերի վրա՝ խաղող ու դեղձ էինք խժում:

Փայտ տանելու էր եկել, թէ գուցէ մի ուրիշ բանի, ո-
րոնցով լիքն էր այդ տանիքի տակի ամբարը:

Բայց հէնց որ դէմ առ դէմ եկաւ մեզ, սաստիկ վախե-
ցաւ: Նախ կարկամեց, յետոյ վիզը առաջ պարզեց, լուռ
զննեց ամենքիս ու գոչեց.—Եա... էս ի՞նչ է...

Մենք էլ շատ վախեցել էինք: Վեր թռանք: Այդ միջոցին
իսկ մեր ընկերը, որ այգումն էր, երևի լաւ կշտացած, վէշի
մէջն էլ դեղձ ու տանձ, երեաց լուսամուտից ուներս ոստնեց:

Յակոբ ապէրը ցնցւեց ու վախաւ դէպի սանդուղքը:
Կարծեցինք, որ գնում էր վերակացւին կանչի: Միմեանց
գլխի վրայից ցատկելով առաջ վազեցինք, ծերունուն հրեցինք,
հրմշտեցինք, գրեթէ գլորեցինք ցած ու բագ նետւելով ցըր-
ւեցինք, անհետացանք:

Սակայն Ակոփ-ապէրը գնացել, պատմել էր ամեն ինչ
տեսչին, և մի առ մի մեր անունները տւել:

Պատժեցինք. փայտանոցը կողպւեց, էլ պտուղի երես չը
տեսանք, բայց մտածեցինք ապօրից մեր վրէժը հանենք, եթէ
ոչ այսօր, գոնէ վաղը:

գ.

Հնարքը գտաւ նորից այգին իջնողը:

Ակոփ-ապէրը հեռաւոր զիւղերից եկած մենակ մի մարդ
էր, ապրում էր դպրոցում: Տւել էին նրան մի խուց, ուր կար
նրա անկողինը, մի ճրագ, մի կուժ, մի քանի ամանեղէն:
Դուռը փակել չէր էլ մտածում. գողացւելուց վախ չունէր:

Ու մի օր, երբ ծերունուն դպրոցից դուրս գործի էին
ուղարկել, մտանք նրա խուցը, մի առ մի դուրս բերինք ինչ
որ կար այնտեղ, նոյն իսկ աթոռն ու կուժը, ամեն ինչ, և
տարանք թագցրինք զանազան տեղեր: Վերմակը նետեցինք
խոնաւ ու մութ մի մառանի խորքը, ներքնակը շպրտեցինք
աւերակ խուցերից մէկի մէջ, ամանները ջարդ ու փշուր ե-
ղան, երբ նետում էինք այս ու այն նկուղը, իսկ բարձն ու
հագուստը թագցրինք թատրոնական բեմի տակ...

Գնա ու գտի այժմ այդ ընդարձակ շէնքի քար ու բանդ
խուլ անկիւններում:

Խուցը լիովին դատարկւեց. մնաց լերկ փայտէ մահա-
կալն ու սեղանը միայն. ոչ իսկ աւելը թողինք:

Գոհ մեր արածովը, գնացինք տուն։ Ոչ մէկին չը պատմեցի մեր արածը, բայց ամբողջ գիշեր մտածում էի թէ Ակոփ-ապէրը ինչպէս պիտի ապշէր, երբ ներս մտնէր խուցը, ինչպէս պիտի շւարած մնար։

Իսկ գիշերը. ուր, ինչի՞ մէջ պիտի քնէր։ Զէ որ ես ահա անկողնիս մէջ, վերմակումս փաթաթւած պառկել եմ, բարձ էլ ունիմ, ներքնակ էլ, իսկ նա ոչինչ չունի։ Դասարանները մաքրելուց յոգնած գնալու է որ պառկի, գնալու է որ ճրագը վառի, թէյ շինի... և ոչինչ չի գտնելու...

Սկսեցի սաստիկ անհանգիստ լինել պառկած տեղումս։ Քիչ էր մնում լայի։

Էլ քնել չէի կարողանում. խիղճս ինձ տանջում էր։

Դ.

Միւս առաւօտ դպրոց մտնելիս՝ առաջին լուրը որ լսեցի՝ այն էր, թէ Ակոփ-ապօր խուցը կողոպտել էին երէկ։ Կարծում էին թէ գողեր են մտել։

Տեսայ իրեն՝ ծերունուն, նստած խուցի առաջ, արտասուբը աչքերին, շւարած և անշարժ։ Այնպէս խղճալի էր...

Գիշերը քնել էր վանահօր ծառայի խուցում, ընթրել էր այնտեղ, բայց հօ այդպէս չէր կարելի։

Եւ դաւադիրներս տիսուր իրար մօտ եկանք դասամիջոցին մի ծառի տակ։

— Տղերը, — ասաւ յանկարծ մէկը, — մեր արածը անպիտան բան էր։ Սկսած պտուղ գողանալուց մինչև այս վերջին մեր վարմունքը՝ չարագործութիւն է... Ուղղենք մեր սխալը։

— Ի՞նչպէս, — ձայնեցինք ամենքս մի բերան։

Ըստ երեսյթին, ինձ նման բոլորն էլ տանջւել էին գիշերը։

Շատ պարզ է. նախ՝ բոլոր թաքցրած բաները հանենք և տեղը դնենք. ցած բան է մեր արածը։

— Իսկ յետոյ...

— Յետոյ պիտի կոտրտած բաները մեր փողովն առնենք ու տանք Ակոփ-ապօրը։

— Փող ովք կը տայ մեզ։

— Բաժանենք մեզ վրա, — ասացի ես կտրուկ. — Կերթամ, կը պատմեմ հօրս մեր արածը, կը պատմեմ ամեն բան, նա փողը կը տայ։

— Ես էլ կը պատմեմ։

— Ես էլ... Ես էլ...

Վճռւած էր. Պէտք էր տեսնել, թէ ինչպէս իսկոյն գւարթացանք մենք, ինչպիսի ոգեւորութեամբ որոնում էինք թաքցրած իրերը, խուցը տանում ու լաւ սարքում, տեղաւորում։



Ակոփ-ապէրը մեր գործի կէսին վրա հասաւ և ապշած կանգ առաւ խուցի դռան առաջ։

— Եա... — արաւ միմիայն ու մնաց անշարժ։

— Ոչինչ, ապէր, — կանչեց մեզնից մէկը. — դու իսկի դարդ մի անի։ Այ, բոլորը կը բերենք, կոտրածներն էլ՝ փող կը տանք, որ առնես...»

— Մենք էինք արել, — աւելացրեց երկրորդը, — հանաք

Էինք արել, մի նեղանայ, ապէր. Ես քեզ համար մի լաւ կուժ
կը բերեմ:

—Ես էլ մի ջրածիկ:

—Ես էլ... Ես էլ ափսէներ...

—Իսկ Ես,—ասում էր մէկը, —Ես ինչ բերեմ.

Ծերունին ժպտուն արտասւում էր. Սաստիկ յուզւել էր:
Եւ երբ ամեն ինչ տեղաւորել էինք, յանկարծ բռնեց մեզ-
նից մէկին ու մինչ նա ճշում էր վախից՝ ասաւ.

—Մի վախենայ, բալաս, սպասի՝ մէկ համբուրեմ քեզ...

Ու արտասւախառն համբուրեց նրան, յետոյ բաց թողեց,
դարձաւ ամենքիս ու ասաւ.

—Աստւած պահի ձեզ, տղէք...

Ե.

Միւս օրը ամեն տեսակ իրերով լցրինք նրա խուցը:

Ո՞չ միայն կուժ, այլև թէյ, շաքար, մոմ և բաժակներ էլ
բերել էինք.

Ծերունին զւարթ, ժպտուն տեսաւ այդ ամենը, յետոյ
թողեց որ տեղաւորենք ու ինքը ուղղակի գնաց դպրոցի տեսչին:

Դասերից յետոյ տեսուչը մեզ եօթիս էլ կանչեց իր սե-
նեակը և երբ հաւաքւել էինք, նայեց ամենքիս երկար ու լուս,
յետոյ մօտեցաւ, ձեռքը դրեց առաջինի ուսին և ասաւ.

—Ապրիք, տղէք... Ոյժմ տուն գնացէք... ուրիշ ասելիք
չունեմ ձեզ...

Յետոյ ժպտաց ու գլխով արաւ:


Գմբերի պէս դուրս նետւեցինք:

Իմ դպրոցական կեանքի ոչ մի օրը այդքան լաւ չէ անցել...

1) Ինչու էր այդ օրը նրա դպրոցական կեանքի ամենալաւ օրը:

2) Ծիշտ է, որ սկսած պտուղ գողանալուց մինչեւ նրանց վերջին
վարժունքը բոլորը շարագործաւթիւն էր ու ստորութիւն. ինչու.

3) Ուրեմն նրանք ինչու էին գողանում, ինչու էին այդպէս վար-
տում. Ցած ու շարագործ տղէք էին նրանք.



87. Կէսօրին

Մեր գիւղից վեր մինչ էսօր
կայ ուռենի մի սըգւոր.

Մեծ անտառից նա զատւած,
մարդու կացնից ազատւած,

կանգնած է դեռ ու շոգին
հով է տալի մըշակին:

Գիժ, լեռնային մի վտակ
խոխոջում է նըրա տակ,

կանչում մարգերին:

Էն առւակում, կէսօրին,
երբ որ շոգից նեղանում,

գընում էինք, լողանում,
խաղում էինք, վազվըզում

գոյնգոյն մանրիկ աւազում,
կամ հետեւում հե ի հե

թիթեռնիկին ոսկեթև,
ու միշտ յոգնած ժամանակ

խաղում, կանչում մարգերին:

88. Արշարու

ա.

Մի կերի տարի ես ու մեր Աւագը Մասրէքում խոզ էինք
պահում. Հիմի մի աշունքւայ գիշեր բերել ենք խոզը իր նիս-
տը արել ու դափի դռանը մի կրակ վառել, որ բոցն Աստծու
ոտներն էրում է. Մի լուսնեակ գիշեր է. Ես պկու եմ ածում,
էս Աւագն էլ մի բայաթի է վեր քաշել, որ սար ու ձոր
գւգւում են:

Մին էլ Աւագը թէ՝ «ԱՇ տղայ, էն ով է, հրէ մի մարդ է գալի վերի կոնիցը»:

Մտիկ տամ տեսնեմ, դրուստ որ՝ մի մարդ է գալի վերեւիցը: Ամա ես էլ լսել եմ, որ արջը գողութիւն գալիս խարելու համար առաջի երկու ոտը դոշին է զնում, երկու ոտանի մարդի նման է գալի, ոնց որ մարդ ըլի:

Ասի՛ Աւագ, էս ոքմին չի, արջ է:

Թէ՛ բօհ, չէ չէ պողեր:

ԱՇ տղայ, ասի, արջ է:

Ես՝ հա, սա՝ չէ. ես՝ հա, սա՝ չէ: Իսկ նա էլ կամաց-կամաց կողքը հան մօտենում է ու ձեռներիս էլ հրացան չը կայ: Մին էլ էն տեսանք՝ առաջի երկու ոտը վէր դրաւ, դառաւ չորսոտանի ու, առ հա կը տա՞ խոզի կէս տեղը: Խոզը ճղճղալով իրար խառնւեց, հաւաքւեց արջի վրա:

— Ալաբաշ, բռնի հա բռնի, հրէս հա հրէս:

Ամեն մինս մի ածխակոթ վեր կալանք, վազեցինք: Մի հաստլիկ մէրուն ունէինք. ականջ գնենք, որ սրա ճղոցը ներքի փոսերիցն է գալի: Վազ տւինք փոսերի վրա: Ածխակոթը բաշել ենք. հիմի էս անիրաւին վէր ենք հատում, տալիս ենք, ինչ անում ենք, չենք անում, մէրունը բաց չի թողնում. առաջներս խտրտած ձորն է ընկնում: Վերջը՝ շատ տեղը նեղացրինք, չէ, թող արաւ, փախաւ:

Առաւօտը ասի՛ Աւագ, դու խոզի կշտին կաց, ես գնամ տանիցը մի հրացան բերեմ:

Թէ՛ դէ, լաւ:

բ.

Աւագը խոզի կշտին կացաւ, ես գնացի. տանը մի հին հրացան ունէինք, վեր կալայ եկայ: Եկայ, շիտակ գնացի ներքի մոշուտնին, որտեղ գիտեմ արջի տեղն է. Ման եկայ. որ գտայ ոչ, մի տեղ մի լաւ մոշուտ պատահեց, կանգնեցի, ասի՛ մի քիչ մոշ ուտեմ: Միամիտ մոշ ուտելիս՝ հէնց մոշենու տակիցը մինը ֆրթացրեց ու հրացանս բռնեց:

Դու մի ասիլ, գնացել եմ հէնց անտէր արջի վրա եմ կանգնել:

Որ հրացանիս լուլիցը բռնեց, ես էլ կոթը պինդ բռնեցի: Հիմի նա ոլորում է, ուզում է կոտրի, ես էլ ոլորում եմ, որ հէնց անեմ ծէրը վրէն ընկնի, հուպ տամ, ծուխը փորն անեմ: Բայց անտէրը գլխի է ընկել, թողնում չի:

Ես ձգեցի, նա ձգեց. տեսայ որ բան չի դառնում, ձեռս գցեցի, ասի յանկարծ խլեմ: Զեռս գցեցի թէ չէ, թանթլիկը բերաւ ուսովս պատ տւաւ. Որ թանթլիկն ուսովս պատ տւաւ, հրացանը բաց թողեց. Էնքան արի՝ հրացանի ծէրը փորին դէմ



առաւ, չախմախը ձեռս գցեցի, ասի՛ էս է բանը պրծաւ: Վերի ոտը բաշեցի՝ չըրթկացը: տրաբեց ոչ: Մտիկ տամ, տեսնեմ՝ քարը վէր է ընկել, կորել: Էստեղ մէջքս կոտրեց: Հրացանը բաց թողի, ասի՛ խտտիցն ազատւեմ. եղաւ ոչ: Բոնեցինք իրար:

գ.

Դէս բաշեցինք, դէն բաշեցինք: Տեսնեմ՝ անտէրն էս է ինձ ուտում է: Զէն տւի՛ «ԱՇ աբաշ հէյ... ԱՇ աբաշ հէյ...»

Մին էլ տեսայ շունը կլանչելով գալիս է, Եկաւ, հասաւ: «ԱՇ աբաշ, օգնի, ասի, ինձ կերաւ...» Հայ քեզ մատաղ, շուն.

որ հասաւ, մէջքին տւաւ էլի, ոնց որ մի գնդակ ըլի. Ամա
բնչ. Էն շունը թէ նրա մէջքին տւած, թէ էն լեռ քարափին:

Ոնց որ երկու փահլեան պինդ իրար բռնեն, բռնել ենք ու
աշք ենք զցել. Մին էլ էն տեսայ՝ կում արաւ ու մար-
դի պէս երեսիս մի մեծ թքեց—թու. Որ թուքն աշքերս բռո-
նեց, գլուխս դոշիս վրա կուացրի, ետնուց էլ թանթլիկով մի
մի թունդ ապտակ հասցրեց, ու ինձ կորցրի:

Տեսայ՝ էլ ազատւելու գուռը չը կայ, ասի՝ ես առաջուց
երեսիս վրա վէր ընկնեմ, որ երեսս փչացնի ոչ. Բերանսիվէր
տակին վէր ընկայ: Որ տակին վէր ընկայ, շունն աւելի կա-
տաղեց: Արջն ընկել է ինձ վրա, շունը ետեից իրեն ուտում
է, որտեղից բռնում է—օգուտ չի անում: Դու մի ասիլ վար-
պետ շուն է, գիտի արջը որտեղից կը խեղճանայ: Մէջքին
վեր ելաւ, ականջներիցը բռնեց: Որ ականջներիցը բռնեց,
արջը ինձ թողեց: Անտէրը գազազեց, շանը թափ տւեց մէջ-
քից, վէր զցեց ու բռնեց, հուպ տւաւ թէ չանչեց, էլ գիտեմ
ոչ՝ ինչ արաւ, որ բաց թողեց, շունը կլանչելով ձորն ընկաւ,
փախաւ, կորաւ:

դ.

Շունն էլ գնաց. մնացինք ես ու ինքը: Հիմի տակին երեսս
բռնած միտք եմ անում: Իմացել եմ, որ արջը ականջ է
դնում, տեսնի շունչ կայ, թէ չէ: Թէ իմանում է, որ շունչ
է բաշում տակի ոքմինը, ջարդում է մինչև շունչը կտրի,
թէ հօ չէ, քոթկաթաղ է անում, թողնում, գնում, որ հոտի,
յետոյ գայ հանի ուտի: Էս միտք անելիս մին էլ էն տեսայ՝
գլուխը բերաւ գլխիս վրա դրաւ, շունչը իրեն բաշեց. ականջ
է դրել: Ես էլ շունչս փորս զցեցի, ոնց որ թէ մեռած եմ:
Գլուխը վեր բաշեց, մի քիչ կացաւ՝ մին էլ ականջ դրաւ: Էլ
ետ շունչս պահեցի: Սա որ տեսաւ՝ ես էս է մեռած եմ, ինձ
թող արաւ, մըրթմըրթալով գնաց: Աչքս ծերպ արի, ասի՝ մտիկ
անեմ, տեսնեմ ուր է գնում: Ասում եմ՝ հէնց լինի մի քիչ
տեղ հեռանայ, վեր կենամ փախչեմ:

156

Գնաց՝ մօտիկ ցախ ու մախ կար, փէտ կար, հաւաքեց
բերաւ վրէս ածաւ: Մէջքիս վրա դրաւ, շինքիս վրա դրաւ,
էլ ետ գնաց: Գնաց՝ մի թեթև ցըցչորի կար, էն էլ բերաւ ոտ-
ներիս վրա դրաւ. մին էլ ետ գնաց:

Տեսնեմ՝ մի ահագին քօթուկ կայ, չարչարւում է պոկի,
որ բերի էն էլ վրէս զցի: Միտք արի որ՝ թէ էս քօթուկը բերի
վրէս զցի, տակին շունչս կը կտրի: Ասի՝ քանի ուշքը քօթու-
կումն է, վեր կենամ կորչեմ: Փորբառդ տալով փէտերի տակի-
ցը գուրս եկայ, փախայ մտայ մօտիկ մամխուտը, տապ արի:

Հիմի տապ արած տեղիցը մըտիկ եմ անում: Չարչարւեց,
քօթուկը պոկեց ու, ոնց որ մարդը խըտըտի, խըտըտեց, բերաւ
թէ վրէս զցի: Եկաւ տեսաւ փէտերի տակին մարդ չը կայ:
Քօթուկը խըտըտին զարմացած կանգնեց. փէտերի տակին
մտիկ արաւ, շորս կուռը մտիկ արաւ, յանկարծ քօթուկը վէր
զցեց ու՝ թու հա թու, թու հա թու, մարդի նման թքոտում
է. ասի՝ երեխ ափսոսում է էլի:

Թու հա թու անելով, ճրճուացնելով ընկաւ ներքի ձորը:
Ես էլ վեր կացայ, դուրս պըրծայ դէպի Աւագը: Գալիս եմ,
ոնց եմ գալիս, ոնց որ հետ ածած լինեմ: Ետ եմ մտիկ անում,
ասում եմ տեսնեմ, հօ արջը գալիս չի: Հասայ մեր խոզի
նիստը: Էս Աւագը թէ՝ այ տղայ, էտ ինչ խաբար է, էտ ինչ
ես եղել: Ասի՝ էլ խաբարն հրն է, բո տունը բանդւի, էսէնց
բան եկաւ գլխիս: Թէ՝ բա հրացանդ հւը է:

Նոր տեսնեմ, որ հրացանս մտիցս ընկել է, թողել եմ տեղը:
ե.

Եկանք մի բանի հոգի հաւաքւեցինք, գնացինք հրացանս
բերինք: Հրացանիս բարը շինեցի, պնդացրի, ասի՝ Աւագ, էլի
պէտք է գնամ: Թէ՝ այ տղայ, ձեռը վեր կալ, կը բռնի, կը զգի:
Ասի՝ հիմի սովորեցի, էնպէս չեմ անի, որ բռնի:

Թէ՝ դու գիտես:

Հրացանս վեր կալայ, բարը պնդացրի ու գնացի: Տանձի
էլ կաթոցի ժամանակն է: Գնացի մինչև ճաշ ման եկայ,


157

ոտնահան եղայ, գտայ ոչ. Միտք արի՝ ախպէր, սա ուր կը լինի քաշւած, ախր սա պէտք է որ էս խոզի կողմերից հեռանայ ոչ. Վեր կացայ, ասի՝ ներքեւմ մոշուտների վրա:

Մի քիչ զնացի, մին էլ տեսնեմ, ըհը, արջի հետքը առաջիս. Հետքն ընկայ, զնացի. զնամ տեսնեմ հրէս մի բարդի կրծել է, կրծել ու թողել. Գլխի ընկայ, որ սրանում մեղր կայ: Վերև մտիկ տամ, ճանձը արկանոցից բանում է: Ասի՝ հիմի թէ իրեն գտնեմ էլ ոչ, էս հօ որս է ու որս: Մի քիչ էլ զնացի, տեսնեմ առաջիս մի մորմոնջարուն է քանդել, բայց հողը դեռ թաց է: Տեսայ որ մօտեցել եմ: Էստեղ մի անտէր ահ ընկաւ սիրտս: Հրացանի բարին մտիկ տւի ու առաջ զնացի: Հէնց ոտս փոխեցի, մի թըմ փթթմփոց եկաւ: Կանգնեցի... Բացատի (թալի) գլխին մի լաւ մեղրատանձի կայ. տեսնեմ՝ հրէս տակին տանձ է ուտում: Էս կունը մի տանձ է կաթում, դէսն է վազում մըրթմըրթալով ծամում է ու ականջ գնում, էն կունը մի տանձ է կաթում, դէսն է վազում: Մին էլ որ կանգնեց տանձի կաթոցին ականջ գնելու, ծառի տակը մտայ, հրացանը երեսս կալայ: Տեսնեմ հրացանի ծէրը տըմբ-տըմբում է: Զէ, սիրտս պնդացրի, մին էլ նշան դրի, հուպ տւի... Հրացանը որ տրաքեց, սա մի գոռաց, պըտիտ եկաւ, ու առ հա կը տաս, ընկաւ ներքի ձորը: Հրացանս մին էլ լցրի, մօտիկ թմբի գլուխը բարձրացայ, տեսնեմ սա ջրին է վազում. ասի՝ բաս սրա բանը խարաք է. վիրաւորը որ ջրին զնաց, ջուր խմեց—պրծաւ, էլ ապրիլ չի:

Մին ասի՝ ետեիցը զնամ, մին էլ ասի՝ անէծք չար սատանին, վիրաւոր արջը գէշ է, կը բռնի, կը փչացնի: Էն է ինչ նա դէնը զնաց, ես էլ ետ եկայ, էլ գիտեմ ոչ ինչ եղաւ:

Միայն էն օրերում ձորի վրա շատ ուրուր պըտիտ եկաւ...




Ց ա ն կ

- | | | | |
|-----------------------------------------------------------|----|----------------------------------------------------------|----|
| 1. *Ամենից լաւ տունը | 3 | 27. *Ճախարակ | 43 |
| 2. Առաջին դասը, ըստ Ամիշիսի | 5 | 28. Ամենալաւ վկայականը | 44 |
| 3. *Վեր կաց, Դ. Մելոյեան, կրճ. | 7 | 29. *Ճպուռն ու մըջիւնը, Աթ. Խնկոյեան | 44 |
| 4. Փոքրիկ ձիավար, Շաֆֆի | 7 | 30. Բէզակի լապտերը,
փոխ. Ս. Յարութիւնեան | 46 |
| 5. Այգեկութ | 8 | 31. *Զաղացպանի երգը,
Աթ. Խնկոյեան | 48 |
| 6. Պապս | 9 | 32. Դեղձանիկն ու տատրա-
կիկը, Աթ. Խնկոյեան | 49 |
| 7. *Հոկան | 11 | 33. Հօր հիւանդապահը,
ըստ Ամիշիսի | 49 |
| 8. Սահակ-Մահակը,
ըստ Տ. Փիրումեանի | 17 | 34. *Ցորնատէրն ու ջաղաց-
պանը, Աթ. Խնկոյեան | 54 |
| 9. *Կարդա, Ա. ծատուրեան
կրճատ. | 20 | 35. Չնագնդի, Սիմակ | 57 |
| 10. *Գիւղացին և ծառը | 21 | 36. *Պոչատ աղւէսը, Աթ.
Խնկոյեան | 62 |
| 11. Չալօի էշը, Յ. Աղաքար | 21 | 37. Գրագրի տղան, ըստ Ամի-
շիսի | 63 |
| 12. *Տերեաթափ | 25 | 38. *Զմեռ, Հ. Հայրապետեան | 68 |
| 13. Կոշիկ սրբող թումասը | 26 | 39. Աշակերտ Օհանը,
ըստ Ա. Զեխովի | 69 |
| 14. *Աշուն, Լ. Մանւէլեան | 28 | 40. *Ագուան ու աղւէսը,
Աթ. Խնկոյեան | 72 |
| 15. Գգւանքի կարօտ | 28 | 41. Անտառում | 73 |
| 16. *Մայրը, ըստ Գլեշէեփ,
թարգ. Աթ. Խնկոյեանի | 29 | 42. *Քուն | 75 |
| 17. Եղջերուն | 30 | 43. Պայտառ Աւօն | 76 |
| 18. *Կուռնին ու սագը, Աթ.
Խնկոյեան | 31 | 47. *Դարբին | 78 |
| 19. Պառաւի կատուն | 31 | 45. Արու-Հասանի մաշիկները | 79 |
| 20. *Աղւէսը | 33 | 46. Առաջին ձնծաղիկները | 84 |
| 21. Վայրենին ու նամակը | 34 | | |
| 22. *Ժամանակը, Դ. Դէմիրծեան | 36 | | |
| 23. Քարը | 36 | | |
| 24. Տատս | 39 | | |
| 25. *Մկների ժողովը | 41 | | |
| 26. Տատիկը | 42 | | |

47. *Յոգնած երկիրը,	66. *Մայիսը, Հ. Հայրապետ.	
թարգ. Յ. Յովհաննիսիսան	112	
48. Արևի մօտ, Աւ. Իսա- հակեան, կրճատ.	112	
49. *Սասունցի Դաւիթը գառ- նարած	89	
50. Դէպի քաղաք, Ռաֆֆի .	91	
51. *Ուռենի, Աթ. Խնկոյեան	95	
52. *Գառը մէր տալիս, Վ. Միքարեան	95	
53. Զատիկ, ըստ Պոօշեանի .	96	
94. *Գարուն առաւօտ	97	
55. Ծին ու ապառաժը, ըստ Վ. Փափազեանի	98	
56. *Գութան	100	
57. Ծոցանուկի, ըստ Յ. Աղաք.	100	
58. *Փոքրիկ երկրագ., Ժողով.	102	
59. Մի կտրիճ	103	
60. *Այ. սկ ամպեր, Ա. Ծատուրեան	106	
61. Կարկուտը, Կ. Մելիք-Շահ- նազարեան, փոփոխած .	107	
62. *Ճանձը, Աթ. Խնկոյեան	108	
63. Փակւած ու ազատ, Լ. Մանւէլեան	108	
64. Բանտի պատուհանին, ըստ Անդերսէնի	109	
65. Արտուտի երգը	111	
	66. *Մայիսը, Հ. Հայրապետ. 112	
	67. Ճերմակը	112
	68. *Վարդը, Գէօթէի	116
	69. Թաւամազ մեղուն, ըստ Աւենարիոսի	116
	70. Գարուն իրիկուն, Ժողով. 119	
	71. Սուալիկ որսկանը	120
	72. Գորտն ու ագռաւը, Ա. Խոն. 121	
	73. Ծաղիկների երեկոյթը .	122
	74. *Գիշեր, Դ. Դէմիրծեան .	125
	75. Արիստիբոտ բանւորը .	125
	76. *Անբախտ վաճառականներ 129	
	77. Մայրը	134
	78. *Անձրէ, ըստ Լ. Մանւէլ. 136	
	79. Սրտոտ տղան	136
	80. *Ծեր կաղնու մտածմուն- քը, Դ. Դէմիրծեան	140
	81. Հանդիպում, Ռաֆֆի .	140
	82. *Գորտն ու կովը, Աթ. Խըն- կոյեան	148
	83. Հունձ, Յ. Աղաքաք	143
	84. *Հանդիստ, Պ. Սարիբէ- կեան, փոփոխած	145
	85. *Կալի երգը	146
	86. Փոկակապ Ակոփ ապէր, Վ. Փափազեան, կրճատ .	147
	87. *Կէս-օրին	153
	88. Արջաորս	153

Մեր հեղինակութիւնները, մեր կազմած յօդւածները, մեր թարգ-
մանութիւններն ու փոխադրութիւնները ստորագրութիւն չեն կրում:



ՀԱՐՄ.
Հ4-269



ԼՈՒՍԱԲԵՐ

ԱՌԱՋԻՆ ՏԱՐԻ	40 կ.
ԵՐԿՐՈՐԴ ՏԱՐԻ	60 կ.
ԵՐՐՈՐԴ ՏԱՐԻ	70 կ.
ՉՈՐՐՈՐԴ ՏԱՐԻ	80 կ.
ՀԻՆԳԵՐՈՐԴ ՏԱՐԻ	1 ռ. 00 կ.

Դիմել Տիֆլիսъ, Бебутовская, 25, Ст. Писиціану
կամ պշհեստին.— Тифлисъ, книжный магазинъ
„Гирь“ («Գիր»):

2013

3684

«Ազգային գրադարան



NL0062019

~~H~~ Арм.
4-269.